

Xwiyía yayí neainariņi Matiyuo eaņipirini.

Ríwamiņi ripi “Xwiyía yayí neainipaxí Matiyuo eaņipiyi” riniņipirini. O Jisaso wiepisagowa worini. Xegí yoí ámi bi Ripaiorini. Jisaso rixa nipémáná niwiápínimeámi aņínami náni nipeyimáná eņáná ámi xwiogwí rixa obaxí nipwémáná eņáná ríwamiņi ripi eaņirini. Xegí Judayí diņi re yaiwiarinagá niwiniri, “Mixí ináyí nimóniri re miņweaņiyí nefa xwayí naniri ģweaņwáomani. Jisaso nefa aríowayá xwía piaxíyo dáni iwiaronfoyi rariņwáo nimóniri siņwiriýí, mixí ináyí nimóniri aņi Jerusaremi tíyo dáni neameņweáminiri eņirini.” yaiwiarinagá niwiniri náni ayí ámi diņi némore “Xeņwí ría moariņwini? Jisaso nefa Kiraisorini. Gorixoyá xewaxorini.” yaiwírixiniri ríwamiņi ripi eaņirini. E yaiwírixiniri ríwamiņi nearíná wía rókiamoagíáwa ámá aríowayá xwía piaxíyo dáni iwiaronfo náni niriro ríwamiņi eaagíá obaxí miņi nirori “Jisaso api tni api tni xixeni nimóga uņirini.” niriri eaņirini.

Jisasomi xiáwo írino nánirini.

1 ¹Xwiyía ripi íwiárfawé Jisasi Kiraisoyá nánirini. Oyá íwiárfawé nimóga nuri áwini e mixí ináyí Depitorini. Depitoyá íwiárfawé nimóga nuri wigí xiáwo írino Ebiríamorini. ²Ebiríamo Aisakomi emeaņinigini. E dáni Aisako Jekopomi emeaņinigini. E dáni Jekopo Judaomi tni xegí xexirímeáowami tni emeaņinigini. ³E dáni Judáo xiáfí Temaí tni íwí niniri Pereso tni Serao tni emeaņinigini. E dáni Pereso Xesironomi emeaņinigini. E dáni Xesirono Ramomi emeaņinigini. ⁴E dáni Ramo Aminadapomi emeaņinigini. E dáni Aminadapo Nasonomi emeaņinigini. Nasono e dáni Sarimonomi emeaņinigini. ⁵E dáni Sarimono émayí apixí Rexapí nimeari Bowasomi emeaņinigini. E dáni Bowaso Rutími nimeari Obetomi emeaņinigini. Obeto e dáni Jesiomi emeaņinigini. ⁶Jesio e dáni mixí ináyí Depitomi emeaņinigini. Depito e dáni apixí Yuráiaoyái nurápiri Soromonomi emeaņinigini. ⁷Soromono e dáni Riabowamomi emeaņinigini. Riabowamo e dáni Abaisaomi emeaņinigini. Abaisao e dáni Esaomi emeaņinigini. ⁸Esao e dáni Jexosapetomi emeaņinigini. Jexosapeto e dáni Joramomi emeaņinigini. Joramo e dáni Asaiaomi emeaņinigini. ⁹Asaiao e dáni

Jotonomi emeaŋinigiŋi. Jotano e dání Exaso emeaŋinigiŋi. Exaso e dání Xesekaiaomi emeaŋinigiŋi. ¹⁰Xesekaiao e dání Manasaomi emeaŋinigiŋi. Manasao e dání Emosomi emeaŋinigiŋi. Emoso e dání Josaiami emeaŋinigiŋi. ¹¹⁻¹²Josaiiao —Babironi dāŋí émáýí mixí nimeáa nibiro Judayo nípikiomearo iwí nimearo nimeáami úáná Judayí aŋí e xwiogwí obaxí ŋweaŋáná Josaiiao e dání Jekonaiaomi tǎni xegí xexirímeáowami tǎni emeaŋinigiŋi. Jekonaiao e dání Siatieromi emeaŋinigiŋi. Siatiero e dání Serababeromi emeaŋinigiŋi. ¹³Serababero e dání Abiudomi emeaŋinigiŋi. Abiudo e dání Eraiakimomi emeaŋinigiŋi. Eraiakimo e dání Esomi emeaŋinigiŋi. ¹⁴Eso e dání Sedokomi emeaŋinigiŋi. Sedoko e dání Ekimomi emeaŋinigiŋi. Ekimo e dání Eraiatomi emeaŋinigiŋi. ¹⁵Eraiato e dání Ereasaomi emeaŋinigiŋi. Ereasao e dání Matanomi emeaŋinigiŋi. Matano e dání Jekopomi emeaŋinigiŋi. ¹⁶Jekopo e dání Josepo, Mariaími xiagwomi emeaŋinigiŋi. Í Jisasomi xiriŋinigiŋi. O yeáyí neayimixemeaní nání Gorixoyá dǎŋí tǎni xegí xiáwowayá xwíá piaxíyo dání iwiaroŋo eŋagi nání xegí yoí bi Kiraisoyí rigíforini. ¹⁷Ayináni xiáwo írigo Ebiríamo nemeága nibiro mixí ináyí Depito emeaŋe nání xiáwowa wé wúkaú sikwí waú waú imóniŋírini. Xiáwo Depito ŋweaŋe dání nemeága nibiro Babironi kirapusí omiŋí wigíe nání xiáwowa wé wúkaú sikwí waú waú eni imóniŋírini. Omiŋí wigíe dání Jisaso rémoŋe nání ámi xiáwowa wé wúkaú sikwí waú waú imóniŋírini.

Jisasomi xinái xiriŋe nánirini.

¹⁸Xwiyíá Jisasi Kiraiso xiriŋe nání ripirini. Omi xinái Mariaí Josepo meáwiniginiri ikiyiŋí niyárimáná eŋáná ayaú sini nimeánimi memé eŋáná í rixa Gorixoyá kwíyí tǎni niaíwí agwí eŋinigiŋi. Í niaíwí agwí eŋagi niwiniro ¹⁹Josepo, ími meanío ámá saniŋo eŋagi nání “Xwiyíá ími ayá winipaxí wí muripa oemini.” niyaiwiri “Ími yumí emi omómni.” niyaiwiri ²⁰sini dǎŋí e nimóa waríná re eŋinigiŋi. Oriŋá winaríná Gorixoyá aŋínaŋí wo siŋáni niwimóniri re uriŋinigiŋi, “Josepoxi, mixí ináyí Depitoyá xiáwoxini, dixí apixí Mariaími éí niwiri emi mimopani. Niaíwo ími kwíyí Gorixoyápimi dání eweáo eŋagi nání anani mei. ²¹Í niaíwí oxí wo xiriníárini. Ámá xegí imónigiáyo íwí yarigiápi nání xwiyíá meárinipírixiniri yokwarimí niwiiri yeáyí uyimixemeaní eŋagi nání xegí yoí Jisasoyi wírírixini.” uriŋinigiŋi. ²²⁻²³Ayí eŋíná wíá rókiamoagíá wo áwaní niriŋi ríwamiŋí eaáriŋí ripi “Re eníárini. Apixí oxí míméániŋí wí niaíwí agwí neri oxí wo xiránáyí, yoí Emaniueroyi —Yoí míkí ayí Gorixo nene tǎni nawíni ŋweanía nánirini. Yoí e wírípírírini.” Ríwamiŋí e niriŋi eaáriŋí api xixeni imóniníá nání e imóniŋinigiŋi. ²⁴Aŋínaŋí Gorixoyáo e uríagi Josepo sá weŋe dání niwíápínimeari aŋínaŋo sekaxí urípa neri xegí apixí Mariaími meŋinigiŋi. ²⁵Ími nimeari aí sini niaíwo mixiripa neríná í tǎni sá bi miwé néra núisáná í rixa niaíwo xiráná xegí yoí Jisasoyi wíririŋinigiŋi.

Sogwí íwiapariñími dání bigíáwa nánirini.

2 ¹ Mariaí Jisasomi Judia piropenisíyo aṅí yoí Betirexemi dání nixirimáná eṅáná Judayí áminá wo mixí ináyí Xerotoyi riniño Jerusaremiyo niṅweari xegí Judayo meṅweañáná re eṅinigini. Ámá siṅí náni eṅwipearigíá wa sogwí íwiapariñími dání nibiro Jerusaremi nírémoro ² yariṅí re wigíawixini, “Judayí mixí ináyí imóninía náni niaíwí siṅí xiriño gerini? Sogwí íwiapariñímini niṅwearíná omi xiráná siṅí o náni ṅweáagi siṅwí niwinirane náni omi yayí oumeanirane bariṅwini.” urémeáagiá ³ mixí ináyí Xeroto “Niaíwo mixí ináyí nimóniri nimúronirieninjo?” niyaiwiri diṅí ríá nuxeri Jerusaremi ṅweáyí níni eni diṅí ríá nuxéa úagi ⁴ o apaxípaniṅí imónigíá xwéowami tñni ṅwí ikaxí eániṅípi mewegíáwami tñni awí neaárimáná yariṅí re wiṅinigini, “Kiraísoyi riniño, yeáyí neayimixemeanía náni negí aríowayá xwíá piaxíyo dání iwiaronfoyi rariṅwáó ríwamiṅí niriniri eániṅípi ge xiripíría náni rinini?” uríagi ⁵ awa re urigíawixini, “Negí Judia piropenisíyo re aṅí yoí Betirexemiyo xiripaxí imónini. Ayí ripi nánirini. Wíá rókiamoagiá wo áwaṅí niwuriyiri ríwamiṅí re eaáriṅirini, ⁶ Judayí aṅíyo aṅí yoí Betirexemi ṅweáyíné aṅí niyoni náni ámá obaxíyíné meṅagi aiwi segí ámá wo mixí ináyí nimóniri gí Judayí niyoni meṅweaníá eṅagi náni segí aṅí api aṅí xwé tñni xixeni imóniníárini.’ níriri eaáriṅirini.” uríagiá ⁷ Xeroto yumí diṅí niyaiwimáná “Siṅíyo eṅwipearigíáwa obípoi.” níriri awa rixa báná yariṅí re wiṅinigini, “Siño gíná ṅweáagi winigíawixini. Siṅomi siṅwí niwinimáná eṅáná emá arari pweṅirini?” uríagi awa rixa áwaṅí uráná ⁸ o Betirexemi náni re uowáriṅinigini, “Soyíné nuro niaíwo náni píraníṅí píá époyi. Rixa siṅwí niwiniróná nioni eni nuri yayí seáyí e umeminiri náni ámi nibiro áwaṅí nírípoi.” uríagi ⁹ awa aríá e niwiro wigípi óíyo waríná re eṅinigini. Siṅí awa xámi sogwí íwiapariñímini niṅwearóná winigíawami xámi numeari aṅí niaíwo wenjwámi seáyí e ṅweañinigini. ¹⁰ Siño e ṅweáagi niwiro seáyimi seáyimi nimóniro diṅí níá niwiniri ¹¹ aṅiwámi nipáwiro niaíwo xinái Mariaí tñni ṅweañagi niwiro re egíawixini. Xwíáyo nipíkínimearo omi yayí numemáná amípí o náni imóniṅí wigí ayá rimixarigíápi niroaro siṅá gorí tñni íkíá díá — Díá yoí pirakenisaní tñni murí tñni náni rinini. Díá api diṅí naṅí eaariṅí xixegíni sixí wíxáú tñni mini wigíawixini. ¹² Mini niwimáná eṅáná Gorixó oriṅá nupáririri rímiṅí re uriṅinigini, “Mixí ináyí Xeroto tñṅí e náni ámi mupa époyi.” uríagi wigí aṅí e náni nuróná óí xegí wíyo ugíawixini.

Isipiyí aṅíyo náni éí ugíá nánirini.

¹³ Awa rixa numáná eṅáná re eṅinigini. Josepo oriṅá niwiniríná aṅínaṅí Gorixoyá wo siṅáni nírónapiri re uriṅinigini, “Rixa niwíápiṅimeari niaíwo tñni xinái tñni nimeámi Isipiyí aṅíyo náni éí úpoi. Sepíoyíné

nuro rémófe dání ámi nioni searimíae nání ηweáírixini. Xeroto niaíwomi pikini piá énapini enjagi nání rirarinjini.” uríagi ¹⁴ o áríwiyimi aí niwiápínimeari niaíwo tñni xinái tñni nimeámi Isipiyí anjýo nání nuro ¹⁵niñwearóná mixí ináyí Xeroto pée nání ηweaagiárini. Wíá rókiamoagíá wo xwiýá Gorixoyá niwuriyiri ríwaminjé eaárinjé ripi “Gí íwo Isipiyí anjýo ηweañáná ‘Eini.’ urimíárinini.” níriri eaárinjé api xixeni imóninía nání Josepo niaíwomi Isipiyí anjýo nání nimeámi unjinigini.

Niaíwíyo minjé rirómí emegíá nánirini.

¹⁶Xeroto, Jerusaremiyo xwayí naniri ηweaño sogwí íwiaparinjímí dání urínénaparigíáwa ámi xíomi miwíménapíagía nání “Yapísí ría níwapiyíoi?” niyaiwiri diñjé ríá ápiáwíniñjé wéagi xewaniño awami siño nání yarinjé wíáná awa “Íná ηweáagi winiñwanigini.” uríapi nání diñjé nimori porisowami uowáráná awa nuro niaíwí oxí Betirexemi dánjýyíyá tñni e midimidání niñweaxa pugíáyíyá tñni, niaíwí oxí wigí xwiogwí waú wo sini mimúropa egíá niyoni minjé rirómí emegíawixini. ¹⁷⁻¹⁸Minjé rirómí eméáná xwiýá Gorixoyá wíá rókiamoagí Jeremaiaoyi riniño niwuriyiri ríwaminjé eaárinjé ripi “Anjé Rama dání ‘Yeyi.’ níririñi ηwí eánariñagi aríá wiarinjoí. Reserímí xiáíwa wigí niaíwí nání ηwí piyí niwíriniro wigí niaíwí wówi siñwí miwíníagía nání minjé ikiñwí umiríagía aiwi píni miwíárigíawixini.” ríwaminjé eaárinjé api íná xixeni imóninjinigini.

Ámi Isipiyí anjýo dání yigíá nánirini.

¹⁹Xeroto rixa nipéáná re enjinigini. Josepo Isipiyí anjýo dání oriñá niwíniríná anjínajé Gorixoyá wo siñáni nirónapiri re urinjinigini, ²⁰“Niaíwomi opikianeyiniri emegíáwa rixa pegíá enjagi nání niwiápínimeari niaíwo tñni xinái tñni nimeámi dixí Isireriyí anjýo nání úpoyi.” uríagi ²¹Josepo niwiápínimeari niaíwo tñni xinái tñni nimeámi nuri Isireriyí anjýo nírémoro ²²Josepo aríá re wiñinigini, “Xerotomi xewaxo Akereasoyi riniño xano mixí ináyí nimóniri neameñweaagípa xewaxo eni mixí ináyí e nimóniri Judia piropenisíyo re neameñweani.” rariñagía aríá niwiri wáyíniwiniri “Arige nuri Judia piropenisíyo ηweáminiréini?” yaiwiaríná Gorixo Josepomi oriñá nupáriri éí uowáráná epówa Judia piropenisíyo wíarí nimúroro Gariri piropenisíyo nání nuro ²³anjé yoí Nasareti riniñjípimi ηweaagiárini. Wíá rókiamoagíáwa ámá xiáwowayá xwíá piaxíyo dání iwiaronío nání re rigíapi “Ayí re ripíríárinini, ‘O Nasareti dánjorini.’ ripíríárinini.” rigíá api xixeni imóníwiniginiri Nasareti nání nuro ηweaagiárini.

Jono wayí numeaia uño xwiýá wáí urimenjé nánirini.

3 ¹Jono, wayí numeaia uño, Jisaso sini Nasareti ηweañáná, o nuri Judia piropenisíyo ámá diñjé meañe wáí nurimeríná ²re urayagírinini,

“Gorixo xwioxíyo mimeámí nineairi pírániñí neameñweani anjwi ayo enjagi nání segí íwí yarigiápi ríwímíni nimamoro pírániñí nisaniro ñweáírixini.” urayagírini. ³Wíá rókiamoagí Aisaiayoí riniño niriri ríwamiñí re eanípí, “Ámá diñí meañími dání ámá wo ráiawá re rarini, ‘Ámináo nání segí diñí óí naníniñí wimoiro óí pírániñí imoarigiápániñí wimoiro nero ñweáírixini.’ rarini.” ríwamiñí e niriri eanípí tñi xixeni Jono nuri axípi e yagírini. ⁴O rapirapí naní niyíniri emeagomani. Kamerí íá (iyáá írikwíniñí imóniñí wú) niyíniri arerixí íriñíyo yínagorini. Aiwá eni naní nagomani. Áxwaxí tñi píki iniiǵí tñi nagorini. ⁵Judayí wigí anj xwé Jerusaremi ñweagiáyí tñi Judia piropenisíyo ami ami ñweagiáyí nñi tñi iniiǵí Jodani rapápami ñweagiáyí tñi ⁶Jono tñí e nání nuro wigí íwí yarigiápi nání waropári wíáná o wayí numeaiia nuri aí ⁷Parisiowa tñi Sajusiowa tñi —Awa weyíni nimeniro ámá wíyo seáyí e wimónarigiáwarini. Awa Jono wayí oneameainiro bariñagía Jono siñwí e niwiniri ayí wigí íwí yarigiáyí ríwímíni nimamoro nisaniro mé “Wayíni oneameaini.” niyaiwiro bariñagía niwiniri nání re uriñiginini, “Sidirí miáoyíné, ‘Ríwéná Gorixo xeaniñí seaikáriníá enjagi nání éí úpoyí.’ go searíagi ríniñí meañiginiri wayí nero nioni tñámíni éí bariñoi? ⁸Soyíné íwí yarigiápi ríwímíni nimamorínáyí, pírániñí nero íkíá sogwí naní niweríná yariñpa imóníírixini. ⁹Re minirípa époyí, ‘Negí arío Ebiríamoyáone enjagi nání Gorixo wí xeaniñí neaikáriníá menini.’ minirípa époyí. Gorixo ‘Ebiríamoyá íwiáírawé nání “Nioni ayo xeaniñí niwiríná arige xwé obaxí imóniníáriní?” niyaiwiri ududí winarini.’ riyaiwiaríñoi? Oweoi, Gorixo diñí e yaiwipaxí menini. Anani siñá tíyo dání Ebiríamo nání íwiáírawé wimixiyipaxírini. ¹⁰Gorixo rixa rapíwé íkíá míkí tñí e nání íá xirini. Íkíá gini gina sogwí naní miwéagi niwiniríná nidikárirí ríá ikeááriníáriní. ¹¹Nioni sa iniiǵí tñi wayí seameaiariñáriní. Nioni enj eániñáoni aiwi ríwíyo binío nioni nimúrónini. Seyíné nioni nání ‘Ámá wé róniñorini.’ naiwiaríñagía aiwi o nioni tñi xixeni mimóniñagi nání ámá xináíwániñí nimóniño omiñí wiiarigiáyí bosoyá síkwí sù gwí wíkweaiarigiápa nioni oyá wíkweaipaxí menini. O wayí niseameairíná iniiǵí tñi seameainíámani. Wiyíné Gorixoyá kwíyí tñi seameairi wiyíné ríá tñi seameairi eníáriní.” nuriri ¹²Gorixo ámá naníyo yeáyí uyimixemeari sipíyo anipá imixiri eníá enjagi nání ewayí xwíyíá re uriñiginini, “Omiñí yarigiáyí pokí tñi wítí aiwá eyeyírómí ero aiwá ná aníyo tíro mamíwí tñi siyikí tñi ríá ikeááriro yarigiápa Gorixo eni axípi e emíániri wítí mamíwí tñi ná tñi eyeyírómí iníje xegí pokí íá nixiriri roni. Aiwá náyí aníyo tiri mamíwí tñi siyikí tñi ríá supáripaxí mimóniñíyo ikeáárirí eníáriní.” uriñiginini.

Jisasomi wayí umeainí nánirini.

¹³Jisaso Jono wayí onímeainiri nání Gariri piropenisíyo dání nibíri iniiǵí Jodani rapá tñí e nírémori omi wímeáagi aiwi ¹⁴Jono

nurakíminiri neri re uriñinigini, “Joxi nioni nání o wayí onimeainiri ribariñini? Oweoi, ‘Joxi wayí onimeaini.’ nimónarini.” uríagi aí ¹⁵Jisaso re uriñinigini, “Xe wayí oumeaiminiri siñwí nanei. E neraínáyí, Gorixo nioni nání ‘O siwí wé róniñíyí nání oeni.’ yaiwiaríñipi xixeni yaníwli.” uríagi ¹⁶o Jisasomi wayí umeaíáná o rixa níminimeámi peyaríná re eñinigini. Aní pírfyo dání ói ináná kwíyí Gorixoyápi xawiówíniñí niweapiri omi wímeañinigini. Omi wímeááná re eñinigini. ¹⁷Anínami dání xwiýá re rinénapíñinigini, “Gí niaíwí ayá tíñorini. Amipí o yariñipi nání yayí ninarini.” rinénapíñinigini.

Obo Jisasomi iwamíó wíwapiyíñí nánirini.

4 ¹Kwíyí Gorixoyápi Jisasomi níwímeámáná omi Obo iwamíó owíwapiyiniri áamá diñí meañí e nání niméra úáná ²o aiwá miní ñwíá niñweari rixa síá 40 nórimáná eñáná o agwí wíáná ³iwamíó wíwapiyariño nibiri re uriñinigini, “Joxi ‘Niaíwí Gorixoyáonirini.’ yaiwinariñipi nepa eñánáyí, aiwá niri nání ‘Síná tiyí aiwá oimónini.’ rei.” uríagi aí ⁴Jisaso re uriñinigini, “Oweoi, wí emiméini. Gorixoyá Bikwíyo dání ríwamiñí re eánini, ‘Áamá aiwá nánini diñí nimorínáyí wí diñí meapaxí menini. Xwiýá Gorixo riñíyí niyoni diñí níkwírorínáyí ayíni diñí meapaxífrini.’ Ríwamiñí e niriniri eánini.” uriñinigini. ⁵Obo Jisasomi nimeámi Jerusaremi aní Gorixoyá ayá tíñímíni nání nuri aní Gorixo nání ridiyowá yariñíwámi rikwíyo seáyi e nurárárimáná ⁶re uriñinigini, “Joxi ‘Niaíwí Gorixoyáonirini.’ yaiwinariñipi nepa eñánáyí, Gorixoyá Bikwíyo dání ríwamiñí re niriniri eániñagi nání ‘Gorixo joxi sikwí síñáyo pírf uyikímí inirixiniri xegí aññajowa awí nírooro íá rixepíri nání uowáriníñoi.’ niriniri eániñagi nání anani mímí nimawiri xeamoi.” uríagi aí ⁷Jisaso re uriñinigini, “Xwiýá joxi miñí nírori rípi eániñagi aiwi xwiýá rípi eni niriniri eánini, ‘Negí Gorixo nepa eñí neániri epaxoríaniri iwamíó miwíwapiyipani.’ eni riniñagi nání nioni wí e emiméini.” uriñinigini. ⁸Ámi Obo dífwi miñí seáyimi wiápinimeañí bimi nání nimeámi niyiri aní nání xwíá ríri nírimíni ikwíróniñíyo síwá níwiri xegí amipí áamá níwiniróná ayá síwí nurori nimeapaxí wimónariñipi eni síwá níwiri ⁹re uriñinigini, “Joxi xwíáyo nípkínimeari símanñwíyóniñí ninuríniri nioni nání yayí seáyimi nime. E níánáyí, amipí síwá síá tiyí nípini siapímíni.” uráná ¹⁰Jisaso re uriñinigini, “Setenoxi píni níniwiárimi éf ui. Xwiýá rípi ‘Áminá Gorixo nánini xwíáyo nípkínimearo yayí seáyimi umero segí amipí ‘Ñwíáxini.’ riniñíyí emi nímero síwí oyá nánini diñí ikwírooro érixini.’ riniñagi nání joxi nírfpa wí emiméini.” uríagi ¹¹Obo píni níwiárimi úáná aññají wa níbiro arirá wigíawixini.

¹²Jisaso áamá wa Jono wayí numeaia wariño nání re rariñagiá “Omi rixa íá níxero gwí añíyo ñwirárfárinini.” rariñagiá o aríá e níwimo Gariri

piropenisíyo nání nuri niḡwearíná ¹³ aḡí Nasareti xío xwé iwiaroḡe píní niwíárimí nuri aḡí xegí yoí Kapaneamiyi riniḡíyo —Aḡí api ipí Gariri t́ní ikwíroníni. Seburano t́ní Napítaraio t́ní awaúyá íwíárfawé ḡweaagíerini. E nání nuri ḡweaḡiniginí. ¹⁴ Ayí ripí nánirini. Gorixoyá xwiyíá wíá rókiamoagí Aisaiayoí riniḡo xwiyíá niwuriyiri ríwamiḡí re eaárinḡirini, ¹⁵ “Xwíá Seburanoyá íwíárfawé t́ní Napítaraioyá íwíárfawé t́ní eḡíná ḡweaagíe ipí t́ḡíminí t́ní iniigí Jodani rapáyo jíariwámi dání t́ní xwíá Gariri imóniḡíminí émáyí ḡweagíe, ¹⁶ ámá oxí apixí e ḡweagíáyí ńní Gorixomi muxídarinḡagía nání síá yiniḡíminíḡí ḡweagíe rixa wíá xwé bi óníagí winiḡíawixini. Ayí apaxí mé pearinḡagía nání íkwapiḡíniḡí umeaariḡíyo rixa wíá wókímixini.” Ríwamiḡí e niriḡiri eániḡípi xixeni imónini nání Jisaso wíániḡí imóniḡo e nání nuri ḡweaagíri.

Ámá wiepisariḡí imónipíri nání wirimeaemenḡí nánirini.

¹⁷ O aḡí e nání nuri ḡweaé dání wáí re urimenḡiniginí, “Gorixo xwioxíyo mimeámí niseairi pírániḡí seameni aḡwi ayo eḡagi nání segí íwí yariḡíápi ríwíminí nimamoro saniḡí nimóniro ḡweáírixini.” nurimeri ¹⁸ ipí Gariri imaniḡpá t́ní nipuríná siḡwí winiḡiniginí. Xiráxogwá waú —Xiráo xegí yoí Saimonorini. O xegí yoí ámi bi Pitaorini. Xogwáo Adiruorini. Agwiaú egí omiḡí peyí ápearigííwaú eḡagi nání ubení peyí nání ipíyo mamówararinḡagí Jisaso e niwiniḡi ¹⁹ re urinḡiniginí, “Agwiagwí nixídípiyi. Peyí nání yariḡípa ámá nioni nixídípiríáyí eni axípi e wirimeapísi nání eaíwapiyimíni.” uríagi ²⁰ agwiaú ubení apaxí mé e nitimi ríwíyo uxídíḡisixini. ²¹ O e dání nuríná siḡwí winiḡiniginí. Ámi xiráxogwá waú —Agwiaú Sebediomi xewaxowaúriḡi. Wíó Jemisorini. Wíó xogwáo Jonorini. Agwiaú xano t́ní ewéyo niḡweámáná wigí ubení aríkíniḡagi pírániḡí yadiripínarinḡagía Jisaso e niwiniḡi ríaiwá “Nixídípiyi.” uráná ²² agwiaú eni aḡíni egí ewé t́ní xanomi t́ní píní niwíárimí nayoari númi uxídíḡisixini.

Jisaso wáí urimeri simixíyo naḡí imiximeri eḡí nánirini.

²³ Jisaso Gariri piropenisíyo ami ami nimeríná xegí Judayíyá rotú aḡíyo dání uréwapiyemeri xwiyíá yayí winipaxípi —Api Gorixo xwioxíyo mimeámí neri pírániḡí umeḡweaniápi nání riniḡípirini. Api wáí urimeri ámá pí pí simixí yariḡíáyo t́ní uraní xixegíni imóniḡíáyo t́ní naḡí imiximeri yaríná ²⁴ o yariḡípi nání yaní niwéa nuri Siria piropenisíyo ḡweagíáyí ńní aría niwíáriro nání wigí ámá simixí xixegíni yariḡíáyí t́ní ríniḡí xixegíni winariḡíáyí t́ní ámá imió diḡí xixéroariḡíyí t́ní xóxwí yariḡíáyí t́ní eḡí siwímí yariḡíáyí t́ní o t́ḡí e nání nimeámi báná o pírániḡí wimixiyarinḡagi nání ²⁵ ámá oxí apixí obaxí Gariri piropenisíyo dánḡíyí t́ní Dekaporisi piropenisíyo dánḡíyí t́ní Judia piropenisíyo dánḡíyí t́ní wigí aḡí xwé Jerusaremi dánḡíyí t́ní iniigí Jodani rapáyo jíariwáminí dánḡíyí t́ní epíroyí nero omi númi uxídíḡíawixini.

Xwiyía Jisaso díwíyo dáni uréwapiyíñipi nánirini.

5 ¹Jisaso áamá oxí apixí niaíwí obaxí o tíñj e nání bimiariñagía niwiniri díwí miñíyo nání niyoari éf niñweari xegí wiepisariñíyí xío tíñj e nání báná ²o nuréwapiya nuri re uriñinigini, ³“Áamá giyí giyíné ‘Nioni nigípi apánirini.’ miripa éfáyíné, ‘Áamá arirá oneaipoyi.’ yaiwiarigíáyíné, Gorixo xwioxíyo mimeámí niseairi pírániñj seameñweaníá eñagi nání yayí seainipaxíyínerini. ⁴Áamá giyí giyíné, ñwí eaniri yarigíáyíné, Gorixo miñj ikiñwí seamiriniá eñagi nání yayí seainipaxíyínerini. ⁵Áamá giyí giyíné, íwí mé nirimaxiniro saniñj imónigíáyíné, Gorixo xwioxíyo mimeámí neri seameñweaníe dání xwía niríni segí imóniniá eñagi nání yayí seainipaxíyínerini. ⁶Áamá giyí giyíné, aiwá nání agwí seairi iniigí nání seainiri yariñpa ríá mikiró pírániñj yarigíá ayí nánñiñj niseaimóniriná Gorixo anani xixeni seaininá eñagi nání yayí seainipaxíyínerini. ⁷Áamá giyí giyíné, áamá wíyo wá wianarigíáyíné, Gorixo eni wá seawianiniá eñagi nání yayí seainipaxíyínerini. ⁸Áamá giyí giyíné, áamá siñwí anigé dánirani, segípi úfámi dánirani, diñj ná bini nimoro axípini yarigíáyíné, Gorixo xewaniño siwá seaininiá eñagi nání yayí seainipaxíyínerini. ⁹Áamá giyí giyíné, áamá mixí inaríná nuro piyíá wírarigíáyíné, Gorixo ayí nání ‘Gí niaíwixini.’ riníá eñagi nání yayí seainipaxíyínerini. ¹⁰Áamá giyí giyíné, wé róniñj Gorixo e éfrixiniri wimónariñipi xídariñagía nání xeaniñj seaikárfáyíné, o xwioxíyo mimeámí niseairi pírániñj seameñweaníá eñagi nání yayí seainipaxíyínerini. ¹¹Áamá giyí giyíné, nioni nixídariñagía nání ikayíwí seariro xeaniñj seaikáriro pí pí xwiyíá yapí seaxekwímoro seaiarínáyí, yayí seainipaxíyínerini. ¹²Eñiná wía rókiamoagiáwami xeaniñj niwikára wagiápa axípi seyíné eni niseaikára warínáyí, seyíné aññami nipeyiríná Gorixo yayí niseaimori amipí ayá rimixariñipi seaiapiniá eñagi nání yayí seainipaxíyínerini.

Saxí tíni wía tíni nání uriñj nánirini.

¹³“Saxí aiwáyo nimori ninirínáyí awíí yariñpa seyíné nioni searariñáyo pírániñj ninixídiróná áamá niyoni eni niwíwapiyiro saxí awíí yariñpa axipiniñj wimixírixini. Saxí awíí yariñipi nipuri rixa uráwiniñj imóniñánáyí arire éaná ámi awíí imóniniñoi? Oweoi, amipí wí imixipaxí mimóniñagi nání óf e emi miwíarómóáná áamá xwiriñwí osixayarigíáriini. Seyíné nioni searariñáyo niniwiaíkirínáyí, saxí rixa uráwiniñj imóniñipi emi moarigíápa Gorixo eni axípi emi e seamoníáriini. ¹⁴Seyíné áamá Gorixomi xídipíría nání uyíwí nimixároro wíániñj uyamopíríáriini. Añj díwí miñíyo ikwíroniñipiñiñj ínimi mimóní eñipi yapí seyíné eni nioni pírániñj ninixídirónáyí, áamá niyoni siñáni e wimónipíríáriini. ¹⁵Áamá ramixí nimixároro sixí wá nimearo sixí ikwaseáararigíámani.

Nimixároro seáyi e ikwiaŋwíyo ŋwirárararigiárini. Seáyi e tánáyí áamá aŋíyo ínimi ŋweagiá niyoni wía wókiariŋirini. ¹⁶Ramixí seáyi e ikwiáraráná áamá niyoni wía wókiariŋipániŋi seyiné eni áamá siŋwíyo dáni wé róniŋi imóniro áamáyo arirá wiro nerónáyí áamá siŋwí niseanro ‘Ayí Gorixomi nixídiro náni ría yariŋoi?’ niyaiwiro omi seáyi e umepíríárini.

Ŋwí ikaxí niriniri eániŋipi náni riŋi nánirini.

¹⁷Seyiné nioni náni ‘O Gorixoyá ŋwí ikaxí Moseso niriniri eaŋipi tñi wía rókiamoagiáwa niriŋo eagiápi tñi eni xwía iweni náni biŋirini.’ miniaiwipani. Xwía iweni náni mibí amipí niriniri eániŋipi sini xixeni imóniníá náni biŋárinini. ¹⁸Aga nepa searariŋini. Xwíarí tñi aŋína tñi sini eŋánáyí ŋwí ikaxí niriniri eániŋi nipini sini xixeni mimónipa eŋánáyí ná bini onimiápi riniŋi api aiwi xwía iweníámani. ¹⁹Áamá giyí giyíné ŋwí ikaxí niriniri eániŋipi bi náni ‘Xwémani. Xwiyá nimeariŋipaxímani.’ niyaiwiro ogámí nero áamá wí eni axípi ogámí epíri náni niwíwapiyirínáyí, Gorixo xwioxíyo mimeámí neri seameŋweaníná e yariŋíáyí náni ‘Siyikwípiániŋi imónigiáyírinini.’ ripíríárini. Giyí giyíné ŋwí ikaxí niriniri eániŋipi xixeni axípi nero áamá wí eni axípi epíri náni niwíwapiyirínáyí, Gorixo xwioxíyo mimeámí neri píraníŋi seameŋweaníná e yariŋíáyí náni ‘Áamá xwé mamadríxániŋi imónigiáyírinini.’ ripíríárini. ²⁰‘Seyiné Parisiowa tñi ŋwí ikaxí eániŋipi mewegiáwa tñi “None ŋwí ikaxí eániŋipimi nixídirane e nerínáyí wé róniŋi yariŋwini.” yaiwinariŋíápi mimúropa nerínáyí, Gorixo xwioxíyo mimeámí niseairi seameŋweaníe wí ŋweapíríámani.’ searariŋini.

Wikí wónarigiá náni uréwapiyiniŋi nánirini.

²¹“Eŋíná Moseso segi seáriawéyo ŋwí ikaxí nuriríná ‘Niwiápínimeari áamá mipikipani. Áamá giyí e nerínáyí xwirixí seamepíríárini.’ uriŋipi seyiné rixa aría niwiro niŋíá imóniŋoi. ²²Ayí naŋi neri aiwi agwi nioni ámi bi nipikwini naŋi seáyi e nimixiri re searariŋini, ‘Áamá giyí xegí áamá imónigiá wo náni wikí niwóniri mixí nurirínáyí aŋi e dáni xwirixí mepíríárini. Giyí xegí áamá imónigiá womi “Diŋi mayí roxini.” nurirínáyí opisí aŋíyo dáni xwirixí mepíríárini. Giyí xegí áamá imónigiá womi “Majimajíá ikárinariŋi roxini.” nurirínáyí xewaníŋo xwiyá nimeáriniri ríá aniŋi wearíŋíyo ikeáaripíríárini.’ searariŋini. ²³Ayináni Gorixo náni aiwá peaxí timiniri neríná diŋi re sináná ‘Gí áamá imónigiáyí wo sini xwiyá nimeariŋipaxí imónini.’ diŋi e sinánáyí ²⁴aiwá peaxí tariŋíe midániŋi e nitimi nuri omi xámi piyíá niwírinimáná ámi ríwíyo dáni nibiri dixí aiwá peaxí tírini. ²⁵Seyiné woxi áamá wo tñi xwiyá meariŋipaxí imóniŋánáyí xwirixíyo riwárinini náni sini ói e o tñi nuríná aŋíni piyíá wíriniríini. E mepa nerínáyí, o xwirixíyo riwáraná

gapimaní xwirixí meariŋo e dání porisowa tñŋí e riwáraná awa gwí aŋŋyo riwáripíríáriní. ²⁶ Aga nepa re searariŋini, ‘Joxí íwí enŋíyí nání nigwí íwí enŋípi tñni xixeni niroari miwipa nerínáyí, aniŋŋí e ŋweaŋáná wí píní niriwiáŋiro riwáramopaxí mimónini.’ searariŋini.

Íwí inarigiápi nání uréwapiyŋŋí nánirini.

²⁷ “Enŋíná Moseso segí seáŋíawéyo ŋwí ikaxí nuriríná ríwamiŋŋí neari ‘Meánigíipagwí áamá wí tñni íwí minípani.’ nuriri eaŋŋípi seyíné aría niwiro niŋŋá imóniŋoi. ²⁸ Ayí naŋŋí neri aiwi agwi ámi bi nípikwini naŋŋí seáyi e nimixiri re searariŋini, ‘Áamá nñni giyí giyí apixí wími “Nioni í tñni íwí inípxonirini.” yaiwiminiri nání siŋwí íwí niwinirínáyí, o rixa diŋŋí tñni íwí inariŋii.’ searariŋini.” uriŋinigini.

²⁹ O áamá ayí diŋŋí oeyíronípoyniriri re uriŋinigini, “Segí siŋwí wiyŋŋi ‘íwí api ei.’ riránáyí siŋwí e riríŋŋi niyori emi moríini. E ninirónáyí ríniŋŋí xwé niseainiriŋŋí aiwi Gorixo ría aniŋŋí weariŋŋíyo seakeaáráná ríniŋŋí seainiminiri enŋíŋŋí seaininíámani. Siŋwí wiyini anipá nimónirínáyí ayí naŋŋí meŋagi aiwi joxi sini siŋŋí uríá eŋagi nání ayí ananirini. ³⁰ Dixí wé onamiŋú tñni íwí nání íeapá sinánáyí ‘Gorixo gí wará niríni ría aniŋŋí weariŋŋíyo nikaáriniŋŋi.’ niyaiwiri wéú niwákwíniri emi moríini. E ninirínáyí ríniŋŋí xwé nisiniri aiwi ríniŋŋí Gorixo ría aniŋŋí weariŋŋíyo sikaáráná siniminiri enŋíŋŋí sininíámani. Wé wúni niwákwínirínáyí ayí naŋŋí meŋagi aiwi joxi sini siŋŋí uríá eŋagi nání ayí ananirini.

Apixí emi moarigiápi nání uréwapiyŋŋí nánirini.

³¹ “Enŋíná Moseso ŋwí ikaxí niriri ríwamiŋŋí re eaŋŋinigini, ‘Áamá go go xegí xieŋími “Emi omómni.” niyaiwirínáyí áamá nñni “O apixími rixa emi moŋoi.” yaiwipíri nání payí wina nimixiri mini wiowáŋíwinigini.’ Moseso ríwamiŋŋí naŋŋí e niriri eaŋŋí aiwi ³² agwi nioni ámi bi nípikwini naŋŋí seáyi e nimixiri re searariŋini, ‘Go go xegí xieŋí xámi meaŋŋí áamá wo tñni íwí bi minaríná emi nimorínáyí í áamá womi nimeániri aí xámi nimeari emi moŋoyá diŋŋíyo dání íwí inariŋii. Go go apixí wa nimearo emi mogími nimearínáyí ayí eni í tñni íwí inariŋii.’ searariŋini.

Síŋá tñŋí e dániniŋŋí rarigiápi nání uréwapiyŋŋí nánirini.

³³ “Enŋíná Moseso segí seáŋíawéyo ŋwí ikaxí nuriríná ríwamiŋŋí ripi neari re uriŋinigini, ‘Seyíné woxi woxi síŋáyo árixá niwiri “Síŋá ro ŋweaŋe dání rirariŋini.” nuriríná yapí bi murípani. E nuriríná Gorixoyá siŋwíyo dání axípi éirixini.’ Ríwamiŋŋí e nuriri eaŋŋípi seyíné aría niwiro niŋŋá nimóniri aiwi ³⁴⁻³⁵ agwi nioni ámi bi nípikwini naŋŋí seáyi e nimixiri re searariŋini, ‘Xwiyíá bi niriríná síŋá tñŋí e dání miripa éirixini. Aŋŋína ayí Gorixoyá íkwiaŋwí éí ŋweani nání imóniŋagi nání e dání xwiyíá “E rirariŋini.” miripa éirixini. Xwíáŋí eni ayí Gorixoyá sikwí tñni xwiriŋwí

nosaxiri ηweañíri enagi náni xwíá riri ege dáni xwiýá “E rirariñini.” miripa érixini. Jerusaremi ayí aní mixí ináyí Gorixoyá enagi náni aní apimi dáni eni muripa érixini. ³⁶Dixí ñiñyo dáni dáá wiýi pípió ηñí weri apía wení weri epaxí mimóniñagi náni “Gí miñí riyimi dáni rirariñini.” wí muripa érixini. ³⁷Píne nuriríná sa “Oyi.” uriri “Oweoi.” uriri xixeni érixini. Wíni nira nuri “Síñá tí tíñí e dáni rirariñini.” nurirínáyí, rixa Oboýá ñiñyo dáni yariñoi.’ searariñini.

Xixe eánarigiápi náni uriñí nánirini.

³⁸“Eníá Moseso segí seáriáwéyo ηwí ikaxí nuriríná ríwamiñí neari re uriñipi, ‘Ámá wa seyíneyá womi siñwí píri seauyikíáná seyíne eni wayá womi siñwí píri uyikiríini. Wa seyíneyá womi mañí píri seayíreááná seyíne eni wayá womi píri uyírearíini.’ nuriri eañipi seyíne aría niwiro niñjá imóniñoi. ³⁹Ayí nañí neri aiwi agwi nioni ámi bi nipikwini nañí seáyi e nimixiri re searariñini, ‘Mixí seyíne seaáná seyíne xixe miwipani. Ámá wo maripiñwíyo iwaní reááná xíomi eni meá ámi bi tíni reáminiri yaríná xe oneaniri maripiñwí midáni wimixiríini. ⁴⁰Ámá wo xwirixí nirimeri dixí soría rirápininiri yaríná xío xe onirápiniri siñwí niwini iyíá nipáni meú eni mini wiríini. ⁴¹Porisí worani, gapimaní worani, “Ñigwí náni maría, joxí sañí ninirápiri nigí sañí ripi nimeámi aní apimi náni nuii.” riráná “Ñigwí meámi imori nimeámi uminiréini?” miyaiwipani. Aní xío riríipimi niremori aiwi “Ámi aní bimí náni anani nimeámi oruimini.” uriríini. ⁴²Ámá wo amipí náni xegí ñiñí niyaiwiri rixiñí riríipiyí sa mini wiríini. Ámá wo “Amipí wí nioniyá ríwéná siapimía náni joxiyá niapei.” riránáyí “Menini.” muripani. Sa mini wiríini.’ searariñini.

“Xeñwí imónigiáyí náni ñiñí sipí seaíwinigini.” uréwapiyiñí nánirini.

⁴³“Eníá Moseso segí seáriáwéyo ηwí ikaxí nuriríná ríwamiñí neari re uriñipi, ‘Ámá dixiyoyí ñiñí sipí síwinigini.’ nuriri eañipi seyíne aría niwiro niñjá imóniñoi. Xwiýá ripi, segí ámináowa rigíápi ‘Xepixepá rónigiáyí tíni wikí tíni iniríini.’ rigíápi eni seyíne rixa niñjá imóniñoi. ⁴⁴Ayí e neri aiwi nioni ámi bi nipikwini nañí seáyi e nimixiri re searariñini, ‘Dixí xepixepá rónigiáyí náni ñiñí sipí síwinigini. Ámá xeaniñí seaikárarigiáyo nañí wí owímeaniri Gorixomi rixiñí uriríini. ⁴⁵Seyíne e nerínáyí, nepa niaíwí segí ápo Gorixoyá niaíwíyínéniñí imóniñoi.’ searariñini. Ayí ripi náni searariñini. Xewaniñoyá ñiñí tíni ámá sipí ayo tíni nañí ayo tíni sogwí wanariñirini. Iniá eni oyá ñiñí tíni wé rónigíá ayo tíni wé mirónigíá ayo tíni eaariñirini. O ‘Ámá sipí ayo aiwi iniá wearí sogwí waniri mepa oeni.’ yaiwariñimani. Seyíne o xegí niaíwíyíné enagi náni ámá segíyo tíni xepixepá rónigiáyo tíni aiwi Gorixo yariñipa axípi wéyo meríini. ⁴⁶Seyíne ámá ñiñí sixí seayigíáyoni

diñjí sipí niwirónáyí, ‘Nene e yariñagwi nání Gorixo yayí ninearí amípí ayá tñjí bi neaiapiníárini.’ riyaiwariñoi? Oweoi! Ámá takisí nání nigwí ninearápiríná xixeni minearápi bi íwí nearáparigíáwa axípi diñjí sixí uyigíáyoni diñjí sipí niwiro nání ‘Gorixo amípí ayá tñjí bi mini winíárini.’ yaiwariñwárani? Oweoi! ⁴⁷Ámá dixíyoni ói e siñwí niwiniri yayí niwirínáyí, ‘Ámá wí yariñgíáyí tñi xixeni mimóní múroariñwini.’ riyaiwinariñoi? Oweoi! Ámá Gorixomi mixídipa yariñgíáyí aí axípi seyíné yariñgápa eni e yariñagía nání e miyaiwipani. ⁴⁸Ayináni segí séno, añínami ñweaño wé róniñjí nimóniri ámá nañjí ayo tñi sipí ayo tñi aí diñjí sipí niwiri nañjí wiaríñjpa seyíné eni axípi e wiríini.

Arirá niwiríná epaxípi nání uréwapiyíñjí nánirini.

6 ¹“Seyíné ‘Nañjí owimini.’ niyaiwiríná ámá siñwí niseanero weyí seamepíri nání wigí siñwí anigíe dání miwipani. Seyíné e nerónáyí, séno, añínami ñweaño ríwéná ayá tñjí wí seaiapiníámáni. ²Ayináni ‘Uyípeayíyo arirá niwiri ripi mini owimini.’ niyaiwirínáyí, ámá sipí eri nañjí eri yariñgíáyí ámá siñwí ninanero weyí onimépayiniri wigí ámá womi ‘Pékákí nira xámi nimeai.’ nuriri ói erani, rotú añjyorani, yariñgápa mepa érixini. Nioni nepa searariñjini. Ámá weyí numerínáyí ayí wigí wimónariñjipi rixa mearíñagía nání ríwéná Gorixo ayá tñjí bi wiminiri eñjipi meapírámani. ³⁻⁴‘Uyípeayíyo arirá niwiri ripi mini owimini.’ niyaiwirínáyí, wé núkaúni tñi miwipani. Ná wúni tñi ínimi ikwisórixini. Ínimi e niwirínáyí, ápo Gorixo siñwí niseaniri ríwéná yayí niseairi amípí ayá tñjí xío seaiapiminiri yariñjipi anani niseaiapiníárini.

Gorixomi rixiñjí nuriríná urípaxípi nání uréwapiyíñjí nánirini.

⁵“Seyíné ripi eni Gorixomi xwiýiá ririmí niwiríná ámá sipí riri nañjí riri yariñgíáyí ámá siñwí ninanero weyí onimépayiniri ge ge ámá obaxí tñjí e rotú añjyorani, ói osisagwíyorani, éi niroro Gorixomi xwiýiá ririmí wiaríñgápa mepa érixini. Nioni nepa searariñjini. E yaríná ámá siñwí niwinero weyí numerínáyí ayí wigí wimónariñjipi rixa mearíñagía nání ríwéná Gorixo ayá tñjí bi wiminiri eñjipi meapírámani. ⁶Seyíné Gorixomi xwiýiá ririmí niwiríná re érixini. Dixí añjyo ínimi nipáwiri ówañjí niyárimáná dixí ápomí ínimi dání ririmí wiríini. Seyíné ínimi dání nerínáyí, Gorixo siñwí niseaniri ríwéná amípí ayá tñjí xío seaiapiníápi anani niseaiapiníárini. ⁷Gorixomi xwiýiá ririmí niwiríná ámá Gorixo nání majíáyí omi xwiýiá ririmí niwiríná ayá wí nira nuro ‘Nene e nerínáyí, Gorixo aría neainiñoi.’ niyaiwiro yariñgápa mepa érixini. ⁸Seyíné amípí wí nání díwí nikeamóniro sini segí séno Gorixomi yariñjí miwipa eñáná o rixa xámi niñjía imóniñagi nání Gorixo nání majíáyí yariñjí ayá wí niwia nuróná yariñgápa mepa érixini. ⁹Gorixomi xwiýiá ririmí niwiríná re urírixini, ‘Negí ápoxini, añínami ñweañoxini, “Ámá

náni joxini ηwíáoxi enagi náni wéyo orimépoyi.” neaimónarini. ¹⁰“Joxi xwioxíyo mimeámí níneari neameηwearía náni oimónini.” neaimónarini. Anínami amipí joxi “E oépoyi.” simónariñipi náni yarigíapa nene “Xwía rirími eni axípi e oyaneyi.” neaimónarini. ¹¹Agwi síá riyi aiwá nani náni neaiapei. ¹²Ámá nene íwí neaíáyo yokwarimí wiariηwápa joxi eni nene yokwarimí neaii. ¹³Ámá wí ení eánigíárfaniri iwamíó owíwapiyípyoiniri siηwí mineanipani. Obo mimíwiaíki neainiginiri awí neameηweárixini. [Xwioxíyo mimeámí níneari píraníñí neameηweapaxoxi imóniri ení sixí eánipaxoxi imóniri ikínipaxoxi imóniri enjoxi, íníná ayí joxini enagi náni rariñini. “E e imóníwinigini.” neaimónarini.] Gorixomi rixiñí nuriríná e urírixini. ¹⁴Seyíné ámá wí íwí seaíáyo yokwarimí wiánáyí, séno Gorixo, anínami ηweaηo seyínéyá eni yokwarimí niseaiinígoi. ¹⁵E neri aí íwí seaíáyo yokwarimí miwipa éánáyí, segí séno eni seyínéyá yokwarimí seainimenígoi.

Aiwá ηwía niηwiráriniríná epaxípi náni uréwapiyíñí nánirini.

¹⁶“Seyíné aiwá ηwía niηwiráriniríná ámá sipí ero nañí ero yarigíáyí símí niyimiro yarigíápa mepa érixini. Ayí ámá siηwí niraniro símimaní siyó wejáná ayí re yaiwipíri ‘O aiwá ηwía ηwirárinígoríani?’ oyaiwípyoiniri emearigíápa mepa érixini. Nioni nepa re searariñini, ‘Ayí ámá weyí onimépoyiniri e nero wigí wimónariñipi rixa ámá weyí uméagía náni ayá tíñí ríwéná wiminiri enípi wí meapíríamani.’ searariñini. ¹⁷⁻¹⁸Seyíné aiwá ηwía niηwiráriniríná ámá ‘O aiwá ηwía miηweaηorini.’ yaiwipíri náni díá komixí niniro símimaníyo wayí niróniro érixini. Seyíné yumí e nerínáyí, segí séno Gorixo siηwí niseaniri ríwéná yayí niseairi ayá tíñipi bi mini niseaiapiníarini.

Amipí ayá tíñipi anínami otípyoiniri uréwapiyíñí nánirini.

¹⁹“Xwía tíyo amipí ayá rimixariñipi wí ípikwiyí xwiría ikixeri wí nigiyí kiri wí riweaxwí imóniro níkwiri nipáwiro íwí mearo epaxí enagi náni wíni wíni náni diñí nimoro nimeaayiro mitipa érixini. ²⁰Seyíné Gorixoyá siηwíyo dáni wé róníñí nimóniro yumí ámáyo arirá niwirínáyí ayí seyíné amipí ayá tíñipi anínami awí eámeámíniñí yáranígoi. E ípikwiyí wí xwiría ikixeri nigiyí kiri riweaxwí imóniro níkwiro nipáwiro íwí mearo epaxí mimónini. ²¹Segí amipí nañí ayá rimixarigíápi xwía tíyo wejánáyí ayí xwía tíyo náni diñí mopíríarini. Anínami wejánáyí ayí e náni diñí mopíríarini.

“Siηwí uyíwíniñí imónini.” uréwapiyíñí nánirini.

²²“Segí siηwí ayí uyíwíniñí imónini. Siηwí tíni píraníñí naniro wé róníñí nerónáyí diñí nañini aumaúmí niniro segí xwioxíyo wíániñí seaókiarini. ²³E neri aí segí siηwíyo dáni íwí náni nanirónáyí segí diñí

xwioxíyo síaníñí yimixárinariñoi. Dixí xwioxíyo wáñíñí óñíñípi síá niyimixirínáyí ayí aga síá xaíwíñíñí yimixárinariñoi.

Aiwá tñi aikí tñi nání ududí winariñí nání uréwapiyiñí nánirini.

²⁴“Ámá wo áamá waúyá xináñíñí nimóniri omiñí wiipaxí menini. E nerínáyí wíomi ñíñí sixí nuyiri wíomi ñíñí peá nimori neri wíomi píráñíñí ayá tñi nixídirí wíomi peayí niwianiri eniñoi. Seyíné nigwíyíyá omiñí wiariñíñíñí nimóniro ‘Nigwí wí minimúropa oeni.’ niyaiwirínáyí, Gorixoyá omiñí wiariñí woxíníñí imónipaxí menini. ²⁵Nioni re searariñini, ‘Arige píráñíñí ñweaniréwini?’ miripa nero aiwá tñi iniigí tñi nipíri nání ududí mepa ero iyíá aikí amipí waráyo yínipíri nání ududí mepa ero érixini.’ searariñini. Ayí ripi nání searariñini. Segí ñíñí jáyí aiwá nání moarigiáyo seáyí e imóniri wará jáyí eni aikí yinarigiáyo seáyí e imóniri enagi nání searariñini. ²⁶Seyíné ñíñí nání ñíñí mópoyi. Ñíñí aiwá iwíá uriri aiwá miri añíyo awí eámeámí yárirí mepa yarigiá aiwi segí séno Gorixo, añínami ñweaño nimeri aiwá mini wiariñirini. Seyíné ‘Ñjowa neamúroñoi.’ riyaiwariñoi? Oweoi. ²⁷Seyíné woxi, ‘Sepiá ámi bi oimónimini.’ niyaiwiri ududí éoxi sepiá ámi bi imónariñirani? Oweoi. ²⁸Seyíné api aí wí mepaxí imóniñagía nání aikí nání pí nání ududí yariñoi? Ará adowayí amíyo enínáina nání ñíñí mópoyi. Aníñí miní iyíá óí eari aikí yiri yariñirani? Oweoi. ²⁹E neri aí nioni re searariñini, ‘Eníná negí mixí ináyí Soromono níkníri okiyíá niníísáná adowayí api tñi xixeni mimóniñigini.’ searariñini. ³⁰Gorixo adowayí tñi aráyo —Ará agwi eníyo anani niyoaro síá wiyimi ríá ikeááripíríárini.” uríñigini. Wiepisariñiyí “Gorixo ará nání ayá síwí muroarini.” oyaiwípoyniri Jisaso e nuriri re uríñigini, “Oxí apixíyíné, Gorixomi ñíñí onimiápi ikwíroarigiáyíñé Gorixo adowayí tñi aráyo okiyíáñíñí yariñagi nání soyíné eni añipaxí aikí e seayíriniárini. ³¹Aiwá tñi iniigí tñi pí naniréwiniri ududí mepani. Aikí eni pí yinaniréwiniri ududí mepani. ³²Émáyí, áamá Gorixo nání majíáyí api nipíni nání añíñí miní nero meañiro yarigiárini. E neri aí segí séno, añínami ñweaño seyíné api nipíni nání seainaríná o rixa níjía imóniñagi nání seyíné axípi e mepa érixini. ³³Amipí api meáminiri nání mepa eri ‘Wé róníñí Gorixo yariñípi nioni oimónimini.’ niyaiwiri eri Gorixo xwioxíyo mímeámí nineairi neameñweané páwiri nání amipí xío wimónariñípi eri nerínáyí, Gorixo anani api nipíni nisiiníárini. ³⁴Ayináni ‘Wíáríná aikí pí yínirane aiwá pí nírane yaníwáráni?’ niyaiwiro ududí mepani. E neríná ududí síá wiyimi epíríáyí tñi nawíni axínáni níkumixiro ayá wí ududí yariñoi.

Píne meararigiá nání uréwapiyiñí nánirini.

7 ¹“Gorixo seyíné eni xwíyíá seamearinigini áamá wíyo xwíyíá mumearipa érixini. ²Seyíné áamá wíyo xwíyíá umeararigiápa

Gorixo eni xwiyá seameariníáriní. Seyíné ríá tíńjí numearirínáyí, Gorixo eni ríá tíńjí seameariníáriní. ³Seyíné ‘fwi amípí e mepani.’ urigítápimi dání Gorixo apimi dání xwirixí seameníáriní. Joxiyá fwi yarińjípí sińwíyo íríónińjí weńagi aiwi misékínarińaganińjí dixí ámá imónińjí wo fwi onimiápí yarińjípí siyikwínińjí ńweańagi pí náni winarińjírini? ⁴Íkáá írío dixí sińwíyo weńáná dixí ámá imónińjí woyá sińwíyo siyikwí ńweańagi niwiniro arire ‘Orimeámini.’ urarińjírini? ⁵Joxi nanj éri sipí éri yarińjoxini, joxiyá eni írío urí weńjípí xámi emi nimamónimáná sińwí píránińjí niwiniri oyá sińwíyo weńjípí eni anani emi umamoríini. ⁶“Segí memiá odipí xwirińwí osaxipírixiniri odipí yarińje xwíá e mitarigítapa xwiyá nanj Gorixoyá eni ámá ‘Ayí pí pínéřiani?’ yaiwiarigítáyí aríá niwiri aí ríwímini mamopírixiniri muripa éřixini. Síwí síwí nearopírixiniri amípí nanj mini miwiarigítapa xwiyá Gorixoyá ámá aríá miwířáyí xeanińjí seaiapírixiniri muripa éřixini.

Gorixomi rixińjí urířixini níni uréwapiyińjí nánirini.

⁷“Seyíné Gorixomi yarińjí niwiro segí seaimónarińjípí náni rixińjí uráná o anani mini seiapiníáriní. Rixińjí nuriri amípí wí o tíńjí e dání píánińjí neríná anani meapíríáriní. Rixińjí nuriri wáí e nírómáná wakwí óránánińjí éáná Gorixo anani aríá nisiri ańj ówanjinińjí seařkwiiiníáriní. ⁸Ayí ripi náni seararińjini. Ámá níni giyí giyí yarińjí niwiri wigí wimónarińjípí náni Gorixomi rixińjí nurirínáyí anani meaarigítáriní. Yarińjí niwiri Gorixo tíńjí e dání píánińjí nerínáyí anani meaarigítáriní. Yarińjí niwiri Gorixoyá wáí e éí nírómáná wakwí óránánińjí éáná o anani ańj ówanjinińjí wíkwiiarińjírini. Ayináni anani Gorixomi yarińjí wiayířixini. ⁹Seyíné re éř ńwixapigítáyíiné woxi dixí fwo aiwá náni rixińjí riráná xewwí síńá reńjíyí nimeari umeaiarińjírani? Oweoi! ¹⁰Dixí fwo peyí náni rixińjí riráná sidirí reńjí nimeari umeaiarińjírani? Ayí eni ananimani. ¹¹Seyíné fwi néra warigítáyíiné aiwi segí niaíwí rixińjí searáná amípí awiaxíyí mini wiarigítáriní. E neri aí segí séno, ańjnamí ńweańoyí ańjapaxírini. Giyí giyí rixińjí uráná amípí nanjípí anani mini winigini. ¹²Seyíné ‘Ámá e oneaípoyi.’ niyaiwirínáyí, seyíné ayo eni axípí e wiiríini. ńwí ikaxí Moseso niriri eańjípí tíni xwiyá wíá rókiamoagítawa niriro eagítapi tíni api e rinińagi náni rarińjini.

Íwí inińjíyáú náni uréwapiyińjí nánirini.

¹³⁻¹⁴“Íwí onińgí inińjíyikwínimi páwianiro éřixini. Ayí ripi náni seararińjini. Íwí ríwéná Gorixo xeanińjí winía náni inińjíyí óí xwé inińagi náni ámá obaxí Gorixo náni dińjí mimó ayimi nipáwiro wigí dińjí tíni néra warińjoi. Ayináni seyíné óí Gorixo ríwéná dińjí anińjí íníná ńweapíríá náni seiapinía náni onińgí inińjíyikwínimi páwipírí náni anińjí miní o rińjípimi nixidíro éřixini.

“Ámá íkíániñí imóniñoi.” uréwapiyiñí nánirini.

15 “Mimóní wíá rókiamoarigiáwa wígf diñí íniminiyí síwí sayí sí roariñí yapí nimónimáná aiwi seyíné tíámíni nibiríná sipisipí yapíniñí awayini yarigiápa nimónimi seaímeapíríárini. Ayináni siñwí tñi eríni. 16 Seyíné íkíá nañí wéína niwiniríná ‘Ana nañinarini.’ riro sipí wéína niwiniríná ‘Ana sipínarini.’ riro yarigiápa sipí imóniñí mimóní wíá rókiamoarigiáwa yarigiápi niwiniríná ‘Yapí rineaíwapiyariñoi? Nepa Gorixoyáowamani.’ yaiwírixini. Ámá yapí seyíné seaíwapiyaniro bíáyí ekirikwíniñí imóniñoi. Wainí sogwí ekirikwíyo darigiáarani? Oweoi! Íkíá pikí sogwí eñwixíyo darigiáarani? Oweoi! 17 Ripi eni axípirini. Íkíá nañíyí sogwí nañí wearíñirini. Sipíyí sogwí sipí wearíñirini. 18 Íkíá nañíyí sogwí sipí wepaxí mimónini. Sipíyí sogwí nañí wepaxí mimónini. 19 Íkíá nñi sogwí nañí miwéyí nidikáiro ríá ikeáararigiáari. 20 Ayináni seyíné íkíá sogwíyo niwiniríná niñíá imónarigiápa sipí imóniñí mimóní wíá rókiamoarigiáwa yarigiápi niwiniríná ‘Gorixoyáowamani.’ yaiwírixini.

Gorixo “Joxi náni nioni majíárini.” uriniginiri uréwapiyiñí nánirini.

21 “Ámá Jisasomi “Ámináoxini, Ámináoxini” urarigiá nñi xegí xano, añínami ñweaño xwioxíyo mimeámí neri pírániñí umenñweané páwipíríárini.’ miyaiwipani. Ámá xío wimónariñípi xídarigiá giyí giyí, ayíni nipáwiro ñweapíríárini. 22 Síá Gorixo ámá niyoni mí ómómiximí eníáyimi ámá obaxí re nirayipíríárini, ‘Ámináoxini, Ámináoxini, nene yoí joxiyáyo dáni xwiýá wíá rókiamoagwáari.’ niniriro ‘Yoí joxiyáyo dáni imíó mixí umáinowáragwáari.’ niniriro ‘Yoí joxiyáyo dáni emimí obaxí wíwapiyagwáari.’ niniriro epíríá eñagi aiwi 23 ámá niyíyá siñwí anigé dáni re urimíárini, ‘Seyíné náni nioni niñíá wí mimóniñini. Rikikiríó yarigiáyíné nioni píni niniwiárimi úpoyí.’ urimíárini.

Añí mirarigiáwau náni uréwapiyiñí nánirini.

24 Ámá giyí giyí nioniyá xwiýá ripi aría niniri xixeni e ninixídirínáyí ayí ámá síñá añí nimíríná diñí pírániñí neñwiperi xwíá nimiga niweri síñá piará ínimi yapíniñínami dáni síñá piará añí miriníapi e dáni nikikíróa niyapiri mirariñóniñí imóniñoi. 25 Iníá eari iniigí waxí xwé weapiri ríwipí eri neri aiwi añiwá síñá ínimi yapíniñínami dáni nikikíróga yapíniñagi náni mikwierómioañiginini. 26 Ámá giyí giyí xwiýá nioni rariñápi aría niniro aí xixeni mepa nerínáyí ayí ámá síñá añí nimíríná majimajíá níkariniri inikíyo seáyí e dáni síñá nikikíróa niyapiri miráariñóniñí imóniñoi. 27 Iníá eari iniigí waxí weapiri ríwipí eri yaríná añiwá níkwierónowiri ríwí nira piéroniginini.” Jisaso e nuriri 28-29 xwiýá api nipini rixa nira núisáná eñáná ámá e epíroyí egiáyí o ñwí ikaxí eániñípi mewegíáwa uréwapiyarigiápa muréwapiyí néní tíñóniñí uréwapiyariñagi náni ududí néra ugíawixini.

Peyiyí imóniñí womi nañí imixiñí nánirini.

8 ¹Jisaso nuréwapiyíísaná dñwí miñíyo dání weaparíná oxí apixí niaíwí obaxí númi weaparíná re eñinigini. ²Ámá peyiyí imóniñí wo nibiri niwímeari miñí xwíáyo níkwírori re uriñinigini, “Amináoxini, joxi nioni náni ‘Nañí owimiximíni.’ niyaiwiríná anani nañí nimixípaxoxirini.” uríagi ³Jisaso wé íeapá niwiri seáyi e niwikwiárirí “‘Joxi nañí oimónini.’ nimónarini. Ríxa nañí imónei.” uráná re eñinigini. Peyiyí imóniño nañí imóniagi ⁴Jisaso re uriñinigini, “Joxi nioni nañí simixíáyí náni aminá nuri ámáyo áwaní muripani.” nuriri ámá o Moseso eñiná ñwí ikaxí ragípi mé ámáyo xewaníño áwaní nura emeniñiniri e nuriri ámi re uriñinigini, “Aminá apaxípániñí imóniñíáwa tñí e náni nuri womi siwá niwiniri nañwí ridiyowá náni negí aríwo Moseso eñiná sekaxí nearagíyí bí míni wíríxini. Gorixo náni ridiyowá siárirí joxi nañí imóníípi náni áwaní riri oeniri míni wíríxini.” urowáriñinigini.

Porisí woyáyí womi nañí imixiñí nánirini.

⁵O añí yóí Kapaneamiyo rémóaná wauyí porisí áminá imóniñí wo niwímeari wauní rixiñí nuriri ⁶re uriñinigini, “Amináoxini, gí inókníñí nimóniri omiñí niariño eñí níni siwímí neri niweri ríniñí xwé winarini. Anani nañí imixiréini?” uríagi ⁷Jisaso re uriñinigini, “Ananirini. Nioni nuri nañí imiximíni.” uríagi aí ⁸porisí áminá imóniño re niyaiwiri “Porisí wa nioni ínimi nuríniñpa simixíyí eni Jisasomi ínimi wuríni.” niyaiwiri re uriñinigini, “Amináoxini, nioni ámá wé róniñí joxi tñi xixeni mimóniñagi náni joxi gí añíyo íwiapíxaxí mimónini. E neri aí joxi re dání ‘O nañí oimónini.’ ráná gí omiñí niariño nañí imóniñiñoi. ⁹Ayí ripi náni searariñini. Nioni eni ámá omiñí ‘Ayí ayí ei.’ nirarigíáwami ínimi wuríniñini. Nioni eni porisí wa ínimi nuríniñoi. Womi ‘Joxi añí ui.’ uráná sa anani aríá niniri waríñirini. Womi ‘Bei.’ uráná sa xixeni baríñirini. Gí inókníñí niariñí womi ‘E ei.’ uráná xixeni yariñirini.” uríagi ¹⁰Jisaso aríá e niwiri náni ududí neri ámá xíomi númi warigíáyo níkinimóniri re uriñinigini, “Isireriyíné woxi ámá ro diñí seáyi e níkwírori yariñípa xixeni e diñí miníkwíroariñagi siñwí raniñáririni. ¹¹Nioni re searariñini, ‘Ámá Gorixo xegíyí xwioxíyo mímeámí neri pírániñí umeñweañáná émá obaxí sogwí íwiapariñimíni ñweagíáyí tñi sogwí wearíñimíni ñweagíáyí tñi níbiro segí aríowa Ebírámo tñi Aisako tñi Jekopo tñi nawíni ani niñwearo aiwá nípíríáririni. ¹²E neri aí Isireriyíné, Gorixo añipaxí xwioxíyo mímeámí niseairi seameñweapaxíyíné Gorixo meñweaníe dání síá yiniñimí seamoáíáná e dání mímeníñwí ayíkwí miseariníá eñagi náni ñwí earo mañí síwí ríkwíniro epíríáririni.’ searariñini.” nuriri ¹³wauyí porisí áminá imóniñomi re uriñinigini, “Dixí añí ui. Joxi ‘O e epaxorini.’ niniaiwiri diñí níkwíroariñípi xixeni ríxa oimónini.” urowáraná axíná xegí omiñí wiariño ríxa nañí imóniñinigini.

Pitaomi xineagwími naŋí imixiŋí nánirini.

¹⁴Jisaso Pitaoyá aŋíyo nipáwiríná weníŋí éyí winiŋinigini. Pitaomi xineagwí wará ríá pirí wiaríŋagi íkwiaŋwíyo sá riyí weŋagi niwiniri ¹⁵wé seáyi e ikwiáráná re eŋinigini. Ríá pirí píni wiáráná niwiápínimeari Jisasomi aiwá nixeri wiŋinigini. ¹⁶Rixa sogwí weáná ámá e dánjyí wígí ámá imíó diŋí xixéroariŋyí obaxí o tíŋí e niméra nibiro wáráná oyá xwiyíá tñni mixí umáinowárayiri simixíyí nñni eni pírániŋí imimiximí eri eŋinigini. ¹⁷Gorixoyá xwiyíá wíá rókiamoagí Aisaioyi riniŋo ámá xegí xiáwowayá xwíá piaxíyo dáni iwiaronó náni xwiyíá niriri eaŋí ripi, “Xewaníŋo negí simixíyí tñni uraní tígíyí tñni naŋí imimiximí enfáriní.” riŋípi rixa xixeni imónini náni Jisaso e eŋinigini.

Ámá “Orixídaneyi.” urigíá nánirini.

¹⁸Jisaso ámá oxí apixí obaxí omi ikwikwierí wiaríŋagía niwiniri xegí wiepisariŋowami sekaxí re uriŋinigini, “None ipíwámi jíariwámi dáni xemoani náni ewéyo pixemoánípoi.” uraríná ¹⁹ŋwí ikaxí eániŋípi mewegíyí wo nibiri re uriŋinigini, “Nearéwapiyariŋoxini, aŋí ami gimi gimi náni úáná nioni númi rixídímemeárini.” uríagi ²⁰o re uriŋinigini, “Síwí sayí sá wenía náni sŋá siririkí tíŋírini. Inŋí eni sá wenía náni niyini tíŋírini. E neri af ámá imóniŋáoni sá wémía náni aŋí wí menini.” uriŋinigini. ²¹Xegí wiepisariŋíyí ámi wo re uriŋinigini, “Ámináoxini, gí ápo tñni niŋweaŋisáná o rixa péáná xwíá niweyárimoni númi rixídímemeía náni ananirani?” uríagi af ²²Jisaso ámá xíomi diŋí miwikwíroarigíyí náni re uriŋinigini, “Xegí piyí wía xwíá weyárfrixiniri siŋwí niwiniri nioni númi nixídei.” uriŋinigini.

Ipí imeamíkwí yariŋípi samiŋí imixiŋí nánirini.

²³E nurimi ewéyo pixemoánáná xegí wiepisariŋowa eni nipixemoániro ipíyo oriwámi dáni náni nimeámi waríná re eŋinigini. ²⁴Ríwípi xwé neri iniŋí imeamíkwí neríná rixa ewépa miwiáróminiri yariŋagi aiwi Jisaso sá maiwí weŋagi ²⁵wiepisariŋowa nuro saiwiárí niwiro re urigíawixini, “Ámináoxini, rixa nineamiwiáropaxríni. Arirá neaii.” uríagia ²⁶o re uriŋinigini, “Diŋí onimiápi níkwíroarigíoyíne pí náni wáyí seainariní?” nurimi niwiápínimeari re riŋinigini, “Imiŋí tñni iniŋí tñni samiŋí oweárini.” ráná re eŋinigini. Imiŋí píni wiáriri iniŋí wiŋwí mé riwoáriri neri ŋiŋíá imónáriŋinigini. ²⁷Ŋiŋíá imónáriagi niwiniro re rinigíawixini, “Pí ámáoríani? Imiŋí tñni iniŋí tñni aríá niwiri samiŋí weáriyoi.” rinigíawixini.

Ámá imíó xixéroarigíwaúmi mixí umáiniŋí nánirini.

²⁸O tñni xegí wiepisariŋowa tñni oriwámi dáni ámá yoí Gadarayí aŋíyí tíŋí e niwiékínimearo ewéyo dáni ayoááná ámá imíó diŋí xixéroariŋí waú

—Awaú imíó nimóniri sayí e roṅaḡí nání áamá óí ayimi mipwarigíárini. Awaú xwáripá áamá tayarigíá tíṅí aṅwi e dání nibiri nawíni órórí niniro ²⁹xwamiání re urigísisixini, “Niaíwí Gorixoyáoxini, joxi pí neaiminiri bariṅini? Gorixo ríwéná ríniṅí neaiapiníá sini eṅáná joxi ríniṅí neaiapiminiri ribariṅini?” nuriro ³⁰odípí obaxí bí ná jíami nírómáná aiwá nariṅaḡía niwiniro ³¹rixini re urigíawixini, “Joxi mixí nineamáinirínáyí, odípíyo oxixérópoyiniri siṅwí neanei.” uríagía ³²o “Emani!” uríagi áamá awaúmi píni niwíárimi odípípimi xixéróáná re eṅinigini. Pimaṅí miwíáronḡími aṅíni imeḡíni wéḡáyí ipíyo igwíá nuyíroro iniḡí ninamiro píyí eḡíawixini. ³³Píyí éagía odípí awí mearoarigíáwa siṅwí e niwinimi wigí aṅí apimi nání mírí nuro odípí iniḡí namíápi tíni áamá imíó xixéroarigííwaú eni naṅí imóniri éipi tíni nání repíyí wíáná ³⁴ámá oxí apíxí níni aṅí apimi dáṅyíyí Jisasomi wímeaniro nání nuro omi niwiniro rixini “Joxi neneýá xwíá re píni nineawíárimi wí e nání ui.” urigíawixini.

Áamá eṅí níni siwímí eṅomi naṅí imixiniṅí nánirini.

9 ¹Jisaso ewépámi nípíxemoániri niṅweari nimeámi oriwámi dání nixemoauri xegí aṅí ḡweaariṅpimi nírémori ḡweaṅáná ²re eṅinigini. Áamá wa áamá eṅí níni siwímí eṅí wo íkwiaṅwíyo nitimáná nimeámi báná Jisaso awa “O anani naṅí neaimixiyipaxírini.” niyaiwiro xíomi diṅí wikwíroariṅaḡía niwiniri eṅí siwímí eṅomi re uriniginini, “Áamá roxini, joxi ayá síwí miriropani. Íwí joxi yariṅípi rixa yokwarimí sífáriní.” uráná re eṅinigini. ³ḡwí ikaxí eániṅípi mewegíáwa wigí xwioxíyo dání diṅí re nípikíga ugíawixini, “Áamá ro ‘Gorixo yariṅípi epaxonirini.’ niyaiwiri níríríná Gorixomi riperírí umearini.” Ínimi dání diṅí e yaiwariṅaḡía nání ⁴Jisaso diṅí adadí niwiri níjía nimóniri re uriniginini, “Pí nání segí diṅíyo dání ‘O Gorixomi riperírí numeri yarini.’ niaiwariṅoi? ⁵⁻⁶Nioni eṅí siwímí eṅomi ‘Dixí íwí yariṅípi rixa yokwarimí sífáriní.’ uráná soyíné ‘O néné tíṅoríani?’ niaiwipíríréoi? Omi ‘Naṅí nimóniri niwíápinimeámi aṅí ui.’ uráná soyíné ‘O néné tíṅoríani?’ niaiwipíríréoi? Íwí yariṅípi yokwarimí niwíáriná ínimi imóniṅagi nání e yaiwipaxí mimónini. E neri aiwi áamá imóniṅáoni nání ‘O xwíá tíyo niṅwearíná eni íwí yariḡíápi yokwarimí wiini nání néné tíṅoríani?’ niaiwipírí nání siṅwí nanípoyi.” nuriri áamá eṅí níni siwímí eṅomi re uriniginini, “Joxi niwíápinimeári dixí íkwiaṅwí nixopemixiri nimeámi ui.” uráná ⁷o niwíápinimeámi xegí aṅí e nání uṅinigini. ⁸Xegí aṅí e nání úagi oxí apíxí e eḡíroyí eḡíáyí siṅwí e niwiniro nání diṅí niyeawáriro “Gorixo áamá ro néné tíṅóniṅí wimixiniṅíani?” niyaiwiro xíomi yayí seáyimi dání umegíawixini.

Matiyuomi “Nixídei.” uriní nánirini.

⁹Jisaso e píni niwíárimi nuríná áamá wo xegí yoí Matiyuoyi riniṅo takisí nání niḡwí uráparigíá opisí aṅíyo riwo ḡweaṅagi niwiniri re

urijinigini, “Nioni nixídiméirixini.” uríagi o niwiápínimeari númi uxídjinigini. ¹⁰ Jisaso xegí wiepisarijowa tñi añí Matiyuoyá nání nuro aiwá naríná áamá takisí nání nigwí uráparigíáyí tñi íwí aríkí yarigíá wíniyí tñi omi niwímearo nawíni aiwá narijagía ¹¹ Parisiowa siñwí e niwiniro xegí wiepisarijowami re urigíawixini, “Segí searéwapiyariñí ro pí nání áamá takisí nání nigwí nearáparigíá tiyí tñi íwí aríkí yarigíá tiyí tñi nawíni niñwearo aiwá nariñoi?” uríagiá ¹² Jisaso aría e niwiri xewaniño nání “Áamá íwí yarigíáyo arirá wimíniri nání weapiñoríani?” oyaiwípoyniri ewayí ikaxí re urijinigini, “Áamá simixí miyarigíáyí xwirí tñí e nání warigíárani? Oweoi, simixí yarigíáyíni xwirí tñí e nání warigíárini. ¹³ E neri aí soyíné nuro xwiýá eníná wía rókiamoagí Xoseao niriri eañí ripi, ‘ “Ridiyowáni Gorixoní nání nírixini.” minimónarinini. “Áamá wiyo nání ayá nurimixiro arirá wírixini.” nimónarinini.’ niriri ríwamñí eañí apimi íá niroro nijía imónípoi. Ayí ripi nánirini. Áamá ‘Wé róniñí yariñwaénexini.’ yaiwinarigíáyo ‘Nioni tíamini bípoi.’ uriminiri nání weapiñamani. ‘Íwí yariñwaénexini.’ yaiwinarigíáyo nání weapiñarini.” urijinigini.

“Dixí wiepisariñyí aiwá ñwía miñwirárinayariñoi.” urigíá nánirini.

¹⁴ Jono wayí numeaiá wariñoyá wiepisarijowa Jisaso tñí e nání nibiro re urigíawixini, “None tñi Parisiowa tñi Gorixo none nání yayí owininiri aiwá ñwía ñwirárinayariñagwi aiwi dixí wiepisarijowa pí nání aiwá ñwía miñwiráriní yariñoi?” uríagiá ¹⁵ Jisaso xewaniño nání “Omi wa nipikímáná enáná wiepisariñyí diñí sipí niwiríná aiwá ñwía ñwirárinipíríarini.” oyaiwípoyniri ewayí xwiýá re urijinigini, “Áamá apixí siñí meáo xegí áamá imónigíáyí tñi ñweañáná o nání diñí sipí wipaxí menini. E nero aí áamá wa omi anínimixáná íná aiwá ñwía ñwirárinipíríarini.” urijinigini. ¹⁶ “Xwiýá Parisiowa nearéwapiyarigíápi tñi Jisaso siñí nearéwapiyariñipi tñi kumixipaxí mimónini.” oyaiwípoyniri ámi ewayí ikaxí nuriri re urijinigini, “Áamá wigí soría axeniñagi niwiniróná rapirapí sini mikikaríníñí bi nimearo urí ói iniñúmi nipíroro gwí kiwearigíámani. E nerínáyí, igíá eánáná rapirapí siñí píróíápi níkikaríniríná urú xwé naxega uníarini. ¹⁷ Ripi eni áamá iniñgí wainí siñí memé wará sixí uríwámi iwajía yarigíámani. E nerínáyí, memé wará sixíwá núpíyiniñríná iniñgí wainí puri sixíwá xwiríá ikixéniri e enigini. Wainí siñyí memé wará sixí siñíwámi yíánáyí, wará tñi iniñgí tñi nipiáuni nañí eniñoi.” urijinigini.

**Apixí ragí aníñí pwaríñí wími nañí imixiri miáí
pení wími nañí imixiri ení nánirini.**

¹⁸ Jisaso xwiýá api sini e uraríná re enjinigini. Judayíyá rotú añí mewení wo nibiri Jisaso sikwí tñí e miñí xwíáyo níkwírori

re uriñinigini, “Gí miaí rixa pearini. E neri aí joxi nibiri wé seáyi e wikwiáráná nañí oeni.” uríagi ¹⁹o niwiápnimeari númi nuri wiepisariñowa eni nawíni waríná ²⁰⁻²¹re eñinigini. Apixí wí —Í xegí ragí aniñí pwaríná xwiogwí wé wúkaú sikwí waú múroñirini. Í “Niíni oyá iyíáyoni amái níróniríná nañí imóniminiyírani?” niyaiwia nibiri ríwíyo nírónapimáná Jisasoyá iyíáyo síríví jie amái róniñinigini. ²²Amái róníagi Jisaso nikinimóniri ími siñwí niwiniri re uriñinigini, “Gí ineyi, ayá síwí miriropani. Jíxi ñiñí ninikwíroriñipimi dání eríkiemeáníni.” uráná í rixa nañí imóniñinigini. ²³Jisaso e dání nuri rotú añí mewenjoyá añí e nírémori oxí apixí epíroyí niyárimáná ñwapé riro webí riro nero yaiwíniñí yariñagía niwiniri ²⁴re uriñinigini, “Rixa peyeápoi. Miái piyí menini. Sa sá weni.” uríagi ayí ripíá nuriro yariñagía aí ²⁵níni miái tíñí e píni niwiárimí rixa nipeyeámáná eñáná o nipáwiri miáimi wéyo íá nimaxiriri mífeyoááná re eñinigini. Miái wiápnimeañinigini. ²⁶Í wiápnimeági xwiyíá o éipi náni xwiyíá añí niyoni rinárimenñinigini.

Siñwí supárigíí waúmi nañí wimixiñí nánirini.

²⁷Jisaso e dání waríná amái siñwí supárigííwaú númi nuxídiri ráiawá re urigíisixini, “Negí mixí ináyí Depitomi xiáwoxini, yawawi anani wá yeawianiréini?” nuriri ²⁸o rixa añíyo nipáwiri ñweañagi awaú eni nipáwiri wímeááná Jisaso yariñí re wiñinigini, “Awagwí ñiñí ninikwírori ‘O anani siñwí supárigííwíyí nañí yeaimixipaxorini.’ riniaiwariñi?” uríagi awaú “Oyi, Ámináoxini, joxi e epaxoxirini.” uríagi ²⁹o egí siñwíyo wé íá nuxiriri re uriñinigini, “Awagwí ñiñí nikwíroarigíípa xixeni oimónini.” uráná re eñinigini. ³⁰Awaú siñwí noxoari anigíisixini. Siñwí noxoari aníagíí Jisaso aría jiyikí nori re uriñinigini, “Awagwí nioni eaíápi amái wíyo áwanñí murimepa éisixini.” uríagi aí ³¹awaú o tíñí e dání nuríná xío wíipi náni ami ami repiyí níwia emegíisixini.

Mañí píronáriñí womi nañí wimixiñí nánirini.

³²Jisaso e dání waríná amái wí wigí amái imíó ñiñí xixéronagi náni mañí píronáriñí wo Jisaso pwaríñe náni nimeámi nibiro wáráná ³³o imíóyo mixí umáinowáraná mañí píronárago rixa xwiyíá rariñagi oxí apixí e epíroyí egíáyí siñwí e éagi niwiniro ududí nero re nira ugíawixini, “Aga eñíná eñíná aiwi Isírerene amái wo e yariñagi winagwámani.” nira úagía aiwi ³⁴Parisiowa re rigíawixini, “Obo, imíóyo umenñweañoyá ñiñí tíni mixí umáinowárariniñíni.” rigíawixini.

Jisaso amái náni wá wianiñí nánirini.

³⁵Jisaso Judayíyá añí xwéyo tíni onimiáyo tíni nimeríná wigí rotú añíyo nipáwiri uréwapiyemeri xwiyíá yayí winipaxípi —Api Gorixo amái xío xegí xwioxíyo mimeámí neri pírániñí umenñweanípi náni

riniñipirini. Api nání wái urimeri áamá simixí xixegíni yarigíáyo tñi uraní xixegíni imónigíáyo tñi nanj imimiximí wiemeri neríná ³⁶ áamá oxí apixí epíroyí egíáyí sipisipí xiáwo mayí neríná úrapí nero diñj simigwíá niyiniróniñj wiároárinarigíápa yariñagía niwiniri wá niwianiri ³⁷ áamá xwiyíá Gorixoyá wái urimepíría nání obaxí mimóniñagí nání xegí wiepisariñyo re uriñinigini, “Aiwá omiñyo píripírí ináriñagí aiwi áamá nimipíría nání obaxí menini. ³⁸ Ayináni Gorixomi rixiñj re urípoyi, ‘Áamá aiwá api rimiipírí nání dixí omiñj tñj e nání urowárfírixini.’ urípoyi.” uriñinigini.

**Wái wurimeiarigíawami eñj sixí weámixowárirí
sekaxí uriri eñj nánirini.**

10 ¹ Jisaso xegí wiepisariñj wé wúkaú sikwí waú awami “Awí eánipoyi.” nurimáná awa áamá imió diñj xixéroariñyo mixí umáinowáriro áamá simixí xixegíni yarigíáyo tñi uraní xixegíni imónigíáyo tñi nanj imixiro epaxí imónífirixiniri eñj weámixowáriñinigini. ² Xegí wái wurimeiarigíáwa, wé wúkaú sikwí waú imónigíáwa wigí yoí rowarini. Xámiño Saimonorini. Ámi yoí bi Pitaoyi wíriniñorini. Xegí xogwáo Adiruorini. Sebediomi xewaxowáú Jemiso tñi xogwáo Jono tñirini. ³ Piripo tñi Batoromuo tñirini. Tomaso tñi Matiyuo tñi —O takisí nání nigwí urápagorini. O tñirini. Aripiasomi xewaxo Jemiso tñi Tadiaso tñirini. ⁴ Saimono —O áamá “Émáyo mixí oxídwáraneyi.” rarigíáyí tñi nawíni nikumixiniri emeagorini. O tñi Isikarioti dánj Judaso —O Jisaso nání miyí uriñorini. O tñirini. ⁵ Jisaso wé wúkaú sikwí waú awami nurowáriríná sekaxí nuriri re uriñinigini, “Soyíné nuróná émáyíyá añj tñjmini mupani. Samariayí —Áamá ayí Judayí tñi xepixepá rónarigíáyirini. Ayíyá añyo nání eni mupani. ⁶ Soyíné negí Isireriyí —Ayí sipisipí xiáwo pírániñj mímearíná ami ami uniamoariñniñj imónigíáyirini. Ayí tñj e nánini úpoyi. ⁷ Soyíné nuróná wái re urimeríni, ‘Gorixo xío xegí xwioxíyo míméámí níneari neameñweani añwi ayo eñagi nání segí íwí yarigíápi ríwímini nimamoro nisaniro ñweáfirixini.’ urimero ⁸ áamá simixíyo nanj imimiximí ero áamá péíáyo diñj sixí numímero saiwiári wiro áamá peyiyí tígíáyo wigí wará nanj wimixiro imió diñj xixéroariñyo mixí umáinowáriro eméfirixini. Soyíné nioni eñj eániñj anipá eñj seaeámixowáráyí nání soyíné áamá simixíyo nanj imimiximí niwiríná nigwí nání murípa nero sa anipá nanj imimiximí wífirixini. ⁹ Soyíné niwaniro neríná nigwí sixí ímoarigíáyo nigwí xwérani, onímiáraní, nímearo sixí nímero níméámí mupa ero ¹⁰ íá árupiañj aí tñi nimanimi mupa ero iyá wúkaú raiwakiyí mepa ero sikwí sú niyíniro aiwi ámi waú mímepa ero xoyíwá nimaxirimi mupa ero éfirixini. Ayí ripi nánirini. Áamá arirá wiarigíomi anani aiwá mini wiaríñagía nání soyíné eni aiwá anani seaipíríría eñagi nání

amípí nimeámi mupa éírixini. ¹¹ Anjí xwé bimirani, onimiá bimirani, nirémoríná áamá anjí apimi ηweagíáyí áamá go go íwí amípí miyaríηomi niwimiríná oyá anjíyo nipáwiro anjí apimi píni niwiárimi upíríná nání o tínini wéírixini. ¹² Áamá ‘O tíni oweaneyi.’ yaiwííoyá anjíyo nipáwiríná ayo yayí niwiro ‘“Gorixo pírániηí oseameni.” neaimónarini.’ uríírixini. ¹³ Ayí eni yayí niseairo segí píne aríá seaipíri nání wimónánáyí, soyíné yayí niwiríná uríápi anani ‘Xe oimónini.’ yaiwíírixini. Ayí e miseaipa seaíánáyí, soyíné yayí niwiríná uríápi ‘Anipá oimónini.’ yaiwíírixini. ¹⁴ Áamá giyí giyí wigí anjíyo nání niseaipemeámi mupa ero soyínéyá xwiyíá aríá miseaimónipa ero éánáyí anjí iwámirani, anjí apimirani, píni niwiárimi nuríná áamá e ηweagíáyí ‘Gorixo xeaníηí neaikáriníá nání tiyí réoi?’ oyaiwípoyiniri segí sikwíyo sikí xéniηípi píri wiaíkmí miyárimi úírixini. ¹⁵ Nioni nepa searariηini, ‘Síá Gorixo áamá niyoni mí ómómiximi eníayimi áamá eníná anjí yoí Sodomíyo ηweaagíáyí tíni Gomora ηweaagíáyí tíni aga rikikírío néra wagíáyo Gorixo xeaníηí ríá tíηí wikáriníá enagi aiwi áamá soyíné aríá miseaíáyó xeaníηí ayo wikáriníápa axípi xixeni e wikáriníámani.’ searariηini.

“Xeaníηí seaímeaníáriní.” uríηí nánirini.

¹⁶ “Nioni soyíné sipísipí mixí xixe mepa yariηíniηí imónigíoyíné áamá síwí sayíniηí imónigíáyí tíηí e nání searowárarini. Ayínáni soyíné nuróná áamá ayí nání siηwí tíni úírixini. Sidirí yariηípa diηí émi saímí moro iηí xawiówí uyínií bi mé awayini yariηípa ero néra úírixini. ¹⁷ Soyíné nioni nixídariηagía nání áamá wí íá niseaxero negí Judayí áminá xwirixí meariηíáwa tíηí e xwirixí seamepíri nání seawáriro negí rotú anjíyo dání sikwíá ragí puni nání seaearo ¹⁸ soyíné píne nioniyá émáyí aríá egíe dání áwaní uripíri nání gapimanowa tíni mixí ináyowa tíni tíηí e niseameámi nuro seawáriro epíríáriní. ¹⁹ E seawáripíríá aiwi rixa xwiyíá uripíri ínánini Gorixoyá diηí tíni uripíri enagi nání ayá síwí nisearori ‘Arire uraniréwini? Pí pí uraniréwini?’ miyaiwipa éírixini. ²⁰ Ayí ripi nání searariηini. Awa rixa xwirixí seamearíná segí diηíyo dání uripíríámani. Segí séno Gorixoyá kwíyípimi dání uripíríá enagi nání ayá síwí nisearopa éírixini. ²¹ Xiráxogwáowáú wío Jisasomi xídariηagi nání wío áamá wí omi opikípoyiniri miyí uriri xano xewaxo nání miyí uriri niaíwíyí xaniyaú nání miyí uriro epíríáriní. ²² Soyíné nioni diηí nínikwíroro nixídariηagía nání áamá níni símí tíni seaipíríá aiwi giyí giyí síá yoparípi nioni weapimíáyí nání ení neániro ηweaíáyíné Gorixo anani yeáyí niseayimixemeaníáriní. ²³ Anjí bimi niseapikianiro nání númi seaméánáyí, ámi anjí bimi nání éí úírixini. Nioni nepa searariηini, ‘Isireriyí anjíyo píne nioniyá wíyo sini muriniηáná áamá imóniηáoni weapimíáriní.’ searariηini.” uríηiniginí.

²⁴ Jisaso xegí wiepisariηowa “Omí sipí wikáripíríá enagi nání none ení sipí neaikáripaxírini.” oyaiwípoyiniri ewayí ikaxí re uríηiniginí,

“Wiepisariŋowa wigí uréwapiyariŋomi seáyi e imónarigíámáni. Xináíwániŋí nimóniro omiŋí wiirigíáwa eni wigí omiŋí wiirigíómi seáyi e wimónarigíámáni. ²⁵Wiepisariŋowa wigí uréwapiyariŋo tñi xixeni nimónirínáyí, ayí apánirini. Xináíwániŋí nimóniro omiŋí wiirigíáwa eni wigí omiŋí wiirigíó tñi xixeni nimónirínáyí, ayí apánirini. Sénoni ikayíwí imíŋóyo xiráóniŋí imóniŋoyi ninirirónáyí, gí niaíwoyíné eni aŋipaxí searipírírini.

“Wáyí wipaxo rorini.” uriŋí nánirini.

²⁶“Ámá íwí ínimi dáni éfáyírani, ikayíwí yumí ríáyírani, ríwéná nipini siŋáni imóniníá eŋagi náni ayo wáyí miwipa érixini. ²⁷Xwiyíá amipí nioni ínimi dáni áriwiyíná searíápi soyíné ikwáwiyíná áwaní urírixini. Amipí nioni yumí ikaxí searíápi aŋí rikwíyo nixerweámáná áwaní urírixini. ²⁸Ámá niseapikiróná waráni seapikipaxírini. Diŋí eni seaxekwapaxí meŋagi náni wáyí miwipa érixini. E neri aí Gorixo wará aí tñi diŋí aí tñi ríá aniŋí wearíŋíyo seaikéaripaxí imóniŋo náni wáyí wírixini. ²⁹⁻³¹Ámá makeríáyo náni nuríná iŋí siríkwá waú bí nerfná nigwí ríá niŋí bí tñi bí yariŋírini. E neri aí segí séno miwimónipa nerfnáyí, wo anani niperi xwíáyo piéroariŋímani. Soyíné iŋí onimiápiami múróniŋagi náni Gorixo amipí wí miwímeapa oeniri siŋwí niseanirínáyí, wí niseaímeaníá eŋagi ámá náni wáyí mepani. Segí miŋíyo díá íá ropaxí mimóniŋagi aí Gorixo nijíá eŋagi náni re yaiwírixini, ‘O nene náni aga nijíá imóniŋagi náni anani pírániŋí neamenigini.’ yaiwírixini. ³²Ámá giyí giyí ámáya siŋwíyo dáni ‘Jisasomi xídariŋáonirini.’ uránáyí nioni eni gí ápo aŋínami ŋweaŋoyá siŋwíyo dáni ‘O nioni nixídariŋorini.’ urimíárini. ³³E neri aí giyí giyí nioni náni ámáya siŋwíyo dáni ‘O náni nioni majíárini.’ uránáyí nioni eni o náni gí ápo aŋínami ŋweaŋoyá siŋwíyo dáni ‘O nioni majíárini.’ urimíárini.” uriŋinigini.

“Kirá mixí nániniŋí imóniŋípá nimeámi biŋárini.” uriŋí nánirini.

³⁴O ámi re uriŋinigini, “Nioni náni ‘Ámá niyoni piyíá wírimíániri biŋorini.’ miniaiwipani. Gorixoyá xwiyíá kirá mixí nániniŋí imóniŋípá nimeámi biŋárini. ³⁵Aríá niarigíáyí tñi aríá miniarigíáyí tñi Gorixoyá Bikwíyo niriniri eániŋípa xepixepá orónipoyiniri nimeámi biŋárini. Xewaxo xanomi símí tñi wiri xemiáí xináími símí tñi wiri xewaxo xiepí xiáími símí tñi wiri oinipoyiniri biŋárini. ³⁶Ámá xwiyíá nioniyá nixídariŋíáyí wigí ámá imónigíáyí mixí wimónipírírini. ³⁷Ámá giyí giyí xanomirani, xináímirani, diŋí sixí uyariŋípimi nioni niyininí náni mimúrónipa nerínáyí, ámá nioniyá imónipaxí mimónini. Giyí giyí xewaxomirani, xemiáímirani, diŋí sixí uyariŋípimi nioni niniyininí náni mimúrónipa nerínáyí, nioniyá imónipaxí mimónini. ³⁸Giyí giyí ‘Jisasomi ouxídimini.’ niyaiwiri aí xeaniŋí niniro nipikipírixiniri minixídí éí

éíáyí ayí nioniyá imónipaxí mimónini. ³⁹Ámá goxi goxi ‘Nioni Jisasomi diñj níwikwírori nuxídírínáyí, nípkípírixiní.’ niyaiwiri xewaniñoxi éí nimenirínáyí, diñj niyimiñjipi anijj ñwearía nání mearíamani. E neri aí giyí giyí éí mimenipa neri ‘Nioni Jisasomi xídarinagá nání ámá wí ninípkirónáyí, ayí ananirini.’ niyaiwirínáyí, diñj niyimiñjipi anijj ñwearía nání mearíarini.” uriniginini.

“Nipemeámi seaúfá giyí giyo Gorixo nañj wiiníarini.” urinjí nánirini.

⁴⁰O ámi re uriniginini, “Giyí giyí soyíné wáf urimearíná aría niseairo nañj niseairónáyí nioni searowárinagá nání nioninijj niro Gorixo nirowárenapiñoimínijj eni wirowariñoi. ⁴¹Ámá giyí ámá wo Gorixoyá wíá rókiamoariño eñagi nání ‘Ámá ro Gorixoyá wíá rókiamoariñoifani?’ niyaiwiri nipemeámi xegí añjyo nání úoyí ríwéná Gorixo xegí wíá rókiamoarigiáyo yayí niwiri ayá rimixarinijjipi mini winíapa axípi e winíarini. Giyí ámá wo wé róniño eñagi nání ‘Ámá ro wé róniñoifani?’ niyaiwiri nipemeámi úoyí ríwéná Gorixo ámá wé rónigiáyo yayí niwiri ayá rimixarinijjipi mini winíapa axípi e winíarini. ⁴²Ámá giyí giyí soyíné nioniyá seaiapisarinjáoyíné eñagi nání iniigí iminjí rinj kápíxí wá seaiapánáyí Gorixo ‘Omi wíimiginí.’ yaiwíipi anipá imóniníamani. Oweoi! Nioni nepa seararinjini, ‘Gorixo mini winíarini.’ seararinjini.” uriniginini.

Jono Jisasomi yarinj wipisi nání urowárinj nánirini.

11 ¹Jisaso xegí wiepisarinj wé wúkaú sikwí waú awami sekaxí e nuríísáná uréwapiyemeri wáf urimeri eminiri nání e dání píní niwíarimi Judayí añj ami ami ikwíróniñjyo nání unjiniginini.

²Jono wayí numeaiá wariño gwí niñweámáná aría re winjiniginini, “Jisaso e yarini. E yarini.” rarinjagía aría niwiri xío xegí wiepisarinjyí waúmi Jisaso tñj e nání urowáraná ³awaú nuri yarinj re wigíísixiní, “Jono ‘Ámá wo ríwíyo biníarini.’ rarinjoxirani? Weniñj neri ñweaani nání wo sini ría barini?” uríagí ⁴Jisaso re uriniginini, “Awagwí nuri amipí nioni yaríná siñwí naníipi tñni aría nííipi tñni nání repiyí niwiri áwanj urémeápiyi. ⁵Nioni yaríná ámá siñwí supárigíáyí siñwí oxoaro sikwí ikí egiáyí nañj nimóniro añj ero peyiyí tígíáyí wará nañj iníro aría píróniñgíáyí aría ero péiáyí wiápínimearo ámá uyípeayí xwiyíá yayí winipaxí none wáf nemerane urarinjwápi aría wirowariñagía nání Jonomi áwanj e urémeápiyi. ⁶Ripi eni ‘Nioni nání ámá go go símí tñni wikí diñj “O pí ría yarini?” miniaiwipa nerínáyí, yayí owinini.’ urémeápiyi.” nurowáririri ⁷awaú rixa gwí añj Jono ñweañiwá tñj e nání waríná ámá oxí apíxí e epíroyí egiáyo Jono nání re uriniginini, “Seyíné ámá diñj meañe nání nuríná pí ámáyo winaniro wagíarini? Ámá saminjí iminjí onimiápi neri aí ríwí iwí apaxí mé winjwí yarinjpa yarinj womi siñwí winaniro

wagíárani? Oweoi! ⁸E neri aí pí á máyo winaniro wagíáрини? Á má rapirapí yarapayí ení wú yíniní womi siñwí winaniro á má diñí meañe wagíárani? Oweoi! Á má rapirapí yarapayí naníni niyíniro mixí ináyíyíyá aníyo ñweaarigíáрини. ⁹E neri aí seyíné pí nání á má diñí meañe nání wagíáрини? Gorixoyá wía rókiamoaríní womi siñwí winaniro wagíárani? Oyi, e neri aí ‘O Gorixoyá wía rókiamoagíáyí tñi xixeni imóniñomani. Seáyí e múroñorini.’ seararínini. ¹⁰Xwiyíá Gorixo xewaxomi urinípi wía rókiamoagí Marakaio niwuriyiri ríwaminí eañí ripi, ‘Aríá ei. Gorixoní gí xwiyíá yaní wiowárimíáo joxi gí íwoxi xámi rimeani nání uowárimíáрини. O joxi nání á máyo nuriríná óñiní simoiníáрини.’ niriri ríwaminí eañí api Jono nání rinini. ¹¹Nepa seararínini, ‘Jono á má ariowayá xwía piaxíyo dání iwiaroníoyi rarigío nání óñiní imoño eñagi nání á má nñi aiwi wo Jonomi seáyí e imónini xirigíámani. E neri aiwi giyí giyí nioni nixídiro Gorixoyá xwioxíyo páwiro yarigíáyí xwiyíá nioni nání wái nurimeipíripí Jono wái urimeñípimi seáyí e imóniñagi nání á má ayí onípi aiwi Jonomi eni seáyí e wimóniñoi.’ seararínini. ¹²Jono wayí nineameaia waríño xwiyíá ‘Gorixo xwioxíyo mimeámí nineairi neameñweanía nání á má wo uowárenapiníñoi.’ iwamíó searíniná dání á má uyíní yarigíáyí ‘Gorixoyá xwioxíyo arige páwianiréwini?’ niyaiwiro pírfí íkweámí néra páwianiro yariñoi. ¹³Ñwí ikaxí Moseso niriri eañipi tñi wía rókiamoagíáwa niriro eagíápi tñi Gorixo xwioxíyo mimeámí neri seameñweanía náníyí wía nirókiamóa nibiro Jono yoparí o axípi riníriní. ¹⁴Eníná wía rókiamoagíáyí wo re rinípi, ‘Gorixo xwioxíyo mimeámí neri neameñweaníápi rixa nimóniminíri añwi e eñánáyí á má wo wía rókiamoagí Iraiñaóniní imóniní wo biníáрини.’ rinípi tñi xixeni Jono rixa biníriní. Seyíné omi nimíminírináyí, o Iraiñao imóniñipa imóniminíri eñíriní. ¹⁵Aríá tígíáyíné pírániní nioniyá xwiyíápi aríá eríini.

¹⁶“E neri aí pí ewayí xwiyíá niseariri re searimíini, ‘Á má agwi ríná ñweagíáyíné ayíniní imóniñoi.’ searimíini? Seyíné niaíwí ripiániní imóniñoi. Niaíwí bíbia makería tñí e éi niñwearo bíbia tñi níá yaniro neríná ríaiwá re urariñoi, ¹⁷‘Nene seyíné siminíní epíri nání soní eaaríná seyíné siminíní méoi. Nene seyíné ñwapé ripíri nání ñwapé ráná ñwapé saní minearápáoi.’ E uraríná niaíwí aníní winarínípiá yapi imóniñoi. ¹⁸Ayí ripi nání seararínini. Jono nibiríná aiwá á má wimónarínípi tñi iniigí wainí tñi miní ñwía ñweañáná á má wí diñí mamó o nání ‘Imíó diñí xixerónagi nání yarini.’ rariñoi. ¹⁹Á má imóniñáoni nibiríná aiwá iniigí amipí anani naríná á má wí ‘Á má royí aiwá tñi iniigí wainí tñi riwí eñí neri ayá wí nariñorini. Á má takisí nání nigwí nearáparigíáwa tñi íwí néra warigíá wíniyí tñi nikumixiniri emearigíorini.’ rarigíáрини. Agwi e niriro aí idáná nioni yariñápi tñi Jono yariñípi tñi aiwániní ná wéánáyí re ripíriáрини, ‘Á má imóniño tñi Jono tñi Gorixoyá diñí tñi naní yagíáрини.’ ripíriáрини.” urinínigini.

Anj bi bimi nweáýí xíomi diñj miwikwíroarinagía uréwapiyiñj nánirini.

²⁰ Jisaso e nuríísáná áamá e epiroyí egíáyo nuriríná anj o emimí obaxí wíwapiyiñjpi yoí niriri áamá ayo nweagiáýí wigí íwí yarigíápi ríwímíni nimamoro nisaníro miñweá éagía mixí nuriri ²¹ re uríñiniginí, “Korasiniyo nweáyíné aweyi! Síá wiyi seyíné majiá seaorínfáriní. Gorixo xeaniñj ríá tíñj seaikárinfá enjagi náni diñj sipí oseainini. Betisaida nweáyíné aweyi! Síá wiyi seyíné ení majiá seaorínfáriní. Ayí ripi nánirini. Emimí segí anjyo seaíwapiyiñjpi émáýí anj yoí Taiayi riniñjyo tíni Saidoniyi riniñjyo tíni niwíwapiyiri siñwiriýí, áamá anj apiaúmi nweáyí enjíná wigí íwí yarigíápi náni piaxí niweániro ayá íá nixiriniro náni iyíá írikwí pániro ríá uráwíyo iwieániro yaniri egíáriní. ²² Nepa searariñjini. Síá Gorixo áamá niyoni mí ómómiximí eníáyimi áamá Taia nweáyo tíni Saidoni nweáyo tíni winíápa axípi seainíamani. Seyínéyá seáyi e imónini. ²³ Kapaneami nweáyíné ení ‘Gorixo anjnamí náni nineaménapínfáriní.’ riyaiwiaríñjoi? Oweoi! Ríá anjñj wearíñjyo náni wepíríáriní. Emimí nioni segí anj e seaíwapiyiñjpi enjíná Sodomí nweáyí, rikikiríó yariñagía Gorixo ríá mamówárinjyí siñwí ninaniro siñwiriýí, ayí nisaníro agwi nweañwá re náni niñweaxa baníro egíáriní. ²⁴ Nepa searariñjini. Síá Gorixo áamá niyoni mí ómómiximí eníáyimi Sodomí nweaagíáyo winíápa xixeni axípi seainíamani. Seyínéyá seáyi e imónini.” uríñiniginí.

“Nioni tíámíni nibirínáyí, diñj emimówári inipíráoi.” uríñj nánirini.

²⁵ Jisaso e nurimáná Gorixomí xwiýíá ririmí niwiríná re uríñiniginí, “Gí ápoxini, Áminá anjna imixiri xwíá imixiri neri tíñoxini, xwiýíá nioni urariñá ripi náni áamá ‘Nioni nijfonirini. Go nirewapiyiniñjoi?’ yaiwinarigíáyo yimárori áamá niaíwí onimiápia yapi ‘Anjñj onirewapiyípoi.’ yaiwinarigíáyo wíá urókiamori éagi náni yayí seáyimi dání orimemini. ²⁶ Ápoxini, joxi e simónariñjagi náni dixí diñj tíni e imónini.” nuriri ²⁷ áamáyo re uríñiniginí, “Gí ápo xwiýíá amipí oyá nipini bi yumí miní nipini íániñj niepíxíniasinjirini. Áamá níni aiwi wo xegí diñj tíni xewaxoní náni nijjá mimónini. Gí áponi nijjá imónini. Áamá wo xegí diñj tíni gí ápo náni ení nijjá mimónini. Xewaxonini nijjá imóniñjini. E neri aí áamá xewaxoní ‘Gí ápo náni xe nijjá oimónípoi.’ niyaiwiri o náni wíá wókímixariñjáyí ayí ení gí ápo náni nijjáriní. ²⁸ Ayínáni sekaxí ‘Ripi époi. Ripi époi.’ niríga uñjpi pírániñj ouxídiminiri neríná sañj xwé nimearíñj nimeámi nuro anjñj seainariñjyíné, nioniyá diñj tíni sá nweapíri náni nioni tíámíni bípoi. ²⁹ Nioni áamá nipenioni nimóniri seáyi e mimónariñjóni enjagi náni sañj nioniyá íkíániñj xwanjwí níkwónimi nurínáyí nioni searéwapiyíáná segí diñj emimówári inipíráoi. ³⁰ Ayí ripi náni searariñjini. Xwiýíá nioniyá sañjñjñj nimeámi upírípi ayí sañj seainimeniñjoi. Nayí seainí enjagi náni ananirini.” uríñiniginí.

“Sabariáyo ŋwíárini.’ riniŋíyo pí nání xórórí yariŋoi?” urigíá nánirini.

12 ¹Íná Sabariá wiyimi Jisaso t́ni wiepisariŋowa t́ni óí wítí omiŋí áwinimi iniŋíyo nuróná wiepisariŋowa agwí wíagi wítí siyí siŋí yiyírini yariŋagia ²Parisiowa siŋwí e niwiniro omi re urigíawixini, “Dixí wiepisariŋowa ‘Sabariáyo ŋwíárini.’ riniŋíyo aiwá pí nání miariŋoi?” uríagia aí ³Jisaso re uriŋinigini, “Eŋíná negí mixí ináyí Depito t́ni xegí nikumixiniri emearigíáwa t́ni agwí wíáná egíápi Gorixoyá Bikwíyo ríwamiŋí niriniri eániŋípi sini íá miroariŋí reŋoi? Oweoi, soyíné íá nirooro aiwi diŋí nipikwini mimoariŋoi. ⁴Depito seniá aŋí Gorixo náni aiwá peaxí tarigíuwámi nipáwiri biskeriá Gorixo náni peaxí tarigíápi o t́ni xegí ámá t́ni náni ‘Ŋwíárini.’ riniŋípi —Api ‘Sa apaxípániŋí imónigíáwani anani nipaxírini.’ riniŋípirini. Biskeriá api apaxípániŋí imóniŋí xwéo umeafáná Depito nurápiri níagi aiwi Gorixo mixí bi muriŋinigini. ⁵Ŋwí ikaxí eániŋíyo dáni re riniŋípi eni sini íá miroariŋí reŋoi, ‘Sabariáyo apaxípániŋí imónigíáwa aŋí Gorixo náni ridiyowá yariŋíuwámi nipáwiro ridiyowá neróná síá “Omiŋí ńni ŋwíáxini.” riniŋíyi xórórí nero aiwi xwiyíá meárinariŋíámani.’ niriniri eániŋípi íá miroariŋí reŋoi? Soyíné íá nirooro aiwi sini nipikwini diŋí mimoariŋoi. ⁶Apaxípániŋí imónigíáwa Sabariá ayimi xórórí nero aiwi aŋí Gorixo náni ridiyowá yariŋíuwámi dáni nero náni xwiyíá mimeárinipa yariŋíárini. E neri aiwi ámá wo re roŋí royí aŋí ridiyowá yariŋíuwámi seáyí e múroni.” xewaniŋo náni e nuriri ⁷ámi re uriŋinigini, “Soyíné xwiyíá Gorixo riŋí, Bikwíyo eániŋí ripi ‘Nioni ámá wí wíyo wá niwianiri arirá owípoyiniri náni nimónarinini. Nioni náni ridiyowáni onípoyiniri náni minimónarinini.’ ríwamiŋí e niriniri eániŋí api náni soyíné diŋí nimoro íá nixiriro siŋwiriýí, ámá nioniyá rowami, wiwaniŋowa xwiyíá meárinipaxí mimónigíá rowami xwiyíá uxekwímoaniro éíámani. ⁸Ámá imóniŋáoni Sabariá xiáwoni eŋagi náni ‘Sabariáyo ayí ananirini.’ ripaxí imóniŋáonirini.” uriŋinigini.

Wé kiriŋí eŋí womi naní imixiŋí nánirini.

⁹O e dáni píni niwíarimi nuri wígí rotú aŋí wiwámi nipáwiri ŋweaŋáná re eŋinigini. ¹⁰Ámá wé kiriŋí eŋí wo e ŋweaŋagi Parisiowa Jisasomi xwiyíá meáripíri náni yariŋí re wigíawixini, “Negí “Sabariáyo ŋwíáxini.” riniŋíyo ámá simixíyo naní nimixiríná xórórí mepaxírini.’ risimónarinini?” uríagia ¹¹o xixewisi ikaxí re uriŋinigini, “Soyíné woxi, sipisipí wo t́ŋoxi Sabariáyo sipisipo xwáriŋwíyo piéróánáyí, sipisipomi mimixeaariŋírani? Oweoi, apaxí mé mixeaariŋírini. ¹²Ámá sipisipí t́ni xixeni mimóniŋagi náni Sabariáyo aí ámáyo naní niwimixirínáyí, ayí ananirini.” nuriri ¹³wé kiriŋí eŋomi re uriŋinigini, “Dixí wé irú pímixei.” uríagi ámáo wé irú pímixáná wé naní wíúniŋí axípi imóniŋinigini.

14 Naŋí wíúniŋí axípi imóníagi Parisiowa niwiápínimeámi nipeyero wái e dání omi pikianiro nání mekaxí megíawixini.

Gorixo Rípeaŋo nánirini.

15 Jisaso Parisiowa xío nání mekaxí meariŋagía nání nijíá nimóniri nání e píní niwiárimí nuri oxí apixí obaxí númí xídaríŋagía simixí egíá niyoni naŋí imimiximí neríná 16 áamáyo áwaŋí uripírixiniri “Nioni síápi nání áwaŋí murimepa époyi.” urayiŋiginini. 17 Xwiyíá Gorixo riŋí wía rókiamaogí Aisaiáo níriri ríwamiŋí eaŋí ripi xixeni imóninía nání Jisaso e eŋiniginini, 18 “Aría époyi. Ámá ro gí omiŋí niariŋóniŋí imóninía nání rípeaŋáorini. Gí diŋí sixí uyiŋáorini. Gí kwíyí eni omi wáná émáyí ‘E neríná wé róniŋí Gorixo wimónariŋipi imónaniwárfani?’ yaiwipíri nání wái urepeáriníarini. 19 O nipeniorini. Ámá wí tni xixewiámi nírini wíyo xwamiání niwiri eníamani. Sími óyio dání xwamiání yariŋagi winipíríamani. 20 O áamá eŋí samiŋí niwémi emeariŋagi niwiniríná sixí miŋí eaaroariŋíwániŋí imóniŋagi niwiniríná wíyo íá wekimixiníamani. O áamá wí ramixí gwí ápiáwí wearíŋírí rixa niyupáriminiri yariŋiŋiŋí imóniŋagi niwiniríná íá supimixiníamani. Xegí e eníapa aríkí nera núsaná wé róniŋí xío yariŋipi seáyi e imóniníarini. 21 Émáyí ‘O arirá neafwiniginini.’ niyaiwiro omi diŋí ukikayopíríarini.” Xwiyíá Gorixo e riŋípi xixeni imóninía nání Jisaso nemeríná axípi e eŋiniginini.

“Oboyá diŋíyo dání yarini.” rigíá nánirini.

22 Ámá womi imíó diŋí xixéroŋáná naŋí píróniri siŋwí supáririri eŋomi Jisaso tíŋí e nání niméra nibiro wáráná Jisaso imíó mixí numáinowáririri píraniŋí wimixáná o xwiyíá riri siŋwí aniri eŋiniginini. 23 E éáná oxí apixí obaxí e epíroyí egíáyí ududí niga nuro re rinigíawixini, “Ámá royí áamá yeáyí neayimixemeanía nání aríowayá xwía piaŋíyo dání iwiaronfoyi rariŋwáo, negí mixí ináyí Depitoyá xiáworini.’ riyaiwariŋwini? Oweoi, omani.” rinariŋagía 24 Parisiowa aría e niwiro re rigíawixini, “O imíó xiráóniŋí imóniŋo —O xegí yoí bi Bieseuroyi riniŋorini. Oyá diŋíyo dání Jisaso imíó mixí umáinariŋorini.” raríná 25 Jisaso awa e rinariŋagía diŋí adadí niwiri nijíá nimóniri xixewisi ikaxí re uríŋiniginini, “Ámá gwí axírí xepixepá níróniro mixí ninirónáyí ayí aŋí miwiárekixinipaxírini. Ámá aŋí bimi ŋweáyírani, aŋí wiwámi ŋweagíáyírani, eni xepixepá níróniro mixí ninirónáyí, axípi aŋí miwiárekixinipaxírini. 26 Nioni Obo —Oyá yoí bi Setenoyi riniŋorini. Nioni oyá diŋíyo dání xegí imíóyo mixí numáinowárirínáyí, axíyí rixa xepixepá níróniro nání arige nero eŋí neániro ropíráo? Oweoi. E nero aiwi soyíné nioni nání re rariŋoi, ‘Setenoyá eŋí eániŋíyo dání imíó mixí umáinowárarini.’ rariŋoi. 27 Nioni imíó xiráóniŋí imóniŋo, Bieseuroyá diŋíyo dání imíó mixí numáinowárirínáyí, segí wiepísarigíáyí diŋí goyáyo dání mixí

umáinowárarigíárini? Ayí awa re rarigíárini, ‘Gorixoyá diñíyo dání mixí umáinowárarinḡwáriní.’ rarigíáyí nání awa xwiýá seamearipíríárini. Nioni segí wa yarigíápa yariḡagi aiwi soyíné pí nání nixekwímoariḡoi? 28 E neri aí nioni kwíyí Gorixoyápi tñi imió mixí umáinánáyí, diñí re yaiwiríni, ‘Gorixo xwioxíyo mimeámí neri neameḡweani rixa íriani?’ yaiwiríni.” nuriri 29 “Obo eḡí eániḡo aiwi Jisaso seáyi e imóniḡorini.” oyaiwípoyniri ámi xixewisí ikaxí re uriḡinigini, “Ámá wo eḡí eániḡí woyá amípí íwí meáminiríná xámi xíomi íá nixiriri gwí nijárimáná anani nipáwiri xegí amípí meanigini.” nuriri 30 amá nñi Jisasomi diñí wikwíroro xídiro epírixiniri píri rakiámí wianiro yarigíáyí nání ewayí xwiýá ripi uriḡinigini, “Ámá nioni tñámini mimónigíáyí, ayí nioni tñi mixí imóniḡwáyíriní. Ámá nioni tñi sipisipí awí meaáripa yarigíáyí sipisipí xídíxídwárfí yarigíáyíriní.” nuriri 31 re uriḡinigini, “Ayináni nioni re searariḡini, ‘Pí pí íwí yarigíá tñi amá wíyo pí pí riperiḡí umeararigíá tñi Gorixo anani yokwarimí niwiiri aiwi amá giyí amá wo Gorixoyá kwíyí tñi yariḡagi niwiniríná riperiḡí numeri “Ayí kwíyí Gorixoyápi tñi miyarinini.” umearíáyo Gorixo yokwarimí wiipaxí menini. 32 Amá giyí giyí amá imóniḡáoni píné sipí niniriri aiwi Gorixo anani yokwarimí wiiníárini. E neri aiwi giyí giyí Gorixoyá kwíyí nání píné sipí ríáyí agwi rínáraní, ná ríwíyorani, Gorixo yokwarimí wiiníá menini.’ searariḡini.” uriḡinigini.

“Íkíá sogwí naḡí wearinḡánaniḡí imóniḡini.” uriniḡí nánirini.

33 Awa “Jisaso naḡíni yariḡagi nání ‘Oboyá diñíyo dání yarini.’ ripaxí mimónini.” oyaiwípoyniri ámi xewaniḡo nání ewayí ikaxí ripi nuriri re uriḡinigini, “Soyíné íkíá wina sogwí naḡí weḡagi niwiniríná ‘Íkíá naḡínarini.’ riríni. Íkíá wina sogwí sipí weḡagi niwiniríná ‘Íkíá rina sipínarini.’ riríni.” nuriri 34 mixí re uriḡinigini, “Weaxíá miáoyíné, rixa sipíni imóniḡagíá nání arige nero píné naḡí ripíráoi? Oweoi, amá pí pí diñí aumaúmí inigíáyí e dání rarigíá eḡagi nání soyíné píné naḡí wí ripaxí menini. 35 Amá naḡíyí wigí ayá tñiḡipi mearigíápa diñí naḡíni aumaúmí niniro nání xwiýá niriríná naḡíni rarigíárini. Amá sipíyí sipí nánini diñí nimoro aumaúmí niniro nání xwiýá niriríná sipíni rarigíárini. 36 Nioni re searariḡini, ‘Gorixo amá niyoni mí ómómiximí neri xwirixí nimeríná sipí ikaxí amípí úrapí rarigíá nñi nání yariḡí imimí wiaríná e dání uripíríárini. 37 Gorixo sewaniḡoyíné rarigíáyo dání xwirixí niseameri re seariníárini, “Xwiýá tñiḡoxirini. Xwiýá mayoxirini.” seariníárini.” uriḡinigini.

Ekiiḡí nání rixiḡí urigíá nánirini.

38 E uríagi ḡwí ikaxí eániḡípi mewegíá wa tñi Parisi wa tñi re urigíawixini, “None “Gorixo rirowárenapiḡoxiráni?” yaiwiani nání

anɔnami dɔnɔ ekiyiŋɔ bi neaɔwapiyi. neaimonarini.” uriaɔia aɔ ³⁹o re uriŋinigini, “Seyine agwi rina ɔweagiayine, Gorixomi rɔwimini nimamoro segi ɔwiai riniŋipi tini iwiniŋi niga uro niga biro yarigiayine ekiyiŋi nani reaxi niseainiri seaimonariga aiwi ekiyiŋi wia rokiamoagi Jonao enipini seaɔwapiyimigini. ⁴⁰O peyi xwe womi agwiyo inimi ininana sia wiyau wiyi oriŋipa ama imoniŋaoni xwiayo inimi weŋana sia wiyau wiyi noriniarini. ⁴¹Amá enina aŋi yoí Ninipayi riniŋiyo ɔweagiayi —Ayí Gorixoyá wia rokiamoagi Jonao Gorixoyá xwiya wai urimeana ayi wigi iwi egiapi rɔwimini nimamoro nisanro ɔweagiayirini. Ayi ama woni Jonaomi seayi e imoniŋaoni re efi niromana seariga aiwi seyine ariá miniarigaia nani ama Ninipayi ɔweagiayi sia Gorixo ama niyoni mi omomiximi eniayimi niwiapinimearo xwiya seamearipiririni. ⁴²Gorixo ama niyoni mi omomiximi eniayimi apixi enina Sibayi aŋiyo meŋweaŋi —Í mixi inayi Soromono niŋia seayi e nimoniri ririmi yarina ariá wiminiri nani aŋi aga na jiami dani biŋirini. Í ama woni Soromonomi seayi e imoniŋaoni re efi niromana seariga aiwi seyine ariá miniarigaia nani í sia ayimi niwiapinimeari xwiya seamearinirini.” uriŋinigini.

Imio xegi winiyo wirimeanŋi nanirini.

⁴³Amá ayi “Nene Jono nearana sanini onimiapi nerane aiwi imio xixeroanŋi ronini imonanigini.” oyaiwipoyiniri ami xixewisi ikaxi bi nuriri re uriŋinigini, “Imio xixeroanŋiyi mixi umainowarana ama womi pini niwiarimi nurina inigi mayimi ‘Ge ge sa onweami?’ niyaiwia nemi pia nimeginimeisana ⁴⁴re yaiwiarinirini, ‘Gi ami aŋi axi pini niwiarimi biŋae nani oumini.’ niyaiwimi nuri aŋi rixa si peariniri piranini imixariniri yariniŋa niwiniri sini ania imoniŋa niwiniri nani ⁴⁵ami nuri imio we wiumi dani wau iwi nerona xiom seayi e muroro egiayo niwirimeami nuro axomi nixixeroro e ɔwearigiirini. Xami sipi imonago aɔ inayi aga sipi ikeamoniŋirini.” uriŋinigini.

Jisasomi xinai tini xogwaoa tini nanirini.

⁴⁶Jisaso sini ama xio tiji e epiroyi egiayo xwiya urarina re eninigini. Xinai tini xogwaoa tini nibiro “Omi ge dani xwiya uranirewini?” niyaiwiro baniriwamini ronana ⁴⁷ama wo re uriŋinigini, “Ai, dixi rinai tini rigwaoa tini joxi xwiya riranro nani wai e biraiyi ronoi.” uriaŋi aiwi ⁴⁸o re uriŋinigini, “Ayí neparini. Gi inoki tini gwaoa tini wai e niroro aiwi ama aga gi inokwa gwaoa imonigiayi ayi giyirini?” nuriri ⁴⁹xegi wiepisanigiyi we arixa niwiri ama omi re uriŋinigini, “Gi inokwa gwaoaninini imonigiayi ama ti ɔweagiayirini. ⁵⁰Ayi ripi nanirini. Ama giyi giyi gi apo anɔnami ɔweaŋo wimonariniŋipi yarigiayi ayi gi gwaoa napwa inokwaninini imonigiayirini.” uriŋinigini.

Ewayí ikaxí wítí siyí wiáronjí nánirini.

13 ¹Jisaso síá ayimi añjyo píni niwiárimi nipeyari ipí mañjápá tñi éí niñweari ²ámá oxí apixí ayá wí epíroyí wiariñagía náni ewé bámi nipixemoániri éí niñweari oxí apixí náni sini ipí imañjápá tñi roñáná ³ewayí xwiýá ayá wí nura nuríná re uriñinigini, “Ámá wo (Nene ayé siyí niwiároa nuríná yariñwápa) o xegí omiñjyo wítí siyí niwiároa uminiri náni nuri ⁴rixa xwía yuni ikixeárinije pírániñjí niwiárori aí wí óí mañjápá tñi piéroríyí injí nibiri mimáni enjiginini. ⁵Ámi wí síñá ínimi yapiniñáná xwía seáyi e onimiápi enjyo piéroríyí xwía akwiníáná enjagi náni apaxí mé nerápiri niyapiri aiwi ⁶sogwí niwepíniri xaíwí anáná mími rapinjí miwárinjé enjagi náni yeáyí yiweánárinjiginini. ⁷Ámi wí emí pipinjí arfkiárinije wiáronjyí emí pipinjyó dáni nawíni nerápipimáná emí xerwirárinjagi náni wítí ayí ná miweñiginini. ⁸Ámi wí xwía nañjyo wiáronjyí nerápiri niyapiri ná nikikireánirfná wí aga diñjí nimori íá miropaxí weri wí xwé obaxí weri wí xwé onimiápi weri enjiginini.” Jisaso ewayí xwiýá e nuriri ⁹re uriñinigini, “Seyíné wítí siyí náni ríá api náni arfá ókiarí nimónipoyi.” uriñinigini.

“Ayí ripi náni xixewisí ikaxí tñi searariñini.” uriñjí nánirini.

¹⁰Wiepisariñowa idáná Jisaso xegípi ñweañáná nibiro yariñjé re wigáwixini, “Joxi ámáyo nuréwapiyirfná ewayí xwiýá tñi pí náni urariñirini?” uríagía ¹¹o re uriñinigini, “Xwiýá enjíná dáni Gorixo xwioxíyo mimeámí niseairi seameñweaníápi náni yumí imóniñjipi nioni soyíné niñjía imónipíri náni áwanjé niseairi aiwi ámá wíyo áwanjé murariñini. ¹²Ayí ripi nánirini. Ámá nioni xwiýá rarfná arfá niro diñjí níkwíroero nero niñjía bi tñjé imónarigíá giyí giyí Gorixo ámi wí mini winiñjoi. Arfá minipa ero diñjé minikwíropa ero yarigíá giyí giyí ‘Niñjía ripi imóniñjini.’ yaiwariñagía aí Gorixo api aí ámi nurápinijoi. ¹³Ayináni ámáyo nuréwapiyirfná ewayí xwiýá tñi urariñirini. Ámá nioni diñjé minikwíropa yarigíáyí ewayí xwiýá nioni rariñjapi arfá niniro aiwi míkí náni diñjé mimopa nero niñjía wí imónarigíámani. ¹⁴Ayí e yaríná xwiýá Gorixo riñjé wía rókiamoagí Aisaiao niriri ríwamijé eañjé ripi rixa xixeni imónarini, ‘Seyíné arikwíkwí niwiwo segí arfá píróniro siñwí supáriro nero náni arfá niwía nuro aí niñjía imónipíriámani. Siñwí niwíga nuro aí diñjé wí mopíriámani. ¹⁵Ayí ripi nánirini. Segí diñjé tñi néra warigíáyiné miñjé síñániñjé imoñagía náni searariñini. Wigí siñwí misupáripa ero arfá mipíróniipa ero nero siñwiriyí, wigí siñwí tñi siñwí aniro arfá ero diñjé pírániñjé neyíroero moro wigí íwí yarigíáyí ríwímíni mamoro éánáyí Gorixonni pírániñjé wimixipaxirini.’ Xwiýá api xixeni imónini náni ámáyí e yariñjoi. ¹⁶E neri aí gí seaiepisariñáooyiné segí siñwí tñi siñwí naniro arfá tñi arfá niro nero náni yayí oseainini. ¹⁷Aga nepa searariñini, ‘Wíá

rókiamoagiá obaxíyí t́ni áamá wé rónigiá obaxíyí t́ni eni soyíné siḡwí naniro aríá niro yarigiá ripi nání “None siḡwí winíwanigini.” niyaiwiro aga niwimóniri aí wí aríá niro siḡwí naniro yagiámani.’ searariḡini.” uriniginini.

Wití siyí wiáronḡí míkí nání áwanḡí uriḡí nánirini.

¹⁸E nuriri re uriniginini, “Ewayí xwiyíá áamá wo nuri wití siyí wiáronḡípi míkí nání áwanḡí osearimini. ¹⁹Wití siyí wiáronḡíyí xwiyíá Gorixo xwioxíyo mimeámí neri seameḡweanípi nánirini. Áamá xwiyíá api aríá nero nijíá mepa éíáyí ayí wití siyí óí maḡpá t́ni piéronḡípiḡini imóniḡoi. Ayí aríá wiaríná obo, aríkí yariḡo nibiri ayí Gorixomi diḡí wikwíropírixiniri xwiyíá api wigí xwioxíyo miniḡíyí emi riroámí yariḡirini. ²⁰Áamá xwiyíá api aríá niwiríná axíná yayí nero ‘Nanḡirini.’ yaiwíááyí, ayí wití siyí síḡá ínimi yapiniḡaná xwíá seáyí e akwiníánái eḡíyo piéronḡíyíniḡí imóniḡoi. ²¹Wití siyí síḡá ínimi yapiniḡagi nání rapini ná ínimi miwáripa eḡíyíniḡí áamá ayí eni wigí diḡí rapiniḡini xwíáyo mímí íá mumixiḡagi nání áamá wí ayí xwiyíá api xídarigiá nání xeaniḡí wikáráná apaxí mé píni wiárarigiárini. ²²Áamá xwiyíá api aríá niwiro aiwi wigí yarigiápa sini níxídirónáyí amipí xwíáyo dánḡí ayá t́ḡípi nání diḡí obibaxí moro ‘Amipí wí nioni minimúropa onini.’ yaiwiro ‘Amipí ayá t́ḡípi arige nimeámíáríani?’ yaiwiro néra warigiáyí ayí wití siyí emí pipini kikiḡipeárigie piéronḡíyíniḡí imóniḡoi. Wití emí xewiráriḡagi nání ná miwepa eḡíyíniḡí áamá ayí eni ‘Amipí ayá t́ḡípi arire neri meámíáríani?’ yaiwarigiápi xwiyíá Gorixoyápi mi yokwarimí éáná omi aniḡí miní xídarigiámani. ²³Áamá xwiyíá api aríá niwiro nijíá éíáyí ayí wití siyí xwíá nanḡíyo piéronḡíyíniḡí imóniḡoi. Wití api ná kikiḡeániḡíyíniḡí áamá ayí eni ná niweríná wí diḡí nimori íá miropaxí weri wí xwé obaxí weri wí obaxí onimiápi weri yarigiárini.

Ewayí ikaxí ripikíyí wití omiḡíyo yapini nánirini.

²⁴O “Agwi Gorixo áamá sipíyí wigí diḡí t́ni xe néra úrixiniri siḡwí niwiniri aiwi ríwéná ríáyo ikeáriníárini.” oyaiwípoyiniri ewayí xwiyíá ámi xegí bi nuriri re uriniginini, “Gorixo xegí ámáyo xwioxíyo mimeámí neri meḡweáminiri nání yaríná imóniḡípi, ayí áamá wo xegí omiḡíyo xwíá yuní níxixémáná wití siyí wiáronḡípi t́ni ríramiḡíyí epaxírini. ²⁵Wití siyí niwíároárimáná xegí aḡíyo nání nuri sá weḡáná o t́ni símí t́ni inarigiáo nibiri re eḡiniginini. Ripikí siyí wití siyí wiároniḡe seáyí e niwíároárimi uḡiniginini. ²⁶⁻²⁷Niwíároárimi numáná eḡáná rixa wití nerápiri niyapiri rixa ná kikiḡeánimiri yaríná omiḡí xíáwomi omiḡí wiárigiáwa siḡwí winíáyí winigiáwixini. Ripikí aí t́ni nawíni eḡagi niwinimi nuro bosomi re urigiáwixini, ‘None “Joxi dixí omiḡíyo siyí nanḡíni wiáronḡíni.” neaimónarini. Arire neri ripikí eni nerápiri yapíríani?’ uríagiá ²⁸o re

uriñinigini, ‘Gí símí tñni inarigwílo enjírani? Oyi, orini!’ uríagi xegí omiñí wiarigíáwa yariñí re wigíawixini, ‘None nurane ripikíyí yíyoámí yaniréwini?’ uríagiá aí ²⁹o re uriñinigini, ‘Oweoi, soyíné ripikíyí yíyoámí neríná wítí aí tñni yíyoámí epírixiniri ³⁰aiwá mipíríná nání nini xe oeniri siñwí winípoysi. Wítí rixa yóí enáná wítí miwákwímí yarigíáwami re urimíárini, “Xámi ripikíyí miwákwímí nero áwini e gwí nikiríwímáná ríá ikearáírixini. E nemáná wítí miwákwímí nero aiwá aní nitiarigíwámi nitírixinini.” urimíárini.’ uriñinigini.” Jisaso ewayí xwiýíá e uriñinigini.

Ewayí ikaxí masité siyí nánirini.

³¹O áamá re oyaiwípoyniri “Agwi áamá obaxí Jisasomi mixídariñagiá aiwí ríwíyo Gorixo xegí áamáyo xwioxíyo mimeámí neri umeñweañánáyí Jisasoyá áamá obaxí imónipíríárini.” oyaiwípoyniri ewayí xwiýíá ámi bi nuriri re uriñinigini, “Gorixo seyíné xwioxíyo mimeámí niseairi seameñweaníápi, ayí masité aiwá siyíñiñí imónini. Masité aiwá xegí siyí aga onimiá imónini. Masité siyí nimearo omiñíyo moárarigíáyí ³²aiwá siyí niyoni masité siyí aga onimiá enagi aiwí rixa niyapiri xwé niroríná íkíániñí roñáná iñí nibiri niñweari yéwí tipaxí imónariñírini.” uriñinigini.

Ewayí ikaxí yisí nánirini.

³³O ewayí xwiýíá ámi bi nuriri re uriñinigini, “Gorixo xwioxíyo mimeámí niseairi seameñweaníápi, ayí yisíñiñí —Yisí bisíkeriá sini siñí enáná bi onimiápi ínimi táná nimini íkwianjwí eapinariñírini. Gorixo xwioxíyo mimeámí niseairi seameñweaníápi, ayí yisíñiñí imónini. Apixí bisíkeriá sini siñí diramixí xwé sixí íniñáná yisí bi nimearo ínimi táná nimini íkwianjwí eapinariñírini.” uriñinigini.

Ewayí xwiýíá tñnini uréwapiyiñí nánirini.

³⁴Jisaso oxí apixí e epíroyí egíáyo xwiýíá api nipini nuréwapiyiríná ewayí xwiýíáni nuriri uréwapiyayiniñinigini. ³⁵Xwiýíá Gorixoyá wíá rókiamoagí wo niwuriyiri ríwamiñí eañí ripi, “Nioni xwiýíá niriríná ewayí xwiýíáyo dání riri xwiýíá Gorixo xwíá imixiñíná dání ínimi riniñípi áwaní riri emíárini.” niriri eañípi xixeni imónini nání Jisaso nuréwapiyiríná ewayí xwiýíá tñnini nuriri uréwapiyagírini.

Ewayí ikaxí ripikí nání uriñípi míkípi áwaní uriñí nánirini.

³⁶O oxí apixí e epíroyí egíáyo píni niwiárimimi nuri aníyo nipáwiri ñweañáná xegí wiepíariñjowa niñiro re urigíawixini, “Joxi nearéwapiyiríná ewayí ikaxí ripikí nání nearípi áwaní nineariri pírániñí nearéwapiyi.” uríagiá ³⁷o re uriñinigini, “Áamá wítí siyí naní wiáronoyí áamá imóniñáoni

nánirini. ³⁸Omiñíyí ayí xwíá rírí nánirini. Wití siyí nanjáyí, ayí áamá Gorixo xwioxíyo mimeámí neri umeñweaníáyí nánirini. Ripikíyí ayí áamá Gorixomi muxídarigíáyí, áamá oboyáyí nánirini. ³⁹Símí tñí inarigíío, ripikí siyí wiáronjo, ayí Oborini. Aiwá yóí enjagi mipírínáyí ayí síá yoparíyí nánirini. Wití miwákwímí nero mipíríáyí, ayí anjínajírini. ⁴⁰Ayináni ripikíyí miwákwímí nero gwí nikiríwímáná ríá ikeaarígíápa imóniñíyí síá yoparíyimi axípi e imónáná ⁴¹ámá imóniñáoni áamá rikikírío ero wa eni nene yariñwápi oépoyniri wíwapíyiro yarigíáyí gí ápo meñweané ñweapírixiniri gí anjínajowa awí eámeámí epírí urowárimíáriní. ⁴²Urowáraná awa awí eámeámí nemáná ríá ápiáwí xwé anjñí wearíñírími ikeaaráná ayí e dání ‘Yeyi!’ niri magí íronipíríáriní. ⁴³E neri aí oxí apixí wé rónigíá Gorixoyáyí xío xwioxíyo mimeámí neri umeñweané dání sogwí naniríná yariñpa xixíeá siñáni inipíríáriní. Seyíné aríá tígíáyíné enánáyí, aríá ókiarí nimónípoyi.” uríñiginí.

Ewayí ikaxí ayá tñí imóniñí wí píní weñípi nánirini.

⁴⁴O áamá re oyaiwípoyniri, “Gorixo xwioxíyo mimeámí niseairi seameñweaníápi ayá tñípíníñí imóniñagi nání Jisaso pí pí nearíagi aí xixeni éwaniginí.” oyaiwípoyniri ewayí xwiyíá re uríñiginí, “Gorixo xwioxíyo mimeámí niseairi seameñweaníápi, ayí xwíá bimi wí e ayá rimixariñípi wí píní tñiñípíníñí imónini. Áamá wo nemeárná weníñí neri niwíniameari yayí nikáriniri nání re enjiginí. Mírí nuri áamá wíyo áwaní murí xegí amípí nñí ñígwí nání bí neri ñígwí api tñí nimeámi nuri xwíá apini bí enjiginí.” uríñiginí.

Ewayí ikaxí memiá nánirini.

⁴⁵Ámi re uríñiginí, “Gorixo xwioxíyo mimeámí neri píraníñí seameñweaníápi, ayí áamá amípí mimúroníñí wo memiá awiaxíni awiaxíni nání píá emearíñípáníñí imónini. ⁴⁶Bá niyoni múroníñagi niwíniemeárimo anjñí nuri xegí amípí nñí bí nemáná ñígwí api tñí memiá pá bí enjiginí.” nuriri, “Gorixo xwioxíyo mimeámí nineairi neameñweaníápi ayá tñípíníñí imóniñagi nání Jisaso pí pí nearíagi aí xixeni éwaniginí.” oyaiwípoyniri ewayí xwiyíá e uríñiginí.

Ewayí ikaxí ubení nánirini.

⁴⁷O re uríñiginí, “Gorixo áamá xío xegí xwioxíyo mimeámí neri umeñweámíniri neríná eníápi, ayí ubení ipíyo nimamówáriro peyí xixegíni íá minariñípáníñí imónini. ⁴⁸Rixa peyí magwí miníñagi niwíniro nimíxearo ipí imañí pá tñí e nitiro éí niñweámáná peyí nanjñí neyíroto íkwiañwíyo mimeámí niyáriro sipíyí emi mimeámí egíawixini. ⁴⁹Síá yoparíyimi axípi e imónáná anjínajowa niweapiro wé rónigíáyo nimúroto sipí yarigíáyo yiyoámí nero ⁵⁰ríá ápiáwí xwé anjñí wearíñírími ikeaaráná ayí e dání ‘Yeyi!’ niri magí íronipíríáriní.” uríñiginí.

Xwiyá nañí xámiñí tñi siñí tñi nánirini.

⁵¹Wiepisariñíyo re uriñinigini, “Nioni searéwapiyariñápi nipini mki nani rixa nijá rimóniñoi?” uríagi “Oyi.” uríagia ⁵²o re uriñinigini, “Ŋwí ikaxí eániñipi mewegía nioni ninixídiro gí wiepisariñáyí nimóniro yariñí nani ayí ámá amipí mimúrónigíáyíniñi imóniñoi. Ayí wigí ayá rimixariñíapi añíyo weñími siñí bi tñi xámiñí bi tñi nimearo ámányo siwá wiarigíapa gí seaiepisariñáoyiné xwiyá eñíná Moseso niriri ríwamiñí eañípi tñi nioni agwi searariñápi tñi axípi e epíríarini.” uriñinigini.

Xío xegí Nasareti ñweáyí ríwí umogía nánirini.

⁵³Jisaso ewayí xwiyá api nura núisáná e dani píni niwiárimi nuri ⁵⁴añí xío xegí xwé iwiaronje nirémori rotú añíyo nipáwiri xwiyá uréwapiyaríná ayí ududí nero re rinigíawixini, “Ámá royí nijá emimí yariñí ripi gimi dani nijá imónífríani? ⁵⁵O añí mirariñí Josepomi xewaxo menirani? Xináí Mariaíyi miriniñirani? Xogwáowa Jemiso tñi Josepo tñi Saimono tñi Judaso tñi riniñowa re miñweagía reñoi? ⁵⁶Xinapiwa nene tñi miñweapa reñoi? E eñagi nani ámá royí arige nijá api imónífríani?” niriniro ⁵⁷wikí diñí niwóga wariñagia Jisaso xewaniño nani re uriñinigini, “Ámá xwiyá Gorixoyá wía urókiamoariñí womi añí midáñíyí aría umónarigía aí xegí e dáníyí tñi xexirímeáyí tñi o nani ‘Sa negí ámáorini.’ niyaiwiro aría umónarigíamani.” nuriri ⁵⁸ayí diñí miwikwíroariñagia nani e niñwearíná emimí xwapí miwíwapiyiñinigini.

Jono wayí umeaiariñomi pikigía nánirini.

14 ¹Íná mixí ináyí Xeroto —O Gariri piropenisí meñweañorini. O xwiyá Jisaso nani yaní niwéa wariñagi aría niwiri ²xegí omiñí wiarigíawami re uriñinigini, “Ayí nioni pikiñáo, Jono wayí numeaiia uñorini. Rixa xwáripáyo dani niwiápínimeari nani emimí ayí néra warini.” uriñinigini. ³⁻⁴Ayí ripi nani Xeroto e uriñinigini. Xami O Jono sini emearíná xegí xexirímeáo Piripoyá apixí Xerodiasíyi riniñí nurápiri meáagi nani Jono xwiyá re urarayiñinigini, “Dixí ririxímeáoyá apixí nurápiri nimearínáyí, ‘Ayí Nipikwini yariñini.’ riyaiwinariñini?” urayariñagi nani Xeroto xegí porisíyo uowáráná awa nuro omi íá nixero gwí niyiro nimeámi nibiro gwí añíyo ñwiráriñagia ⁵Xeroto Jono nani “Omi opikímíni.” niyaiwiri aiwi ámá oxí apixí “Jono Gorixoyá wía rókiamoariñí worini.” yaiwiarigía eñagi nani wáyí neri “Nioni eni nipikipírixini.” niyaiwiri sa gwí añíyo wariñinigini. ⁶E niwárimáná eñáná síá Xerotomi xináí xiriñíyi imónáná Xeroto xegí ámá wa tñi aiwá nimixiro naríná omi xiepi Xerodiasími xemiái nibiri áwini e nirómáná siminiñí eñinigini. Í siminiñí yaríná Xeroto siminiñí í yariñípi nani

yayí niwiniri 7 xwíá e dání re uriñinigini, “Nioni jíxi símimañño dání rirariñini, ‘Pí pí nání nioni rixiñí niránáyí nisiapimíini.’ rirariñini.” uráná 8 í xinái tñí e nání nuri ámi nibiri xinái urepisípi axípi re uriñinigini, “Porisí wa Jono wayí numeaiia wariñoyá siñwí miñí niwákwiwo miño siñwí winimi nání pirerixíyo nitiro nimeámi nibiro oniapípoi.” uráná 9 Xeroto diñí sipí wíagi aiwi awa tñi aiwá nawíni narigíe dání uríagi nání porisí wami í urípi axípi sekaxí nuriri 10 uowáraná wo gwí añño nání nuri e dání Jonomi siñwí miñí niwákwiwi 11 miño pirerixíyo nitiri nimeámi nibiri miámi mini wíáná í nurápiri nimeámi nuri xinámi mini wiñinigini. 12 E éaná Jono xegí wiepisariñowa nibiro piyomi nimearo nimeámi nuro xwíá niweyárimowa nuro Jisasomi áwanjí urigíawixini.

Oxí 5,000 apimi aiwá mini wiñí nánirini.

13 Jisaso xwiýá Jono nání aríá niwiri e píni niwiárimi ewéyo nipixemoániri áma diñí meañe nání xegípi wariñagi aiwi oxí apixí obaxí añj bi bimi dánjyí “Jisaso ewéyo puñoi.” riníagi aríá niwiro yáni óíyo númi ugíawixini. 14 Jisaso rixa ipí imañpá tñí e niwiékínimeari winiñinigini. Oxí apixí obaxí xío tñí e nání bimiaríagía niwiniri wá niwianiri wigí simixíyí píraníñí imimiximí yarfná 15 sápi tñi xegí wiepisariñowa nibiro re urigíawixini, “Re áma diñí meanini. Sía wórínigini. Joxi áma níni wigí aiwá bí nero nipíri nání añj onimiápia ami ami ñweameñño nání uowárapei.” uríagía aí 16 Jisaso re uriñinigini, “Ayí nupaxí mimónarini. Soyíne aiwá wí mini wípoi.” uríagi 17 awa re urigíawixini, “Negí aiwá xwapí menini. Sa bisíkeriá wé ná wúni tñi peyí yeáyí waúni tñirini.” uríagía 18 o re uriñinigini, “Nioni tíámini nimeámi bípoi.” nuriri 19 rixa nimeámi báná re uriñinigini, “Oxí apixí níni aráyo éí oñweápoi.” sekaxí e nurimáná bisíkeriá wé wú tñi peyí waú tñi nimeari aññami siñwí nanánimáná Gorixomi aiwá api nání yayí niwiri bisíkeriá kwikwirimí neri xegí wiepisariñowami mini wíáná awa oxí apixí éí ñweáiáyo yanj niwia warfná 20 áma níni aiwá api niniro agwí ími uyiñinigini. Agwí ími uyíagi wiepisariñowa siñwí e niwiniro aiwá rixa apáni niniro e tíapia nimeamero soxí íá wé wúkaú síkwí waúmi nimeayiro aumaúmí nero magwí nímiro tigíawixini. 21 Niaíwí tñi apixí tñi niniri aiwi oxowani áma 5,000 aiwá api nigíawixini.

Jisaso ipíyo xwiriñwí nosaxa uñj nánirini.

22 Jisaso xegí wiepisariñowa aiwá áma ayí niniro tíapia soxí íáyo magwí nímiro táná re uowáriñinigini, “Nioni oxí apixí tíyo uowáraparfná soyíne ewéyo nipixemoániro ipíwami jíariwámimi nání xámi nimeápoi.” nuriri 23 awa rixa nipixemoániro úaná áma oxí apixí e epíroyí egíáyo eni nuowárapimáná Gorixomi xwiýá urimíniro nání xegípi dñwí miñño nání niyiri rixa sía nóra wariñí tñi xegípi

ŋweaŋaná ²⁴ewépá sini ipí áwini e waríná iniigí ewépámi imeamíkwí meri imiŋí eni ewé símími dáni biri neri yaríná ²⁵rixa wíá nání isíá yiniŋáná Jisaso ipíyo nosaxa nibiri wiepisariŋowami rixa wímeáminiri yaríná ²⁶awa weníŋí éfáyí winigíawixini. Jisaso ipíyo xwiriŋwí nosaxa bariŋagi niwiniro wáyí nikáriniro “Piyiŋí siwí wo ríá barini?” niriro “Yeyi!” rekárinariná ²⁷Jisaso re uriŋinigini, “Soyíné wáyí mikárinipani. Ayí nionirini. Diŋí sixí níniro ŋweápoi.” uríagi ²⁸Pitao re uriŋinigini, “Ámináoxini, ayí nepa joxi eŋánáyí, ‘Joxi eni ipíyo nosaxa nibiri nímeai.’ nirei.” uríagi ²⁹Jisaso “Bei.” uríagi Pitao ewépámi dáni nayoari Jisaso tíŋí e nání nosaxa nuri aí ³⁰imiŋí yariŋagi niwiniro wáyí éfáyí re eŋinigini. Ipíyo rixa nurípiniríná ríaiwá re uriŋinigini, “Nioni iniigí namimigini! Ámináoxini, áríwí nimeai!” uráná ³¹o aŋíni íeapá niyauri wéyo nimaxiriri nimfeyoari re uriŋinigini, “Diŋí onimiápi níkwíroarigíoyínérini. Pitaoxini, joxi ‘Jisaso yá diŋí tíni ipíyo xwiriŋwí nosaxa umfíni.’ niyaiwiri aí ámi pí nání ‘Oyá diŋí tíni e epaxonimani.’ yaiwiriŋini?” nuriri ³²awaú rixa ewéyo pixemoánáná re eŋinigini. Imiŋí yariŋípi píni wiáriŋinigini. ³³Imiŋí píni wiáráná ewéyo ŋweagíáyí miŋí ewéyo níkwírooro omi yayí numeríná re urigíawixini, “Neparini. Joxi niaíwí Gorixoyáoxirini.” urigíawixini.

Simixíyí Jisasomi amái niróniro naŋí egíá nánirini.

³⁴Awa ipíyo oriwámi dáni nirémoro aŋí xegí yoí Genesaretiyi riniŋípi tíŋí e iwiékínimeááná ³⁵ámá e dáníyí Jisasomi mí niwómixiro aŋí nipimini áwaŋí nirinárimáná wigí ámá simixí yariŋíá níni o tíŋí e nání niméra nibiro wáráná ³⁶simixíyí rixiŋí re urayigíawixini, “Joxiyá iyíá sírífíyo amái onirónípoyiniri siŋwí neanei.” nuriro níni amái e nirónayiro nání naŋí egíawixini.

Ámináyí eŋíná érowiápinigíápi nánirini.

15 ¹Íná Parisi wa tíni ŋwí ikaxí eániŋípi mewegíá wa tíni Jerusaremi dáni nibiro Jisasomi niwímearo re urigíawixini, ²“Negí aríowa érowiápinigíápi dixí wiepisariŋowa pí nání píri wiaíkmí yariŋoi? Aiwá naniríná pí nání aríowa rigíápi wé wayí mirónipa nero narigíárinini?” Jisaso yá wiepisariŋowa wé wayí niróniro aiwi xiáwowa egíápa axípi miyariŋagíá nání e uráná ³Jisaso re uriŋinigini, “Soyíné eni segí seárfawéwa érowiápinigíápimi xídaniro nání pí nání ŋwí ikaxí Gorixoyá riniŋípimi píri wiaíkmí yariŋíárinini? ⁴Gorixo riŋípi ríwamiŋí re niriniri eánini, ‘Dixí rinomi wéyo meri rináimi wéyo meri eríini.’ niriniri eánini. Ríwamiŋí ripi eni niriniri eánini, ‘Ámá giyí giyí xano nánirani, xinái nánirani, píne sípi umeararínáyí ayo emi opíkímópoyiniri siŋwí winiríini.’ E niriniri eániŋagi aiwi ⁵ámá giyí xanomirani, xináimirani, ‘Amípi nioni nisiapiri arírá sipaxípi nání Gorixomi urepeáriná eŋagi

náni bi mini siapipaxímani.’ urariŋagía ⁶soyíné siŋwí e niwiniwóná re rariŋíárini, ‘Ayí xaneyo wéyo mimepa yariŋagi aiwi apáni yariŋoi.’ rariŋíárini. Soyíné e neríná Gorixoyá riniŋíyí xórórí nero segí seáriawéwa érowiápíniŋíápini seáyi e méyoarigiárini. ⁷Naŋí riro sipí riro yariŋíoyíné, xwiyíá Gorixo riŋí wía rókiamoagi Aisaiao niwuriyiri ríwamiŋí eanŋipi soyíné náni xixeni re rinini, ⁸‘Ámá tiyí “Gorixomi wéyo pírániŋí meariŋwini.” niriŋo aiwi nioni diŋí sixí miniyipa yariŋíárini. ⁹E neróná ámáyo amipí ámá wigi diŋí tíni érowiápíniŋíápini náni nuréwapiyiróná yapí re nuriro “Xwiyíá tiyí Gorixoyáriŋi.” nuriro náni “Gorixomi seáyi e umeariŋwini.” niriŋóná Gorixoniyá woŋni surímá rariŋíárini.’ Aisaiao xwiyíá Gorixoyápi niwuriyiri soyíné náni xixeni ríwamiŋí e eanŋirini.” uriŋinigini.

“Ripi piaxí weariŋíriŋi.” uriŋí nánirini.

¹⁰“Ámá oxí apixí re epiroyí egiáyí obípoyi.” niriŋi ayí rixa aŋwi e awí eánáráná re uriŋinigini, “Aríá niniro niŋiá imónípoyi.” nuriri ¹¹ewayí xwiyíá bi nuriríná re uriŋinigini, “Amipí ámá niniro gwí nárearigiápi piaxíniŋí weariŋímani. Amipí xwioxíyo dání diŋí móíápi, ayí piaxíniŋí weariŋíriŋi.” uriŋinigini. ¹²Xegí wiepisariŋowa niŋiŋo re urigáwixini, “Joxí Parisiowami e nuriríná ‘Símiriŋí miwariŋini.’ riyaiwariŋini?” uríagi aí ¹³o Parisiowa náni ewayí xwiyíá re uriŋinigini, “Ríwéná Gorixo aiwá xío iwíá muriŋí niyoni emi yiyoámí eníárini.” nuriri ¹⁴ámi Parisiowa náni re uriŋinigini, “Soyíné awa náni ayá síwí misearopani. Awa siŋwí supárigíáwa siŋwí supárigíáyo nipemeámi warigíáwa yapí imóniŋoi. Ámá siŋwí supáriŋí wo siŋwí supáriŋí womi nipemeámi nuríná niwaúni xwáriŋwíyo piéropisíi. Ayináni ayá síwí misearopani.” uríagi ¹⁵Pitao re uriŋinigini, “Joxí ewayí xwiyíá ámá aiwá niniro gwínárearigiápi náni ríápi áwanŋí nearei.” uríagi ¹⁶o re uriŋinigini, “Gí seaiepisariŋíoyíné eni sini majiá riseainarini? ¹⁷Amipí ámá níápi aríowa egiápa wé wayí niriŋiŋo ninirínáranani, awa egiápa mé ninirínáranani, agwíyo níniŋisáná íkí nemoro náni piaxíniŋí weariŋímani. ¹⁸E neri aiwi xwioxíyo dání íwí amipí náni diŋí móíápi piaxíniŋí weariŋíriŋi. ¹⁹Xwioxíyo dání diŋí nimoro yariŋíápi ‘Sipí oimiximini.’ yaiwariŋíá ripirini. Ámá pikiri ero ámá wí tíni íwí iniro ero síwí piaxí eánipaxí imóniŋíyí niga uro íwí meari ero yapí riri ero ámá wí náni ikayíwí riri ero ²⁰yariŋíápi nimoríná wiwaniŋíyo piaxíniŋí weariŋíriŋi. E neri aí ámá wé wayí miróniŋi neri aiwá niniríná wiwaniŋíyo wí piaxí weariŋímani.” uriŋinigini.

Émáyi apixí wí diŋí xixeni wikwíronŋí nánirini.

²¹O e dání píni niwíarimi nuri piropenisí émáyi aŋí Taia tíni Saidoni tíni tíŋí e emearíná re eŋinigini. ²²Émáyi apixí Kenani dánŋí aŋí apiaú

tíñj e dání nibiri jíamine dání nuxídiríná rfaiwá re nura uñinigini, “Ámináoxini, mixí ináyí Depitomi xiáwoxini, joxi wá niwianeí. Gí miáimi imító diñj níxixérori xixeaniñj wikárarini.” nura warinagi aiwí ²³Jisaso xío eni bi murarinagi nání xegí wiepisariñowa nibiro arfíki re urayigiáwixini, “Apixí rí arfíki rfaiwá tíni neaxídarinagi nání joxi xegí miáimi imító diñj xixéroariñipi mixí numáinowárirí ‘Emini.’ urowárei.” urayíagía aí ²⁴o re uriniginini, “Nioni émáyo arirá wiminiri biñáonimani. Gí Isireriyí —Ayí sipisipí xiáwo pírániñj mimearíná ami ami uniamoariñiniñj imónigiáyirini. Ayí nání biñáonirini.” uríagi aiwí ²⁵í añwi e nibiri xómiñj niyikwiri miñj xwíáyo níkwírori re uriniginini, “Ámináoxini, arirá nii.” uríagi ²⁶o re uriniginini, “Nioni aiwá niafwi narigiápi nurápiri síwíyo mini wiarínáyí, jíxi ‘O nañj yarini.’ riyaiwariñini?” uríagi aí ²⁷í re uriniginini, “Ámináoxini, wauyene síwíniñj imóninagwi nání nepa nírarinini. E neri aí síwíyí xiáwo aiwá íkwiañwíyo éí niñweámáná aiwá niniri yuní mamówári éyí mimeání yariñirini.” uríagi ²⁸o re uriniginini, “Ineyí, jíxi aga diñj xixeni ninikwírori rariñagi nání jíxi simóníyí xixeni nimóniniñjoi.” uráná re eñiginini. Xemiáí nañj eñiginini.

Simixí obaxíyo nañj imimiximí eñj nánirini.

²⁹Jisaso e dání píni níwiárimí nuri ipí Gaririwámi nípweri díwí miñjyo nání niyiri éí ñweañáná ³⁰ámá oxí apixí ayá wí o tíñj e nání niyoamiro wí síkwí ikí egíáyo niméra yoaro siñwí supárigiáyo niméra yoaro xwiýá marí nañj píronigiáyo niméra yoaro simixí xixegíni obaxí tígiáyo niméra yoaro nero xegí síkwí tíñj e tayaríná o nañj imimiximí wiñiginini. ³¹Nañj imimiximí wariñagi oxí apixí e epíroyí egíáyí nañj píronigiáyí ámi xwiýá riro eñj kiriñj egíáyí ámi ú úroro síkwí ikí egíáyí ámi añj uro siñwí supárigiáyí ámi siñwí aniro yariñagía niwiniro ayá niriwamóniro ñwíá Isireriyíyáomi yayí seáyi e umegiawixini.

Oxí 4,000 apimi aiwá mini wiñj nánirini.

³²Jisaso xegí wiepisariñowami “Eini.” nuriri re uriniginini, “Ámá oxí apixí tiyí nioni tíni síá wíyaú rixa ñweañwáririni. Wigí aiwá nípíríyí meñagi nání nioni diñj sipí niarini. Nioni ayí agwí wiaríná nurowárirínáyí, óf e siñwí xaxá upeyiniginiri nání rariñini.” uríagi ³³wiepisariñowa re urigiáwixini, “Ámá diñj meañj riminiyoi. Gimi nurane aiwá ámá none tíni epíroyí egíá tiyí niniro agwí ími uyini nání urápaniréwini?” uríagía ³⁴o re uriniginini, “Soyíné bisíkeriá arari maxiríñjoi?” uríagi awa “Bisíkeriá wé wíúmi dánj wáú tíni peyí orá yeáyí bia tínrini.” uríagía ³⁵o oxí apixí e epíroyí egíáyo “Xwíáyo éí niñweaxa úpoyi.” nurimáná ³⁶bisíkeriá wé wíúmi dánj wáú api tíni peyí apia tíni nurápiri Gorixomi yayí niwiri kwikwirimí neri wiepisariñowami

wiayíáná awa nurápiro áamáyo yaŋí niwia úáná ³⁷ayí niniro agwí ími uyíagí wiepisariŋowa aiwá ayí niniro tíápia nimeamero soxí íá wé wíúmi dání waúmi magwí nimiro tigíawixini. ³⁸Apixí t́ni niaíwí t́ni maríái, oxowa aiwá api níáwa 4,000 imónigíárini. ³⁹Jisaso “Segí aŋí úpoyi.” nurowárimáná wiepisariŋowa t́ni ewéyo nipixemoániro nuro Magadani iwiékínimeagíawixini.

“Ekiyiŋí aŋínami dání neaíwapiyíi.” urigíá nánirini.

16 ¹Parisi wa t́ni Sajusi wa t́ni Jisasomi niwímearo “O simixíyo naŋí imimiximí neri aí ekiyiŋí wí nepaxomani.” niyaiwiro iwamió owíwapiyaneyiniro re urigíawixini, “Joxi aŋínami dání ekiyiŋí bi neaíwapiyíi.” uríagíá aiwi ²o re uríŋinigini, “Seyíné síápi t́ni yewaní eáagi niwiniríná re rarigíáyínérini, ‘Yewaní eáiyí réwí eníríenijoi?’ rarigíáyínérini. ³Wíápi t́ni eni birami dáni kipiní yariŋagi niwiniríná ‘Iníá yapiniríenijoi?’ rarigíáyínéxini. Agwíyo yewaní eari kipiní yiri yariŋagi niwiniróná xixeni ‘E nimóninijoi.’ niriro aiwi amipí nioni símimajíóniní imixariŋápi síŋwí ninaniróná ‘Gorixo e oyaiwípoyiniri ríá neaíwapiyarini?’ miyaiwiarigíáyínérini. ⁴Agwi ríná ŋweagíáyíné, Gorixomi ríwímíni nimamoro segí ŋwíái riniŋípi t́ni íwíniní niga uro niga biro yarigíáyíné, ekiyiŋí náni reaxí niseainiri seaimónariŋagi aiwi ekiyiŋí wíá rókiamoagí Jonao enjípini seaíwapiyimigini.” nurárimi ṕni niwíárimi uŋinigini.

Yisí Parisiowayá t́ni Sajusiowayá t́ni nánirini.

⁵Wiepisariŋowa bisíkeríá bi nipíri náni aríá nikeamoro Jisaso t́ni ipíyo j́ariwámíni náni nuróná ⁶o xixewisí ikaxí re uríŋinigini, “Soyíné Parisiowa t́ni Sajusiowa t́ni awayá bisíkeríá nimiga uni náni imixariŋí yisoí riniŋípi náni wáyí oseainini.” uráná ⁷wiwaniŋowa re rinigíawixini, “None bisíkeríá nimeámi mibíwá eŋagi náni o mixí nineariri neararini.” rinariná ⁸Jisaso awa e rinariŋagíá diŋí adadí niwiri re uríŋinigini, “Diŋí onimíápi níkwíroarigíoyíné, pí náni segípi re rinariŋoi, ‘None bisíkeríá nimeámi mibíwá náni neararini.’ rinariŋoi? ⁹Soyíné sini nijíá mimónipa reŋoi? Nioni bisíkeríá wé wúni kwikwirimí éáná ámá 5,000 rixa apáni náná soyíné ámi soxí íá arariyo miárigíápi náni diŋí miseainarinirani? ¹⁰Ámi bisíkeríá wé wíúmi dání waú ámá 4,000 náni kwikwirimí éáná soyíné soxí íá arariyo miárigíápi náni eni diŋí miseainarinirani? ¹¹Biaú nioni e éáná soyíné soxí íá obaxíyo miárigíá eŋagi náni nioni Parisiowa t́ni Sajusiowa t́ni yisí awayá náni xixewisí ikaxí searáná arige nero ‘O aga bisíkeríá náni mineararini.’ miyaiwí yariŋoi? Nioni re searariŋini, ‘Parisiowa t́ni Sajusiowa t́ni awayá yisí náni wáyí oseainini.’ searariŋini.” uráná ¹²xegí wiepisariŋowa rixa re yaiwigíawixini, “Nepa yisí bisíkeríáyo táná nimíga wariŋípi náni mineararinini. Parisiowa t́ni

Sajusiowa tñi uréwapiyarigíápi náni mixídipa oépyoiniri neararini.”
yaiwigíawixini.

Pitao “Joxi Kiraisoxirini.” urinjí nánirini.

¹³Jisaso piropenisí anj Sísaría Piripai tñjímíni nuri nemeríná xegí wiewisariñowami iwamíó yariñj re wiñjiginini, “Oxí apixí níní ámá imóniñáoni náni goxini rariñoi?” yariñj e wíagi ¹⁴awa re urigíawixini, “Oxí apixí ‘Ámá enjánaj wo niwíápínimeari ría yarini?’ niyaiwiro náni wí re rariñoi, ‘Jono wayí nineameaia uñoríani?’ rariñoi. Ámí wí ‘Gorixoyá wíá rókiamoagí mipé anjñami náni peyiño, Eraijaoríani?’ rariñoi. Ámí wí ‘Wíá rókiamoagí Jeremaiaríani?’ rariñoi. Ámí wí ‘Ayí wíá rókiamoagíáyí ámí woríani?’ rariñoi.” uríagiá ¹⁵Jisaso re urinjiginini, “Soyíné eni nioni náni goxini yaiwiarñoi?” uríagi ¹⁶Saimoni Pitao re urinjiginini, “Joxi Kiraisoxi, aríowayá xwíá piaxíyo dání iwiaroníoyi rariñwáoxirini. Ŋwíá aninj siñj imóniñomi xewaxoxirini.” uríagi ¹⁷Jisaso re urinjiginini, “Jonaomi xewaxoxi Saimonoxini, joxi nirariñjpi ámá wo wíá mirirókiamonjoi. Gí ápo, anjñami ñweaño wíá rirókiamóagi náni joxi yayí osinini. ¹⁸Ripi eni rirariñjini, ‘Joxi siñáninj nimóniri enj eániñoxirini. Siñá piará eapínariñj romi seáyí e ámá nioniyá siyikí imónigíáyí gí anj wiwáninj mixárimíarini. Obo tñi imónigíáyí enj neániro ámá pikipaxí imónigíáyí aiwi nioni tñi imónigíáyó wí xopirárí wipíríámani.’ rirariñjini. ¹⁹Gorixo tñj e páwipíría náni rokí kíniñj imóniñj joxi siapimíarini. Joxi xwíáyo re dání ‘Ayí sipírini.’ ránáyí, Gorixo anjñami dání eni joxi sini miripa enjáná o xámi ‘Ayí sipírini.’ riníarini. Joxi re dání ‘Ayí ananirini.’ ránáyí, Gorixo xámi émi dání eni ‘Ayí ananirini.’ riníarini.” nuriri ²⁰xegí wiewisariñowami aríá jiyikí nori ñwí ikaxí re urinjiginini, “Ámáyo nioni náni ‘O yeáyí neayimixemeanía náni negí aríowayá xwíá piaxíyo dání iwiaroníoyi rariñwáorini.’ áwanj e muripani.” urinjiginini.

Jisaso áwanj “Ninipikipíríarini.” urinjí nánirini.

²¹Íná dání o xegí wiewisariñowami siñáni áwanj re nura uñjiginini, “Gorixoyá diñjyo dání nioni Jerusaremi náni úaná negí Judayí ámináowa tñi apaxípániñj imónigíá xwéowa tñi ñwí ikaxí eániñjpi mewegíawa tñi xeaninj wiwí níkáráná wa ninipikíagiá aiwi ámí síá wiyáu wiyi óráná Gorixoyá diñjyo dání wíápínimeámíarini.” uraríná ²²Pitao Jisasomi xewi jíamini nimíaumáná mixí re urinjiginini, “Ámináoxini, oweoi! ‘Gorixoyá diñjyo dání joxi nearípi wí osípyoiniri siñwí miranipa éwinjiginini.’ nimónarini. Wí nisimóniniá menini.” uríagi aí ²³Jisaso Pitaomi ríwí numori re urinjiginini, “Setenoxi, ríwí ririwámíni nipui. Joxi nioni nikiriþeaánipaxí níkáríminiri náni nirariñjini. Joxi Gorixo diñj wimónariñjyo náni mamó ‘Jisaso ríxa mixí ináyí nimóniri Jerusaremi dání neameñweañáná nioni seáyími imóniminyírfani?’ nimori nirariñjini.”

nuriri ²⁴ wiepisariŋi nowamini re uriŋinigini, “Ámá ‘Jisasomi ouxídimini.’ yaiwiarini goxi goxi re éirixini. ‘Amipí nioni nigípi nání oemini.’ yaiwíyí diŋí peá nimori re yaiwírixini, ‘Nioni Jisasomi xídarinagi nání ámá wí nibiro xeaniŋi niro nipikiro niniro aí ayí ananirini.’ niyaiwiri nixídirixini. ²⁵ Ámá Jisasomi diŋí niwikwírori xídaríná nipikipírixiniri éi menariŋi goxi goxi diŋí niyiminiŋipi aniŋi ŋwearía nání mearíamani. E neri aiwi éi mimenipa neri ‘Nioni Jisasomi diŋí niwikwírori xídarinagi nání ninipikironáyí ayí ananirini.’ yaiwinariŋi goxi goxi diŋí niyiminiŋipi aniŋi ŋwearía nání mearíarini. ²⁶ Ámá wo nioni minixídí iyíá íá nigwí amipí emeáminiri nánini néra nuri nimeáísáná xewanigo aniŋini ikeamónáná oyá amipí aniŋi nixiriri ŋweaníaríani? Oweoi! Amipí níni xwíá tíyo dání nimeari aiwi xewanigo aniŋini ikeamónáná amipí api tñi aniŋi ŋweaní nání roayíronipaxí wí menini. ²⁷ Ayí ripi nánirini. Ámá imóniŋáoni níkinimi niweapiríná xixíéá gí ápo aŋínami inariŋipi aŋínajowa tñi axípi niga niweapimáná nioni ámáyo neyírori sipí yariŋíáyo xegí eni sipí wiri naŋí yariŋíáyo naŋí wiri emíarini. ²⁸ Nepa searariŋini. Woyíné re roŋíá royíné sini mipepa egíami eŋáná nioni woyíné ámá imóniŋáoni yeáyí niseayimixemeari xwioxíyo mimeámí emía nání níkinimi roŋáná woyíné siŋwí nanipíaríani.” uriŋinigini.

Jisaso níkiniri xegí bi imóniŋi nánirini.

17 ¹ Jisaso e nuriri rixa síá wé wíumi dání wo óráná Pitaomi tñi Jemisomi tñi xogwáo Jonomi tñi awamini niwirimeámi díwí miŋí sepiá bimi nání wigípi niyiro ² niŋwearo Jisaso wiepisariŋi waú wo awa siŋwí anigíe dání re eŋinigini. O xegí bi imóniri símimaŋí oyá sogwíniŋi aniri rapirapí oyá wíá nókiríná xwiníá eaáririri eŋinigini. ³ E éáná wíá rókiamoagiá waú Moseso tñi Irajiao tñi —Awaú eŋíná pegíwaúrini. Awaú o tñí e aŋwi e nirónapiri o tñi xwiýíá rinaríná ⁴ Pitao Jisasomi re uriŋinigini, “Ámináoxini, none re niŋwearíná naŋíriní. Nioni aŋí wíkaú wiwá re opákímini. Joxi nání wiwáyí. Moseso nání wiwáyí. Irajiao nání wiwáyí.” ⁵ sini e uraríná re eŋinigini. Agwí wíá wúrariŋinigini. Agwí wíá wúraráná re eŋinigini. Agwípimi dání xwiýíá re riniŋinigini, “Ayí oyí gí niaíwí diŋí sixí uyiŋáorini. O amipí yariŋipi nání nioni diŋí yayí ninarini. O pí pí searánáyí aríá wiríini.” rinariŋagi ⁶ wiepisariŋowa aríá e niwiro xwíámi nipíkínimearo wáyí níkariniro warí iniŋáná ⁷ Jisaso awa wegíe aŋwi e nibiri wé seáyi e niwikwíarimáná re uriŋinigini, “Soyíné wáyí mepani. Wiápínimeápoi.” uráná ⁸ awa sagagí eméíáyi Jisaso ámá wo tñi miró xegípi roŋagi winigíawixini.

Wiepisariŋowa Irajiao nání yariŋi wigíá nánirini.

⁹ Awa díwí miŋí apimi píni niwíarimi niwero Jisaso óí e dání aríá jiyikí nori ŋwí ikaxí xaíwíni re uriŋinigini, “Ámá imóniŋáoni sini

xwáripáyo dáni miwiápínimeapa eḡáná soyíné éde siḡwí winiápi náni áamá wíyo áwaḡi muripa éirixini.” uríagi ¹⁰wiepisariḡowa yariḡi re wigíawixini, “Negí ḡwí ikaxí eániḡipi mewegíáwa pí náni re rarigíáriní, ‘Wíá rókiamoagi Irajao áamá aríowayá xwíá piaxíyo dáni iwiaroníoyi rariḡwáomi xámi umeaníáriní.’ pí náni rarigíáriní?” yariḡi e wíáná ¹¹o re uriḡinigini, “Irajao nibiri áamá wigí diḡi wé róniḡi imónipíri náni wái nurimeri pírániḡi imixiníáriní. ¹²E neri aí nioni re searariḡini, ‘Áamá Irajaoániḡi imóniḡi wo rixa biḡi eḡagi aiwi ayí “Xámi umeanoríani?” miyáiwí siḡwí mí miwómixipa nero wigí diḡiyo dáni símí tíni niwiro pikigíawixini. Áamá imóniḡáoni eni axípi e niniro ríniḡi niapipíríáriní.’ searariḡini.” uráná ¹³xegí wiepisariḡowa “Jisaso e nearariḡiyí ayí Jono wayí nineameaia uḡo náni rineararini? Oyi, ayí orini.” yaiwigíawixini.

Niaíwí imió xixéroariḡi womi naḡi wimixiḡi nánirini.

¹⁴O tíni xegí wiepisariḡi waú wo awa tíni oxí apixí obaxí xegí wiepisariḡi wía tíḡi e epíroyí egíe rémóáná áamá wo nibiri Jisasoyá símimanḡimi dáni xómiḡi niyikwiri re uriḡinigini, ¹⁵“Ámináoxini, gí íwo xóxwí neri aga sipí ikeamónarini. Wíni wíná ríáyo ikeááriniri iniḡiḡyo eámori yariḡagi náni joxi wá orunini. ¹⁶Joxi sini émi ḡweaḡáná nioni dixí wiepisariḡowa tíḡi re nimeámi bíagi aiwi awa naḡi minimixiyipa éíá eḡagi náni rirariḡini.” uríagi ¹⁷Jisaso aniḡi winíagi re uriḡinigini, “Seyíné agwi ríná ḡweagíáiyíné diḡi ninikwíroro mepa ero diḡi xerḡwíni moro yarigíá tiyíné, ‘O íníná nene tíni niḡweari arirá neainíáriní.’ riyaiwiaríḡoi? Nioni xwiogwí arari re niḡweari searéwapiyaríná Gorixomi diḡi niwikwíroro eḡi eániḡi oyá gíná niḡiá imónipíríáriní?” nuriri xanomi “Íwomi aḡwi re nimeámi bei.” nuriri ¹⁸rixa aḡwi e nimeámi báná Jisaso imió diḡi xixéroariḡi mixí umáináná imió píni niwíárimí úáná íwo axíná naḡi eḡinigini. ¹⁹Ríwíyo wiepisariḡowa Jisaso xegípi ḡweaḡagi niwíniro nibiro yariḡi re wigíawixini, “Pí náni imió íwomi diḡi xixéroariḡo none mixí umáináná éí mú eḡoi?” uríagiá ²⁰o re uriḡinigini, “Gorixomi diḡi onimiápi wikwíroariḡagiá náni imió o aríá niseaimi muḡoi.” nuriri xixewisí ikaxí re uriḡinigini, “Nepa searariḡini. Masité aiwá siyí negí omiḡiyo iwí urariḡwáyí aga onimiápi neri aí ríwéná nerápiri níroríná íkíániḡi roariḡirini. Segí diḡi Gorixomi wikwíróíáiyí apíniḡi nerínáiyí, ‘Díwí miḡi ripixini nuri wí e roi.’ uráná anani aríá niseaimi nuri wí e ropaxíriní. Soyíné apíniḡi nerínáiyí, amipí wí mimixipaxí imóniníámani. Níni anani epaxí imónipíríáriní. ²¹[E neri aí imió eḡi eániḡi róniḡi imóniḡiḡi Gorixomi yariḡi wiri aiwá ḡwíá ḡwiráriniri nerínáni mixí umáinipaxíriní.”]

Jisaso ámi áwaḡi “Ninipikipíríáriní.” uriḡi nánirini.

²²Jisaso tíni wiepisariḡowa tíni Gariri piropeniḡiyo awí neániróná o re uriḡinigini, “Áamá imóniḡáoni náni áamá wo miyí nuriniḡoi.

23 Miyí nuráná awa ninipikiro aiwi ámi síá wiyáú wiyi weŋáoni wiápinimeámíárini.” uríagi nání awa ayá sipí wiŋinigini.

Takisí aŋí ridiyowá yarigiúwá nání urápigíá nánirini.

24 Awa rixa aŋí yoí Kapaneamiyi riniŋipimi rémóaná áamá aŋí Gorixo nání ridiyowá yarigiúwá nání nigwí xwé waú xwiogwí ayí ayo urápayarigiáwa Pitaomi re urémeagiawixini, “Segí seaiepisariŋo aŋí Gorixo nání ridiyowá yariŋwáiwá nání nigwí waú tariŋorani?” uríagiá 25 o “Oyi.” nurimi nuri aŋíyo nipáwiri Jisaso nání e uríapi nání áwaní muriniŋáná Jisaso xámi xixewisí ikaxí bi nuriri re uriŋinigini, “Saimonoxini, diŋí joxiyá arirerini? Mixí ináyí xwíá tíyo meŋweagiáyí áamáyo takisí nání nigwí nurápiróná wigí áamá imónigiáyo uráparigiárani? Áamá xewí wíyo uráparigiárani?” uríagi 26 o “Xewíyo uráparigiárini.” uráná Jisaso re uriŋinigini, “Ayináni wigí imónigiáyi takisí nání áxeŋwarí inipaxí menini. 27 Yawawi eni Gorixo mixí ináyí aŋínami meŋweaŋoyáwawi imóniŋagwí nání awa nigwí aŋí Gorixo nání ridiyowá yarigiúwá nání áxeŋwarí inipaxí mimóniŋagi aiwi awa wikí diŋí yeaiwipírixiniri ipíwámi nání nuri kipayá nimori peyí iwamíó ápéomi maŋí íá neroámiximáná nigwí bi weŋagi winiríini. Nigwí api nimeámi nuri joxi tñi nioni tñi nání nawíni miní yeawii.” uriŋinigini.

“Go seáyi e imóniniárini?” urigíá nánirini.

18 1 Iná wiepisariŋowa “Noneyá negí wo seáyi e neaimóninífo gorini?” niyaiwiro Jisaso tñí e aŋwi e nibiro re urigíawixini, “Joxi rixa mixí ináyí nimóniri neameŋweaŋáná noneyá wo go seáyi e neaimóniniárini?” uríagiá 2 o niaíwí onimiá bimi “Eini.” nuriri áwini e nurárimáná 3 re uriŋinigini, “Nioni nepa searariŋini. Soyíné diŋí ‘Ayo seáyi e omúronimini.’ yaiwiarigiápi diŋí yaíkiá mimopa ero niaíwí onimiániŋí mimónipa ero niaíwí ‘Áamá wo seáyi e ninimóniríná ayí ananirini.’ yaiwiarigiápa axípi e miyaiwipa ero nerínáyí, aŋínami ŋweaŋoyá xwioxíyo wí páwipaxí menini. 4 Áamá ‘Seáyi e imóniŋáonimani. Niaíwí ripi yapi imóniŋini.’ yaiwíá giyí giyí aŋínami ŋweaŋo xwioxíyo míméámí neri meŋweaniápipimi nipáwiro seáyi e imónipíríárini. 5 Giyí giyí nioni ninixídiro nání áamá niaíwí ripiamíniŋí nimimónirónáyí ayí nioni eníniŋí nimimónariŋoi. 6 E neri aí áamá niaíwí ripiániŋí sini diŋí níkwíroaniro yarigiáyo mirirakí wiarigiá giyí giyo Gorixo xeaniŋí ríá tñí wikáriníá eŋagi nání sini mirirakí miwiniŋáná áamá wa síŋá tñi síŋwíyo gwí nijimáná rawirawáyo mamówáranáyí ríniŋí xwé niwiniri aiwi Gorixo wiminiri eŋipi tñi xixeni mimóniŋagi nání ayí ananirini. 7 Áamá wíyo óréamioápoyniri wíwapiyarigiáyi aweyi! Síá wiyi ayí majíá wóriníárini. Gorixo xeaniŋí wikáriníá eŋagi nání diŋí sipí wíwinigini. Áamá wíyo óréamioápoyniri wíwapiyíríá aiwi áamá e wíwapiyíáyi xeaniŋí

wímeaníá eɲagi náni aweyi! Síá wiyi ayí majiá wóriníáriní. ⁸Dixí wéú tínirani, sikwú tínirani, íwí náni nisimónirínáyí ‘O ríá aníɲí wearíɲíyo nikaáarinígini.’ ñiyaiwiri niwákwiníri emi morfíni. E ninirínáyí, ríníɲí xwé nisiníri aiwi wé rasíá sikwí rasíá eɲoxi diɲí ñiyimíɲípí aníɲí ɲwearíá náni nimearínáyí ayí ananírini. Miwákwinípa neri wé núkaúni t́ni sikwí núkaúni t́ni sini eɲánáyí, o ríáyo nisikeááriríná ayí naɲímani. ⁹Dixí siɲwíyi eni ‘Íwí api ei.’ riránáyí, ‘Gorixo ríá aníɲí wearíɲíyo nikaáarinígini.’ ñiyaiwiri siɲwíyi ñiyóníri emi morfíni. E ninirínáyí, ríníɲí xwé nisiníri aiwi siɲwí wóni aníɲoxi diɲí ñiyimíɲípí aníɲí ɲwearíá náni nimearínáyí ayí ananírini. Miyónípa neri sini siɲwí niwaúni t́ni aníɲánáyí, Gorixo ríáyo nisikeááriríná ayí naɲímani.

Ewayí ikaxí sipisipí wo aníɲíɲí nánirini.

¹⁰“Niaíwí onimiá ripia bimi peayí miwianipani. Ayí ripi náni searariɲini, ‘Aɲínají apiami awí mearoarígíáyí aɲínami Gorixoyá símimanímini ɲweaaríɲagá náni peayí wí miwianipani.’ searariɲini. ¹¹Ayí ripi nánirini. Ámá imóniɲáoni ámá íwí néra nuro aníɲí ikeamónaniro yarígíáyo náni píá neri yeáyí uyimixemeáminíri biɲáonírini.” uríɲinígini. ¹²O xixewisí ikaxí re uríɲinígini, “Segí diɲí arírerini? ‘Ámá wo xegí sipisipí 100 eɲáná wo anínáná b́b́i 99 eɲípí d́wíyo niwárimí nuri wó náni píá mepa enígini.’ riyaiwiaríɲoi? Oweoi píá eníɲoi. ¹³Ámi ríxa nimearínáyí nepa searariɲini. Yayí sipisipí 99 maníɲíɲípí náni winariɲíɲíníɲí wininíámani. Anínáo náni aga yayí seáyimi dáni wininíáriní. ¹⁴Segí ápo, aɲínami ɲweaɲoyí eni ‘Niaíwí onimiá apia yapi imónigíáyí wí oanínípoi.’ miyaiwiníni.” uríɲinígini.

“Segí wo íwí síánáyí, re éirixini.” uríɲí nánirini.

¹⁵O re uríɲinígini, “Ámá nioni ninixídiro náni ririxímeá imóniɲíyí wo íwí sikáránáyí, joxi nuri xegípi ɲweaɲagi niwíniríná joxi dixípi niwímeari íwí xío sikárípi náni yumí yariɲí wiríni. O aríá síánáyí joxi naɲí wimixíagi náni sini ririxímeá imóniɲíyí wóníɲí nimóníri eníɲoi. ¹⁶E neri aí joxi aríá misipa yariɲagi niwínirínáyí, ɲwí ikaxí nírini eáníɲípí t́ni xixeni neri ámá wa re ripíri náni, ‘None eni o yariɲí wíaná o “Oweoi, nionímani.” rariɲagi aríá wíwini.’ ripíri náni ámá waúmírani, womírani, niwirímeámi nuri obaxoyíné ámi yariɲí wiríni. ¹⁷O sini aríá miseaipa yariɲagi siɲwí niwínirínáyí, ámá nioníyá siyikí imónigíáyo áwaní uriríni. Ayo eni aríá miwipa yariɲagi niwínirínáyí, re yaiwírixini, ‘Sini nírixímeáo wí mimónini. Ríxa émáyíniɲí imóníri ámá takisí náni nigwí nearáparígíáwáníɲí imóníri neri wí eɲóníɲí imónini.’ yaiwírixini. ¹⁸Nepa searariɲini. Seaepisariɲáooyíné xwíáyo re dáni ‘Ayí sipírini.’ ránáyí, Gorixo aɲínami dáni eni soyíné sini mirípa eɲáná o xámi ‘Ayí sipírini.’ riníáriní. Soyíné re dáni ‘Ayí ananírini.’ ránáyí, Gorixo xámi

émi dání eni 'Ayí ananirini.' riníáriní. ¹⁹Ripí eni searariŋini. Xwíá tíyo dání soyínéyá waú amipí wí nání diŋí axípini nimori gí ápo, aŋínami ŋweaŋomi yariŋí axípini wíáná o aríá niwiri xixeni e wimixiyiníáriní. ²⁰Ámá nioniyá imónígiáyí waúnirani, waú wonirani, nioni seáyi e nimeanro nání awí eánáná nioni áwini e ŋweámíá eŋagi nání wigí diŋí axípi nimoro yariŋí wiarigiápi gí ápo aríá niwiri xixeni wimixiyiníáriní." uriniginí.

Yokwarimí aniŋí miní owíipoyiniri uriŋí nánirini.

²¹Íná Pitao nibiri Jisasomi yariŋí re wiŋiniginí, "Ámináoxini, ámá joxi niriŋídirí nání negí niriŋímeá wo íwí arari níkárányí, nioni eni xixeni xío níkárfípa yokwarimí wiimíáriní? 'Íwí wé wíúmi dání waú níkárfípi nání yokwarimí niwiimáná eŋáná ámi wíni níkáráná yokwarimí wiipaxí menini.' nimónarini." uríagi ²²Jisaso re uriŋiniginí, "Joxi wé wíúmi dání waú apini yokwarimí wiánáyí, 'Ayí Apánirini.' ririmiméini. Joxi aniŋí miní yokwarimí wiiríá nání rariŋini." nuriri ²³"Ámá Gorixo xwioxíyo mimeámí neri umeŋweaníáyí aniŋí miní yokwarimí wiífrixiniri ríá neararini?" oyaiwíipoyiniri ewayí ikaxí re uriŋiniginí, "Gorixo, aŋínami meŋweaŋo, o míxí ináyí wo xegí omiŋí wiariŋíáyí wami nígwí niwiri 'Ídáná awayá niapífrixiní.' niyaiwiri niwimáná niŋweaŋisáná re eŋóniŋí imónini. O 'Emá ayá wí ríxa múroníriní. Agwi awa nibiro awayá oniapípoi.' ráná ²⁴awa nibiro xíoyá urápigíápi nání awayá miní niwiríná wo xíoyá nígwí xwé ayá wí K10,000,000 urápiŋo eni nibiri aiwi ²⁵xíoyá xixeni e miwipaxí eŋagi nání míxí ináyo xegí wíami re uriŋiniginí, 'Nioni nígwí meámi nání oyá iyíá íá amipí nurápiri ámá wíyo bí époi. O eni xiepí tni niaíwí tni ámá wayá xináfwaníŋí nimóniro omiŋí wiipírfíá nání bí nero nígwípi nimeámi nibiro niapípoi.' uráná ²⁶K10,000,000 urápiŋo míxí ináyoyá agwí riwámi dání xwíáyo nipíkinimeari wauní níkáriniri re uriŋiniginí, 'Nígwí niapíŋípi nání sini diŋí níkwírori yariŋini. Ríwéná nání weniŋí neri ŋweáirixiní. Ninímeááná joxi niapíŋípa xixeni siapimíáriní.' uríagi ²⁷míxí ináyo wá niwianiri nání re uriŋiniginí, 'Nígwí nioni siapíŋípi nání diŋí peá móini. Joxi anani ui.' uríagi aiwi ²⁸omiŋí wiariŋo nipeyari xegí wío 'Ríwéná oyá eni xixeni niapíwiniginí.' niyaiwiri K100 wiŋomi siŋwí niwiniri íá níxeri siŋwí íá niyámixiri re uriŋiniginí, 'Joxiyáni ríxa xixeni niapimíniri riyariŋini?' uríagi ²⁹xegí omiŋí nawíni wiariŋíío xwíáyo nipíkinimeari wauní rixiŋí re uriŋiniginí, 'Nígwí joxi niapíŋípi nání sini diŋí níkwírori yariŋini. Ríwéná nání weniŋí neri ŋweáirixiní. Ninímeááná joxi niapíŋípa xixeni siapimíáriní.' uríagi aí ³⁰wío 'Ríwéná niapíwiniginí.' miwimóníagi íá níxirimí nuri gwí aŋíyo niŋwirárirí porisíyo re uriŋiniginí, 'Nígwí nioni wiŋápa xixeni niapáná anani íkweawárfírxini.' uríagi ³¹míxí ináyoyá omiŋí wiariŋíá wíá o e yariŋagi siŋwí niwiníro ayá winíagi nuro o épi

náni mixí ináyomi áwaná uráná ³²mixí ináyo ‘Omiñí niariño obini.’ nuriri omi rixa niwirimeámi báná o re uriñinigini, ‘Joxi omiñí niariñí sipíoxini, joxi wauní rixiñí niríagi náni nigwí ámi oyá niapíwiniñiniri siapiñápi náni diñí peá rimoíagi aiwi ámi joxi omiñí niariñí wíomi pí wikáríñinigini?’ ³³Nioni ayá niririmixiri “Dixí nigwí xe oweni.” riríagi aiwi joxi pí náni dixí wíomi ayá murimixipa éiniginí?” nuriri ³⁴wikí wóníagi omi íá nixeri porisiyo mini niwiri re uriñinigini, ‘Nigwí nioni wiñápa xixeni niapíñe náni iwaná nimépéa úríxini.’ uriñinigini.” Jisaso ewayí xwiýíá e nurimáná ³⁵xegí wiepisariñowami re uriñinigini, “Ámá nioni ninixídiro náni segí sérixímeá imónigíáyí íwí seaikáriápi yokwarimí miwiipa nerónáyí, mixí ináyo xegí omiñí wiariñí sipíomi wiñápa Gorixo eni axípi e seainíarini.” uriñinigini.

Apixí emi mimopa érixiniri uréwapiyíñí nánirini.

19 ¹Jisaso xwiýíá api nipini nuríísáná Gariri piropenisíyo píni niwiárimí nuri iniñí Jodani rapáyo nixemori Judia piropenisí ariwámíni nimeri ²ámá oxí apixí obaxí númi uxídaríná e simixí tígíayo naná niwimixa waríná ³Parisi wa Jisaso mixí ináyí Xeroto meñweañe emeariñagi niwiniro “Jono wayí numeaiá wago eñápa xewaníño xwiýíá niríríná ríá omeárini.” niyaiwiro nibiro iwamíó wíwapiyaniro náni yariñí re wigíawixini, “Apixí pí pí náni nipikwini miyariñagi niwiniiri emi nimorínáyí, ayí ananirani? Xwiýíá tñíñrani?” uríagiá ⁴Jisaso re uriñinigini, “Bikwíyo xwiýíá ‘Iwamíó amípí náni nimixiríná oxí tñi apixí tñi imixiñíri.’ riniñípi soyíne íá niroro aiwi sini nijíá mimónipa reñoi? ⁵Imixiño xwiýíá ‘Ayináni oxo xaniyaúmi píni niwiárimáná xegí apixí tñi nikumixiniríná ná ayí ná biníñiñí imónipisíñini.’ riñípi eni íá niroro aí sini nijíá mimónipa reñoi? ⁶E niriniri eániñagi náni ayaú xixegíni imónariñímani. Ná ayí ná biníñiñí nimóniri emearigíñini. Ayaú meánipisí náni Gorixo ñwiráñiñí eñagi náni wí emi mimónipa yaniginí.” uríagi ⁷Parisiowa re urigíawixini, “Joxi nearariñípi nepa eñánáyí, Moseso ñwí ikaxí niwuriyiri ríwamiñí nearíná pí náni re niriri eañíri, ‘Dixí apixími emi nimoríná “Ími aniñí emi móáriní.” niriri payí e neari wiowáñírixini.’ Moseso pí náni e riñíri?” uríagiá ⁸Jisaso re uriñinigini, “Soyíne aríkí apixí emi moaniro yariñagiá niseaniri náni xe emi omópoyiniri siñwí niseaniri aiwi iwamíó Gorixo xwíá imixiñe dání wí e eñímani. ⁹Nioni re searariñini, ‘Go go xegí apixí xámiñími emi nimori siwí piáxi weánariñípi náni maríái, ámi siñí wí nimearíná ayí íwí inariñí.’ searariñini.” uríagi ¹⁰xegí wiepisariñowa re urigíawixini, “Ámá apixí nimeámáná emi mopaxí mimónipa eñánáyí, apixí mimeapa neríná naná imónipaxíñini.’ neaimónarini.” uríagiá aí ¹¹o re uriñinigini, “Soyíne ríápi naná e nimóniri aiwi ámá nñi diñí axípi soyíne yaiwíápa yaiwipíriméoi. Sa ámá wíni wíni Gorixoyá diñíyo dání e yaiwipaxíñini.

12 Ayí ripi nání searariņini. Oxowa apixí mimeapa epaxí imóniņíyí mǵkí xixegínirini. Wa xinái agwíyo dání piái mayí xiriņí nání apixí mimeapa epaxí imóniņoi. Wa piáwí yóniņagi nání ayí awa eni mimeapaxí imóniņoi. Wa Gorixo nání wái urimepíri nání éfáwa wigí diņíyo dání eni apixí mimeapaxí imóniņoi. E neri aí ‘Gorixo nání wái nurimeríná apixí mayoni éimigini.’ yaiwiriņí go go sa e yaiwíwinigini.” uriniņini.

Niaíwí onimiápiami wé ikwikwiárimí eņí nánirini.

13 Ámá wí wigí niaíwípiami Jisaso wé seáyi wikwiáririri xwé imónipíri nání Gorixomi yariņí wiri oeniri nimeámi bariņagía wiepisariņowa siņwí e niwiniro mixí uríagía aí 14 Jisaso re uriniņigini, “Niaíwípia xe obípoi. Ámá niaíwí onimiápia xaniyaúmi diņí niwikwírooro yarigíápa Gorixomi diņí wikwírófáyí o xwioxíyo mimeámí neri umeņweaní eņagi nání niaíwípia xe obípoiwiniri siņwí winípoi. Pírí miwíáikipa époi.” nuriri 15 apiami wé seáyi e ikwikwiárimí niwimáná e dání pńni niwíárimini uriniņini.

Amipí mimúróniņí wo yariņí wiņípi nánirini.

16 Jisaso e dání waríná re eņiniņini. Ámá wo nibiri re uriniņigini, “Nearéwapiyariņoxini, nioni pí naņíyí neríná diņí niyimiņípi aniņí íníná ŋweámía nání imónimíárinini?” uríagi 17 Jisaso re uriniņigini, “Joxi pí nání naņíyí nání yariņí niariņini? Gorixo ná woni naņí imóniņagi nání joxi api nání diņí rimoariņini? E neri aí joxi ‘Diņí niyimiņípi aniņí íníná ŋweámía nání oimónimini.’ niyaiwirínáyí ŋwí ikaxí eániņíyo xídíríni.” uríagi 18 ámáo re uriniņigini, “Pí ŋwí ikaxí eániņíyí nání nirariņini?” uríagi Jisaso re uriniņigini, “Re niriniri eániņípi ‘Niwiápinimeari ámá mipikipa eríni. Ámá wí tńni íwí minipa eríni. íwí mimeapa eríni. Ámá wo nání xwiyíá niyimároniri yapí muripa eríni. 19 Dixí ápomi tńni inókimi tńni wéyo umeríni. Ámá wíyo jiwaniņoxi nání diņí sipí nisiri menariņípa axípi e wiríni.’ E niriniri eániņípi xídíríni.” uríagi 20 ámáo re uriniņigini, “Api nipini nioni xídariņárinini. Nioni bí sini mepa eņáyí gipíríani?” uríagi 21 Jisaso re uriniņigini, “Joxi ‘Pírániņí oimónimini.’ nisimónirínáyí, nuri dixí iyíá íá amipí niğwí nání bí neri niğwí nimearíná ámá uyípeayíyo mini niwimáná nibiri nioni niğwíni. E nerínáyí, amipí ayá tńpi Gorixo aņńnami joxi nání awí eámeámí siáriníárinini.” 22 Jisaso e uríagi o aría niwiri amipí xwé tńjo eņagi nání xegí xwioxíyo dání diņí ría uxéagi nání diņí sipí niyaiwia uņiniņini.

23 Jisaso xegí wiepisariņowami re uriniņigini, “Nioni aga nepa searariņini. Amipí mimúrónigíáyí Gorixo ámá xío xegí xwioxíyo mimeámí neri umeņweaní opáwianeyiniri aniņí miní nero aiwi nipáwipaxí mimónini. 24 Ripi eni searariņini, ‘Kamerí eņí rapírapí gwí kiwearigía ófyimi páwipaxí mimónini. Ámá amipí mimúrónigíáyí

kamerí ení ófíyí mipáwipa yariñfíyí yapí añínami ñweañoyá xwioxíyo páwipaxí mimóniñoi.’ searariñini.” uríagi ²⁵wiepisariñfíyí —Judayí níní “Amipí mimúrónigíáyí Gorixoyá ñíñí tñní amipí meaaríñagía náni Gorixo yayí winarini.” yaiwiagiárini. Wiepisariñfíyí ení e niyaiwiro náni Jisaso e uríagi aríá niwiróná ududí niwikáriniro omi re urigíawixini, “Joxi rífyí nepa eñánáyí, Gorixo áamá giyo yeáyí uyimixemeaníáríani?” uríagia ²⁶Jisaso siñwí agwí niwiniri re uriñinigini, “Áamá wigí ñíñí tñní Gorixoyá xwioxíyo páwipaxí mimónini. E neri aí Gorixo amipí mepa epaxí wí mimóniñagi náni oyá ñíñí jíayí tñní ayí aí anani páwipaxí imónini.” uráná ²⁷Pitao Jisaso áamáomi “Dixí iyíá íá amipí nigwí náni bí neri uyípeayíyo mini niwia numáná ninixídirínáyí, Gorixo añínami amipí ayá tññipi ritiniárini.” uríipi náni ñíñí nimori Jisasomi re uriñinigini, “Aríá ei. Amipí noneyá náni rixa pñni niwiárimí joxi rixídaríñwáyí pí meaníwáriní?” uríagi ²⁸Jisaso re uriñinigini, “Nioni nepa searariñini. Gorixo xwíá siñí wirí imixáná áamá imóniñáoni rixa mixí ináyí nimóniri meñweañáná soyíné ení negí Isireriyí gwí wirí wirí wé wúkaú sikwí waú eñíyo xiráowayínéñíñí nimóniro mí ómómiximí nero meñweapíríárini. ²⁹Áamá giyí giyí nioni ninixídiro náni wigí añiwámirani, xexirímeáowamirani, xexirímeáíwamirani, xanomirani, xináímirani, niaíwíyorani, xegí omiñírani, pñni niwiáriríná wigí amipí pñni niwiárimí uíápimi Gorixo wípi aga seáyí e múróniniárini. Ayí ení ñíñí niyimíñipi añíñí ñweapíría náni meapíríárini.” ³⁰nuriri wiepisariñowa “None Jisasomi xámi xídaríñagwi náni seáyí e imóniñwini.” yaiwipírixiniri re uriñinigini, “Agwi ríná xámi xámi imóniáyí ríwéná surímá imónipíríárini. Agwi ríná surímá imóniáyí xámi imónipíríárini.” uriñinigini.

Ewayí ikaxí wainí omiñíyo wiigíáyí nánirini.

20 ¹Jisaso ewayí xwíyíá re uriñinigini, “Añínami ñweaño áamá xío xegí xwioxíyo mimeámí neri umeñweaníayo yaní numeiríná ayí miraxwí róniñí imónini. O wíá móniñími 6:00 a.m. imónáná áamá xegí wainí omiñíyo wiipírí wirimeáminiri náni nuri ²ámá wa ‘Sía riyimi náni xixegíni íkwí wina neaiapáná omiñí siianíwini.’ uríagia xegí omiñíyo náni uowáriníñigini. ³Ámi 9:00 a.m. imónáná awí éanarigie náni nuri weníñí éfyí winiñinigini. Wa re kikiíá riwa roñagía niwiniri ⁴re uriñinigini, ‘Soyíné ení gí omiñí niipírí náni úpoyi. Síaipi tñní soyíné omiñí nííápi náni nigwí xixeni seaiapímíni.’ uríagi awa ení nuro omiñí wiigíawixini. ⁵Ámi sogwí áwini e eñáná rixa 12:00 imónáná nuri ámi wa e kikiíá roñagía niwiniri axípi e uowáriníñigini. Ámi 3:00 p.m. imónáná axípi e eñinigini. ⁶Ámi rixa 5:00 p.m. añwi e imónáná nuri ámi wa e kikiíá roñagía niwiniri re uriñinigini, ‘Sía riyi niyimini pí náni kikiíá re roñoi?’ uríagi ⁷awa re urigíawixini, ‘Áamá wo “Nígí omiñí níipoyi.”

minearfone enjagi nání roŋwini.’ uríagía o re uriŋinigini, ‘Soyíné eni omiŋí niipíri gí wainí omiŋíyo nání úpoyi.’ uriŋinigini. ⁸ Síápi tñi wainí omiŋí xiáwo bosiwomi re uriŋinigini, ‘Joxi omiŋí niariŋíawami “Eini.” nuriri nigwí mini niwiríná ríwíyo úfáwami niwia nuri xámi úfáwami niwiri píni wiárei.’ uríagi ⁹ o nuri miraxwo urípa yaríná ámá 5:00 p.m. dání úfáwa nibiríná xixegíni íkwí wináni wináni nimeáa ugíawixini. ¹⁰ Ámá wíá móniŋími dání úfáwa nibiríná nigwí seáyi e meapíróiniri éfáyí awa eni xixeni axípi íkwí wináni wináni nimeáa ugíawixini. ¹¹ Íkwí wináni wináni nimeáa nuríná miraxwo omiŋí xiáwo nání aniŋúmí ikaxí niriníro ¹² omi re urígíawixini, ‘Síápi tñi nuro omiŋí onimiápi éfáwami none wíá móniŋími dání nurane yaríná sogwí xaíwí neanarfone tñi xixeni pí nání mini wíini?’ uríagía aí ¹³ o awayá womi re uriŋinigini, ‘Gí ámaé, nioni sipí wí misikáríini. Joxi wíá móniŋími dání re miniripa réinigini, “Joxi íkwí wina niapíri nání omiŋí siimíini.” miniripa réinigini? ¹⁴ Nigwí nioni siapía dixípi nimeámi ui. Ámá síápi tñi éí ro “Nigwí xixeni axípi owimini.” nimóníagi nání joxi siapípa axípi mini wíini. ¹⁵ Amipí nioni gýí niwaniŋoni diŋí tñi niwirínáyí, “Ayí nipikwinimani.” riniaiwariŋini? Nioni yaní ewanií nimóniri yariŋagi nání joxi sipí diŋí riniaiwariŋini?” uriŋinigini.” Jisaso “None xámi xídariŋagwi aí ríwíyo xídíáyí tñi xixeni neaiapiníáríani?” oyaiwípoyniri ewayí xwiýá api nurimáná ¹⁶ re uriŋinigini, “Agwi ríná xámi xámi imóníáyí ríwéná surímá imónipíríárini. Agwi ríná surímá imóníáyí xámi imónipíríárini.” uriŋinigini.

Xífomi pikipíríapi nání ámi áwaní uriŋí nánirini.

¹⁷ Jisaso óí Jerusaremi nání warígíáyo uminiri nání neríná xegí wiepisariŋí wé wúkaú sikwí waú awami niwirimeámi ná dámine onimiápi óí e nuróná re uriŋinigini, ¹⁸ “Aría époyi. Rixa Jerusaremi nání wariŋwini. E rémóaná ámá imóniŋáoni nání miyí uráná apaxípániŋí imónigíá xwéowa tñi ŋwí ikaxí eániŋípi mewegíáwa tñi xwiýá ninimeariróná nioni nání re rinipíríárini, ‘Ámá romi opíkípoyi.’ niriníro ¹⁹ émáýí nioni riperírí nimeariro sikwíá ragí pírí nuyíkiro íkíáyo niyekwiroáriro epíri nání mini niniwiro aiwi síá wiyáú wiyi óráná xwáripáyo dání ámi wiápínimeámíárini.” uriŋinigini.

Wiepisariŋí waúmi xinái rixiŋí uriŋípi nánirini.

²⁰ Jerusaremi nání óíyo waríná Sebediomi xewaxowáú —Ayí Jemiso tñi xogwáo Jono tñinirini. Awaú tñi xinái tñi “Jisaso rixa Jerusaremi nírémoríná mixí ináyí nimóniri neameŋweaniyíríani?” niyáiwiro nibíro wauní rixiŋí uraníro nání miŋí xwíáyo íkwíróagía ²¹ Jisaso re uriŋinigini, “Sepíoyíné o pí oneainiri niariŋoi?” uríagi í xegí niaíwowaú wiepisariŋí wíami seáyi e owimónípiyiniri re uriŋinigini, “Joxi rixa

mixi ináyí nimóniri neameŋweaŋána gí niaíwí rowaú wío wé náumi dáni ŋweari wío wé onamiŋúmi dáni ŋweari episí náni rei.” uríagi aí 22 Jisaso re uriŋinigini, “Sepíoyíne yariŋí niarigíápi náni nijíá mimónipa nero náni yariŋí niariŋoi.” nuriri ewayí ikaxí áamá wa xíomi pikipíríá eŋagi náni áwaŋí nuríríná yariŋí re wiŋinigini, “Awagwí iniigí sixí nioni nimfáwá anani nipaxí imónipisírani?” uríagi awaú re urigíisixini, “Anani nipaxowawirini.” uríagi 23 o re uriŋinigini, “Iniigí nioni nimfáwá awagwí eni nipisírini. E neri aí ‘Wíoxi rími dáni ŋweai. Wíoxi rími dáni ŋweai.’ wí earipaxí mimóniŋini. Waú gowaú midimidáni ŋweapisí náni gí ápo rixa ráriŋírini. Ayináni nioni e earipaxí wí menini.” uríagi 24 wiepisariŋí wé wúkaú wía awaú Jisasomi yariŋí e wíagí aría niwiro náni wikí diŋí waiwiarigaŋía aí 25 Jisaso xío tŋí e náni “Eini.” nuriri re uriŋinigini, “Soyíne nijíárini. Émáyyá áamá áminá meŋweagiáwa seáyi e niwimóniro paimimí wiarigíárini. Wigí áamá eŋí riŋí meŋweagiáwa eni seáyi e niwimóniro ‘Xe nonenini simaŋwíyóniŋí yeáyi oneaurónipoyi.’ niyaiwiro yariŋíárini. 26 ‘Awa seáyi e niwimóniro yariŋíápa soyíne eni axípi nimóniro mepa oépyoi.’ nimónarini. ‘Gí wíami seáyi e oimónimini.’ yaiwinariŋí goxi goxi awayá omiŋí wiariŋoxiŋiŋí wimónei. 27 ‘Neaiepisariŋone woni xámi xámi oimónimini.’ yaiwinariŋí goxi goxi áamá wí joxi náni re ripírí náni, ‘O wiepisariŋí wíami xináŋiŋí nimóniri arirá wiarini.’ ripírí náni joxi e eríini. 28 Áamá imóniŋáoni yariŋápa axípi érixini. Nioni áamá wí arirá nírixiniri biŋámani. Nioni áamá niyoni arirá wiri nioni nupeiríná gwíniŋí uroyírori eminiri biŋárini.” uriŋinigini.

Siŋwí supárigíwaúmi naŋí imixiŋí nánirini.

29 O tŋi wiepisariŋowa tŋi aŋí yoí Jerikoyi riniŋíyo dáni waríná oxí apixí ayá wí númi waríná 30 re eŋinigini. Áamá siŋwí supárigíwaú ói maŋípá tŋi ŋweagiáwaú “Jisaso rimani pwarini.” rinariŋagía aría niwiri ráiawá re urigíisixini, “Áminaé, negí mixi ináyí Depitomi xiáwoxini wá yeawianei.” ráná 31 áamá obaxí Jisasomi xámi umeagiáyí rímiŋí tŋi re urigíawixini, “Awagwí ráiawá miripa épiyi.” uríagi aiwi awaú aríkí wíni eŋí tŋi re rigíisixini, “Áminaé, joxi negí mixi ináyí Depitomi xiáwoxini, wá yeawianei.” uríagi 32 Jisaso e éi nírónapimáná ói e dáni ráiawá re uriŋinigini, “Awagwí o pí oyeainiri rariŋi?” uríagi 33 awaú aŋwi e nibiri re urigíisixini, “Ámináoxini, joxi yegí siŋwí oyeaoxaniri rariŋwii.” uríagi 34 Jisaso awaú náni wá wuníagi egí siŋwíyo wé seáyi e wikwiáráná re egíisixini. Niwaúni siŋwí noxoari nanimáná númi uxídigíisixini.

Jerusalemiyo nirémoríná mixi ináyí rémoarigiápa rémoŋí nánirini.

21 1 Jerusalemi rixa aŋwi e imónáná dŋwí Oripí tŋí e aŋí yoí Betipasi riniŋípimi nirémómáná Jisaso wiepisariŋíyí waúmi

nurowáriríná ²re uriñinigini, “Awagwí anj jíapimi nání nuri dogí xinái xegí miá tñi e yurárinigagi niwiniríná niwaúni níkweari nimeámi bípiyi. ³Ámá wo siñwí neaniri ‘Awagwí pí nání íkweaarini?’ earánáyí, re urípiyi, ‘Ámináo seáyi e éi niñweari nimeámi uminiri yearowáriñoi.’ uráná xiáwo apaxí mé eaiapowárenapiniñoi.” uriñinigini. ⁴⁻⁵Wíá rókiamoagi wo niriri ríwamiñj ripi eañjpi, “Saioni —Jerusaremi nání niriro aiwi díwí bi nání Saioniyi rarigíáriní. E ñweagiáyo re urípoyi, ‘Aríá époyi. Segí mixí ináyo awayiníniñj nimóniri dogí xwéomi maríá, dogí miá womi aí niñweámáná seyíné tíámini barini.’ urípoyi.” niriri ríwamiñj eañjpi xixeni imónini nání Jisaso awaúmi e urowárinigini. ⁶Wiepisariñj awaú nuri Jisaso urípa e neri ⁷dogí miá tñi xinái tñi níkweari nimeámi nibiri wigí iyíá dogí miáomi seáyi e níkwíáriro Jisaso seáyi e niñweari nimeámi waríná ⁸mixí ináyíyo yayí wianiro nání yarigíápa ámá oxí apixí epíroyí nero númi xídarigíáyí obaxí Jisaso iyíáyo seáyi e nosaxa opuniri wigí iyíá nipíriro óf e íkwiañwí neapára uro wí wéwí iwí nidoayiro íkwiañwí neapára uro neríná ⁹xámi umeaarigíáyí tñi ríwíyo uxídarigíáyí tñi ráiwá re nura ugíawixini, “Mixí ináyí Depitomi xiáwo romi yayí seáyi e dání oumeaneyi. Ámá Áminá Gorixo urowárenapiniñj ro —Negí aríowa o nání weníñj neri ñweañáná xwiogwí obaxí múroagíriní. O Gorixoyá diñj tñi seáyi e imóníwinigini. Gorixo seáyi émi ñweañomi yayí seáyimi dání oumeaneyi.” Ríaiwá e nira nuróná oxí níkéa nuro ¹⁰rixa Jerusaremi rémóáná e ñweagiáyí mírí mírí neamero re rinigíawixini, “Ámá o go nání ría rariñoi?” rinaríná ¹¹oxí apixí xío tñi warigíáyí re urigíawixini, “Gariri piropenisíyo anj yof Nasareti dáño, Gorixoyá wíá rókiamoariñj Jisaso nání rariñwini.” urigíawixini.

**Ámá anj ridiyowá yarigíawámi ínimi dání bí
inarigíáyí emi nimeámi enj nánirini.**

¹²Jisaso anj Gorixo nání ridiyowá yarigíawámi nipáwiri ámá anj iwámi ínimi dání bí inarigíáyo mixídámí wiowárirí ámá nigwí senisí ninayiro tarigíáyíyá íkwiañwí mimiwiárí eri ámá inj xawiówí ridiyowá nání bí inarigíáyí íkwiañwí éi ñweaarigíápi mimiwiárí eri neri ¹³mixí re uriñinigini, “Anj riwá nání ríwamiñj re niriniri eánini, ‘Anj Gorixoniyáiwá ámá xwíyíá ririmí nipíríá náníwáriní.’ niriniri eániñagi aí soyíné íwí meaarigíáyí yarigíápa axípiniñj nero nání anj riwá íwí meaarigíáyíyá anjiniñj imónini.” uriñinigini. ¹⁴E nuriri sini anj Gorixo nání ridiyowá yarigíawámi ínimi emearíná siñwí supárigíáyí wí tñi síkwí ikí egíáyí wí tñi o tñj e nání báná o nanj imimiximí wíagi ¹⁵apaxípániñj imónigíá xwéowa tñi ñwí ikaxí eániñjpi mewegíáwa tñi Jisaso emimí e éipi siñwí niwiniro niaíwí o nání anjwámi ínimi dání ráiwá re nira wariñagía, “Negí mixí ináyí Depitomi xiáwo romi seáyi

e oumeaneyi.” nira warigagía aría e niwiro nání wikí diñj niwiaiwiro¹⁶ mixí re urigíawixini, “Píne niaíwí joxi nání rarigíáyí aría riwiñini?” uríagía Jisaso re uriñinigini, “Oyi, aría niwiri aiwí soyíné xwiyíá Gorixo nání re niriniri eániñipi, ‘Diñj joxiyáyo dání niaíwí onimiápia tñi sini amiñj nariñipia tñi yayí seáyimi dání rimepírírini.’ niriniri eániñipi soyíné íá niroro aí rixa agwi xixeni imóníagi niwiniro aí sini diñj mimoarñoi.” uriñinigini.¹⁷ E nurimo awami píni niwiárimi nipeyari añj apimi píni niwiárimi nuri añj yoí Betani nání nuri e sá weñinigini.

Íkía pikína ramixiñj nánirini.

¹⁸ Sá wejo wíápi tñi ámi Jerusaremi nání nibiríná agwí wíaná¹⁹ weniñj éiyí winiñinigini. Íkía pikí wina ói e júna roñagi niwiniro “Sogwí bi odanimini.” niyaiwimi nuri añwi e dání weniñj éiyí winiñinigini. Sogwí miwepa iwíni ináriñagi niwiniro íkíanami niramixiri re uriñinigini, “Íkía pikí rinaxi, sogwí wíni weríámani.” uráná apaxí mé yiweáriñinigini.²⁰ Apaxí mé yiweáriñagi wiepisariñowa e niwiniro uduđ niwiro yariñj re wigíawixini, “Íkía pikí ana arire neri apaxí mé yiweáriñoi?” uríagía²¹ Jisaso re uriñinigini, “Nioni nepa searariñini, ‘Soyíné Gorixomi diñj wikwíroro diñj biaú mimaxiripa ero “Gorixoyá diñj tñi íkía rina e epaxínamani.” miyaiwipa ero nerínáyí, ayí xixeni nioni yariñápa nimóniniñoi. Íkía rina nánini mirariñini. Dfwí miñj apimi aí “Ripixini nuri rawirawáyo piéroí.” uránáyí xixeni e nimóniniñoi.²² Pí pí nání Gorixomi rixiñj nuriri diñj nikwírorínáyí, xixeni axípi e simixiyiniárini.’ searariñini.” uriñinigini.

“Néní tñjoxi imónei.’ go ririñoi?” urigía nánirini.

²³ O ámi Jerusaremi nirémori rixa añj Gorixo nání ridiyowá yariñiwámi nipáwiri ámáyo uréwapiyaríná apaxípániñj imónigía xwéowa tñi wigí Judayí mebaówa tñi niwímearo re urigíawixini, “Joxi arige nimóniri amípí nene añj riwámi ínimi dání yariñwápi píri wiaíkímí yariñini? ‘Joxi néní tñjoxi imónei.’ go ririñagi e yariñini?” uríagía aí²⁴ Jisaso re uriñinigini, “Nioni eni yariñj bi oseaimini. Soyíné nioniyápi áwanj niránáyí, nioni eni ‘Api ei.’ nirío nání áwanj searimíini.” nuriri²⁵ re uriñinigini, “Yariñj nioniyá ripi seaimíini. Jono wayí nineameaia uño wayí Gorixoyá diñj tñi neameaiñrani? Xegí diñj tñi neameaiñrani?” Yariñj e wíaná wiwaníñowa re rinigíawixini, “‘Jono Gorixoyá diñj tñi eñirini.’ uránáyí, re neariniñoi, ‘Soyíné pí nání aría miwí egíárini?’ neariniñoi.²⁶ E neri aí ‘O xegí diñj tñi eñirini.’ uránáyí, ámá sipíá re epíroyí egíáyí, ‘Jono Gorixoyá wía rókiamonñoráni?’ yaiwiarigíáyí iwanj neamepepírixini.” niriniro²⁷ Jisasomi re urigíawixini, “None majíárini. Jono diñj goyá tñi eñírini?” uríagía o re uriñinigini, “Nioni eni ‘Amípí api píri wiaíkímí ei.’ nirío nání áwanj searimiméini.

Ewayí ikaxí xiráxogwáowau náni uriñí nánirini.

28 “E neri aí ewayí xwiýáa ripi náni segi diñí arire yaiwiarinjoí? Ámá wo xegí niaíwí waú tíño xámi xiráomi nuri re uriñinigini, ‘Íwe, joxi negí wainí omiñíyo náni nuri omiñí ei.’ uríagi 29o re uriñinigini, ‘Oyi, numíni.’ nurimáná muñinigini. 30 Xano xogwáomi nuri axípi ‘Omiñíyo náni nuri omiñí ei.’ uráná o re uriñinigini, ‘Oweoi, numiméini.’ nurimáná ríwíyo diñí sipí niyaiwiri ‘Gí ápomí “Oweoi.” pí náni ría uríni?’ niyaiwimi nuri omiñí eñinigini.” Jisaso ewayí xwiýáa api nurimáná 31 awami yariñí re wiñinigini, “Awaú go go xano urípa xixeni aría niwiri eñinigini?” uríagi awa “Xogwáorini.” uríagiá Jisaso re uriñinigini, “Nioni nepa searariñini. Apixí ede dání iyí oikixearigííwa tíni ámá íwí yariñí, takisí náni nigwí nearáparigíá tíni Gorixoyá xwioxíyo anani nipáwiro ñweapíría aiwí soyíné páwipaxí mimóninjoí. 32 Ayí ripi náni searariñini. Jono nibiri wé róniñí oimónipoyiniri searéwapiyíagi aí soyíné xiráo eñípa aría miwigíawixini. Apixí iyí ede dání warigííwa tíni takisí náni nigwí nearáparigíáwa tíni xogwáo eñípa Jonomi aría niwiro saniñí imónariñagía soyíné siñwí e niwiniro aí xogwáo eñípa ámi ríwíyo diñí sipí niyaiwiro ‘None pí náni aría miwipa yariñwini?’ niyaiwiro saniñí mimónigíawixini.

Ewayí ikaxí wainí omiñí siñwí uwiniarigíáyí nánirini.

33 “Ewayí xwiýáa ámi bí ripi aría nípoyi. Ámá xwíáa tíñí wo wainí uraxí iwíáa nuriri xwíná nrori wainí xegí iniñí nipíría náni wainí sogwí xoyikímí enía náni síñáyo ófí nimori wainí omiñíyo áwinimi añí awí ñweapíría náni seáyi émi nimira nipeyiri néisáná ámá wí umeipíría náni re uriñinigini, ‘Wainí sogwí níáí éánáyí, bí soyíné segi mearo nioni gí meari emía náni nioniyá omiñí ripimi anani siñwí niwinipíríarani?’ nurimi añí wíyo ememiniri náni nuri niñweañisáná 34 wainí sogwí rixa níáí éáná xegí omiñí wiariñí wami re uowáriñinigini, ‘Soyíné nuro wainí nioni náni nitííapi nurápaupoyi.’ uowáriagi aí 35 omiñí siñwí uwiniarigíáwa xío uowáriáwami womi iwaní mépero womi pikiro womi síñá earo egíawixini. 36 Omiñí xiáwo ámi omiñí wiariñí obaxí onímiápi wami uowáriagi aí omiñí siñwí uwiniarigíáwa xámiñowami wigíápa axípi wigíawixini. 37 Ámi ríwíyo o xegí xewaxo nuowáririri re yaiwiñinigini, ‘Nigí íwomiyí xwiýáa xixeni aría wipíríoi.’ yaiwíagi aí 38 omiñí siñwí uwiniarigíáwa xewaxo bariñagi niwiniro re rinigíawixini, ‘Xanoyá diñí tíño nimóniri amipí meanío iwo barini. Oyá amipí meaníwá náni omi opikianeyi.’ niriniro 39 omi íá nixero omiñíyo bíaniriwámimi nimoiro pikigíawixini.” Jisaso e nuriri Judayí ámináowa re oyaiwípoyiniri “None omiñí siñwí uwiniaríñwáonéniñí imóniñagwi náni rineararini?” oyaiwípoyiniri ewayí xwiýáa e nurimáná 40 ayo yariñí

re wiŋinigini, “Omiŋí xiáwo nibiríná omiŋí siŋwí uwiniariŋíáwami pí winigini?” uríagi ⁴¹awa re urigíawixini, “Sipí yariŋíáwamiyí eni sipí niwikárimáná ámi áamá wa ‘Xwiogwí ayí ayo wainí sogwí níáí éáná anani nidirane o náni utianíwáriní.’ yaiwíáwami re uriníáriní, ‘Gí omiŋí ripi siŋwí niwiníárixini.’ uriníáriní.” uríagiá ⁴²Jisaso re uriŋinigini, “Ewayí xwiyíá áamá Gorixo seyíné yeáyí seayimixemeanía náni urowárenapinó náni niriniri eániŋí ripi eni ‘Síná aŋí mirariŋíáwa síná awiaxí náni píá neríná wo “Sipírini.” niriŋo emi mófo náni Gorixo “Síná o tñi xámi nitirínáyí, aŋí eŋí neániri naŋí imóniniŋoi.” niriŋi síná o nimeari táná aŋí eŋí neániri naŋí imóniniŋíriní. Gorixo e éi eŋagi náni nene siŋwí niwiniríná aga imiriŋí mimóniŋagi winiŋwini.’ E niriniri eániŋípi soyíné sini íá miropa egíarani? Oweoi, íá niroŋo aiwi diŋí miamoariŋoi. ⁴³Ayináni gí Judayíné re searariŋini, ‘ “Gorixo nene xío xegí xwioxíyo mimeámí neri pírániŋí neameŋweaníáriní.” riyaiwariŋoi? Oweoi! Omiŋí siŋwí uwiniariŋíáwa yapi aríkí néra warigíáyíné Gorixo xío xegí xwioxíyo nipáwiro oŋweápoyiniri siŋwí seaniníámani. Áamá xejwí wí saniŋí nimóniro wé róniŋí yariŋíáyí opáwípoyiniri siŋwí wininíáriní.’ searariŋini. ⁴⁴Xwasíwí yeáyí bimi síná nipiérori nearíná yuní wáraníŋípa sínáoni áamá giyo giyo nipiérori nearíná axípi xwasíwí yuníniŋí imiximíáriní.” Jisaso xío sínáóniŋí nimóniri náni e uríagi ⁴⁵apaxípaniŋí imónigíá xwéowa tñi Parisiowa tñi ewayí xwiyíá api wiwaníŋowa náni rinariŋagi aríá niwiro “None náni ría rarini?” niyaiwiro ⁴⁶“Omi rixa íá oxiraneyí.” yaiwíááyí oxí apixí níni Jisaso náni “Gorixoyá wíá rókiamoariŋoriáni?” yaiwariŋagiá náni ámi wáyí nero wí e meŋíawixini.

Ewayí ikaxí aiwá apixí meani nánirini.

22 ¹Jisaso ámi ewayí xwiyíá wí nuriríná re uriŋinigini, ²“Áamá xwiyíá Gorixoyá aríá niwiro saniŋí nimóniro xío xegí xwioxíyo mimeámí neri meŋweaníe ŋweapaxí imóniniŋíyí, ayí ewayí xwiyíá ripíniŋí imónini. Mixí ináyí wo xewaxo apixí omeaniri náni aiwá xwé riyamí niyárimáná ³xegí omiŋí wiariŋíáwami re urowárinigini, ‘Áamá nioni urepeárimenáyó “Aiwá náni bípoyi.” urimépoyi.’ urowáraná awa mixí ináyo urípa nuro uriméagía aiwi ayí miŋipaxí wimóniniŋiní. ⁴Mixí ináyo xegí omiŋí wiariŋíá ámi wami re urowárinigini, ‘Áamá nioni aiwá ripi náni urepeárimenáyó re urimépoyi, “Aiwá rixa riyamí yárinigini.” nuriŋo “Xegí burimákau oxíyí tñi sipisipi memé naŋwí xixegíni miŋiniŋirixa tñi rixa nipiŋiri sío kikirómí neri síná exárinini. Xegí xewaxo apixí meani náni aiwá imixíápi náni bípoyi.” urimépoyi.’ urowáraná awa áwaní e uriméagía aiwi ⁵urepeárimenáyí aríkwíkwí niwiro wigí diŋí tñi numiro re egíawixini. Wo xegí aiwá omiŋíyo náni ŋinigini. Ámi wo xegí nigwí omiŋí bí eminiri náni ŋinigini. ⁶Wíá omiŋí wiariŋíáwami íá nixiriŋo iwaní nimépero piŋigíawixini. ⁷Mixí ináyo rixa

wikí wóníagi xegí simiñí wínarigíawami urowáraná awa nuro áamá xegí omiñí wiiarigíawami pikííayo eni nipikiro wigi añjýi eni ríá niyárimána eñáná ⁸ mixí ináyo xegí omiñí wiiarigíá wami re uriñinigini, ‘Gí íwo apixí meani nání aiwá rixa riyamí inárinijagi aiwi áamá aiwá api nání urepeárinjáyí mibipaxí wimóníagi nání ayí nipaxí mimónigoí. ⁹ Ayináni soyíné xwamidigíyo nuro áamá óí e nimúrónirinjáyí íwo apixí meani nání aiwá imixíá ripi nipíri bipíri nání áwanj urípoyi.’ uríagi ¹⁰ omiñí wiiarigíáwa óí wíyí wíyo nuro áamá nimúrónirinjáyí nanj aí tñi sipí aí tñi niwirimeámi nibiro anj aiwá nipíri nání imixáríwami dérogíawixini. ¹¹ Anj iwámi rixa nidéronjagía mixí ináyo áamá oxí apixí aiwá nipíri nání bíáyí sijnwí winiminiri nání nipáwiri weninj éyí winiñinigini. Áamá wo aiwá nání nibiríná aikí sijn yíniri iyá sijn pániri nemo nibiri miñweapa eñagi niwiniri ¹² re uriñinigini, ‘Ámáoxini, joxi aiwá ripi nání nibiríná pí nání aikí sijn yíniri iyá sijn pániri nemoxi mibipa éfrini?’ uríagi o xwiyíá bi murariñagi ¹³ mixí ináyo xegí omiñí wiiarigíawami re uriñinigini, ‘Soyíné omi íá nixero gwí wéyo jiro sikwíyo jiro nemáná síá yiniñí bíariwámimi moápoýi. Síá yiniñeyí ríniñí ayikwí miwinipa eñagi nání áamá ñwí earo magí íroniro epírfáriní.’ uriñinigini.” Jisaso ewayí xwiyíá e nuriri ¹⁴ re uriñinigini, “Gorixo áamá obaxíyo nurepeárirí ‘Nioni tíámini bípoýi.’ nuriri aiwi neyíroríná áamá nanj imóninjáyí áríní meaníáriní.” uriñinigini.

Nigwí takisí nání émáyo wiarigíá nánirini.

¹⁵ Parisiowa Jisaso e rariñagi aríá niwimowa nuro mekaxí niriro omi pasániñí numero xwiyíápai ñwiráraniro nání re rinigíawixini, “Omi yapí re uréwapiyaníwini, ‘Takisí nání nigwí émáyí nearáparigíápi sini mini wianiréwini?’ uraníwini. O ‘Oweoi, sini mini miwipa époýi.’ ránáyí, émáyí omi íá nixero gwí yipíráoi. E miripa neri ‘Oyi, seyíné mini niwiríná apáni yariñoi.’ ránáyí, áamá omi xidarigíá ámi aríá bi miwí nero píni wiáripíráoi.” niriniro ¹⁶ wiwanijowayá wiepisarigíá wami tñi áamá mixí ináyí Xeroto nikumixiniri emearigíá wami tñi Jisaso niñweari uréwapiyariñe nání uowáragía awa nuro Jisasomi re urémeagíawixini, “Nearéwapiyariñoxini, joxi ninearéwapiyiríná nepáni nearéwapiyariñoxirini. Áamá Amináowayá sijnwíyo dání aí xwiyíá ámi xegí bi mirí axípini rariñoxirini. Sipí riri nanj riri yariñjmani. Joxi xwiyíá Gorixoyáni nepáni xixeni nearéwapiyariñoxirini.” Weyí e numeariro yariñí re wigíawixini, ¹⁷ “Joxi none nearei. Dixí ñinj arire simónarini? Judayene émáyíyá mixí ináyí Sisaoyi riniñomi takisí nání nigwí mini wiarijwápi mini niwiríná ‘Apáni yariñwini.’ risimónarini? ‘Nipikwini miyariñwini.’ risimónarini?” uríagía aí ¹⁸ Jisaso awa sipí wikáraniro yariñagía ñinj adadé niwiri re uriñinigini, “Nanj riri sipí riri yariñíá royíné, pí nání iwamíó níwapiyariñoi? ¹⁹ Émáýíyá nigwí nene

takisí nání wiarinwá wo sinwí winimi siwá nípoi.” uríagi awa nigwí xío urí wo nimearo siwá wíáná ²⁰ o re uriniginí, “Nigwí romi símimaní imixiní tí tíni yoi eání tí tíni goyáriní?” uríagi ²¹ awa re urigíawixini, “Ayí émáyí mixí ináyí Sisaoyáriní.” uríagía o re uriniginí, “Amipí Sisaoyá imóniagi niwiniríná ayí Sisaomi mini wírixini. Gorixoyá imóniagi niwiniríná xewaninomi mini wírixini.” nuriri áamá Gorixo xewaninóniní imixiní enagi nání omi diní owikwíropoyiniri e uríagi ²² awa aría e niwiro diní ududí nero píní niwíarimi ugíawixini.

“Ámá ámi wiápínimeapírírini.” uriní nánirini.

²³ Síá axíyimi Judayí Sajusiyi rinigía wí —Sajusiowa re rarigíawarini, “Ámá piyíyí ámi wiápínimeapíríamani.” E rarigíawa nibiro “None ení o neararinípa ewayí xwiyíá bi nurirane majíá owikixéáraneyi.” niyaiwiro Jisasomi yariní niwiróná ²⁴ re urigíawixini, “Nearéwapiyariñoxini, Moseso eníná re niriri ríwaminí eníriní, ‘Ámá wo niafíwí meméá péánáyí xogwáo náó apixí aní nimeari xexirímeáoyá niafíwí wiemeafwiniginí.’ niriri eníriní.” nuriro ²⁵ ewayí xwiyíá ripi urigíawixini, “Xiráxogwá wé wíúmi dání waú imónigíá none tíni nweanwáwa re egíawixini. Xiráo xámíño apixí nimeari niafíwí meméá péáná ²⁶ xogwáo xío tñño xiráoyá apixí aní nimeari aí o eni niafíwí meméá péáná wía eni ími wo wo nimearo aí niafíwí meméá penowíánáyí ²⁷ eni yoparí ríwíyo peñiginí.” Ewayí xwiyíá api nurimáná ²⁸ Jisasomi yariní re wigíawixini, “Ámá níni Gorixo mí ómómiximí eníná wiápínimeááná xiráxogwá wé wíúmi dání waú imónigíáwa apixí go goyá imóniníáriní? Pí nání? Ayí awa nowani meagíí enagi nánirini.” uríagía aí ²⁹ Jisaso re uriniginí, “Soyíné xwiyíá Gorixoyá niriniri eáníñipi tíni oyá ení eáníñipi tíni majíá enagiá nání majimajíá nero xenwíni rariñoi. ³⁰ Ayí ripi nání searariní. Ámá pegíáyí niwiápínimearóná anínají yapi nero apixí mearo wiro epíríamani. ³¹⁻³² E neri aí xwiyíá áamá pegíáyí wiápínimeapírírípi nání Gorixo re searinípi ‘Nioni Njwíá Ebiríamoyáoni tíni Aisakoyáoni tíni Jekopoyáoni tíni awayáonirini.’ E niriniri eáníñipi soyíné siní íá miropa egíáraní? Oweoi, íá niroo aiwi nijíá mimónipa nero rariñoi. Ayí ripi nání searariní. Gorixo áamá pegíáyí nání Njwíáomani. Ámá siní diní tñnyí nání Njwíáorini.” nuriri awa diní re oyaiwíropoyiniri, “Negí aríowa pegíá enagi aiwi wigí diní siní siní rimónini?” oyaiwíropoyiniri e uríagi ³³ áamá oxí apixí e epíroyí egíáyí aría niwiro o xwiyíá uréwapiyariñipi nání diní ududí niwiga ugíawixini.

Njwí ikaxí seáyi e imóniñipi nánirini.

³⁴ Jisaso Sajusiowa xwiyíá nimeámi bíápi gwí miñiní wákwíagi nání ámi bi murariníagía Parisiowa sinwí e niwiníro awani axímíni awí neánárimáná ³⁵ wigí wo —O njwí ikaxí eáníñipi meweníyí worini.

O Jisasomi yapí niwíwapiyirane majíá owikixeáraneyiniri yariñí re wiñinigini, ³⁶ “Nearéwapiyariñoxini, negí ñwí ikaxí eáñiñíyí niyoni gípi seáyi e imónini?” uríagi ³⁷⁻³⁸ Jisaso re uriñinigini, “Ñwí ikaxí re niriñiri eáñiñípi, ‘Dixí Áminá Gorixomi diñí niñwiráriríná diñí sixí uyiri xwioxíyo dání diñí wikwírorí eríni.’ Ñwí ikaxí e niriñiri eáñiñípi seáyi e imónini. ³⁹Ñwí ikaxí ‘Jiwaniñoxi nání diñí sipí sinariñípa áamá joxi siñwí winariñíyí nání eni diñí sipí axípi e wiríni.’ niriñiri eáñiñípi eni seáyi e imóniñípi tñi xixeni imónini. ⁴⁰Xwiyíá Moseso tñi wíá rókiamoagíáwa tñi niriñi ríwamiñí eagíá nipini ñwí ikaxí míkí ripiaúmi ikwikwírí inini.” uriñinigini.

“Kiraisoyí riniño niaíwí goyáorini?” uriñí nánirini.

⁴¹Parisiowa sini awí eaáriníñáná Jisaso yariñí bi niwiri ⁴²re uriñinigini, “Kiraiso, áamá aríowayá xwíá piaxíyo dání iwiaronífoyi rarigío nání segí diñí arirerini? Niaíwí goyáorini yaiwariñoi?” uríagi awa re urigíawixini, “Negí mixí ináyí Depitomi xiáworini.” uríagiá ⁴³ o re uriñinigini, “Kiraiso sa Depitomi xiáwo eñánáyí, o kwíyí Gorixoyá tñi ríwamiñí nearíná o nání arige ‘Gí Ámináorini.’ niriñi ríwamiñí re eañrini, ⁴⁴‘Áminá Gorixo gí Ámináomi re uriñinigini, ‘Joxi tñi mixí imónigíáyo xopirárí riwiimíáé nání gí wé náumi dání ñweai.’ uriñinigini.’ niriñi eañrini? ⁴⁵Depito Kiraiso, aríowayá xwíá piaxíyo dání iwiaronífoyi rarigío nání ‘Gí Ámináorini.’ riñíyí arige neri ámi xegí xiáwo imónini?” nuriri awa re oyaiwípoyniri “Kiraiso Depitomi xiáwo imóniñagi aiwi seáyi e múroniñagi nání Gorixomi xewaxoríani?” oyaiwípoyniri e uráná ⁴⁶ámá ayí nání “Kiraiso, áamá aríowayá xwíá piaxíyo dání iwiaronío sa Depitomi xiáworini.” niyaiwiro nání wíyíyá niwiápinimeari murípaxí wimóníagi ámi íná dání yariñí bi miwígíawixini.

“Ñwí ikaxí eáñiñípi mewegíáwa yariñípa mepani.” uriñí nánirini.

23 ¹Jisaso xwiyíá api nuríísáná áamá oxí apixí e epíroyí egíáyo tñi oyá wiepisariñowami tñi nuriri ²re uriñinigini, “Ñwí ikaxí eáñiñípi mewegíáwa tñi Parisiowa tñi wiwaniñowa nání re rinigíárini, ‘Ñwí ikaxí Moseso ninearéwapiyiri ríwamiñí eañípi newaniñoneni ámányo uréwapiyipaxíri.’ ³E rinigíá eñagi nání nání awa searíáyí nixídiro eríni. E neri aí awa nañí niriñi aiwi wiwaniñowa pírániñí mixídaríñagiá nání wigí yariñípa seyíné eni mepani. ⁴Ámányo ñwí ikaxí nuriróná sañí xwé ayá wíniñí gwí nijiro sañwíyo ikwíararigíárini. E neri aí wiwaniñowa ‘Iwamió wé reñí ná woni tñi omíeyoámini.’ wimónariñímani. ⁵Amipí awa yariñípi áamá siñwí oneañípoyniri yariñíárini. Awa áamá Gorixomi pírániñí xídarigíáyí dirí xwiyíá Gorixoyá nání díkínariñíárí miñíyo díkíniro wigí iyíá sírífíwíyo dání wayaxíniñí niyiwára puñíyí yíniro yariñípa mé áamá siñwí

oneanípoyiniri dirí xwé íá niwearo díkíniro wayaxí eni sepiá yiwárapinjí yíniro nero emearigíáriní. ⁶Awa aiwá xwé imixarigíe nání nurónáraní, rotú anjío nání nurónáraní, áamá siŋwí oneanípoyiniri siŋáninjímíni niŋweamero yarigíáwariní. ⁷Awí eánarigíerani, makeriá imixarigíerani, ‘Nearéwapiyariŋoxiní.’ onírípoyiniri emearigíáwariní. ⁸Awa e nero aí segí searéwapiyariŋo ná wonirini. Seyíné niyínéni nioni ninixídiro nání áamá axí imónigíáyíné ‘Ráre, napíe rinigíáyíné imóniŋagi nání seyíné awa yapi ‘Nearéwapiyariŋoxiní.’ onírípoyiniri e mepani. ⁹Segí ápo anjínami ŋweaŋo ná woni oni eŋagi nání eni xwíá tíyo dánjé womí ‘Ápoxiní muripani. ¹⁰Niseaméra unío ná woni Kiraiso, áamá aríowayá xwíá piaxíyo dání iwiaronífoyi rarigíe eŋagi nání eni seyínéyá wo nání ‘Nineaméra warinorini.’ mirinipa époyi. ¹¹Seyíné giyíné seáyi e seaimóniŋoyí segí inókíniŋjé nimóniri omíŋjé seaiíwinigini. ¹²Áamá giyí giyíné sewaniŋyíné seáyi e meníáyíné, Gorixo xwíámi seaimixiníáriní. Giyí giyíné ‘Sipienerini.’ niyaiwiniro ínimi imóníáyíné, Gorixo seáyi e seameníáriní.

Ŋwí ikaxí eániŋjipi mewegíáwa naŋjé ero sipí ero yarigíá nání xwiyíá umeáriŋjé nánirini.

¹³“E neri aí ŋwí ikaxí eániŋjipi mewegíoyíné tñni Parisioyíné tñni, naŋjé ero sipí ero yarigíoyíné aweyi! Síá wiyi soyíné majíá seaóriníáriní. Soyíné áamá Gorixomi diŋjé niwíkwírooro oyá xwioxíyo nipáwiro ŋweaaniri éíáyo nuréwapiyiríná píripíríninjé wiarinagíá nání Gorixo xeaniŋjé ríá tíŋjé sealkáriníá eŋagi nání diŋjé sipí oseaini. Sewaniŋoyíné Gorixomi diŋjé miwíkwíropa ero mipáwipa ero nero aí áamá eni xe opáwípoyiniri siŋwí winarigíámani. ¹⁴[Ŋwí ikaxí eániŋjipi mewegíoyíné tñni Parisioyíné tñni aweyi! Síá wiyi soyíné majíá seaóriníáriní. Naŋjé ero sipí ero yarigíoyíné, síwí yáí ríkíniŋjéyí yapi áamáyá aiwá píri nání íwí manariŋjé soyíné apixí aní apianjépiá nání diŋjé sipí miseaí wígí amipí íwí nurápiro anipápiá wárarigíáriní. Soyíné Gorixomi rixinjé nuriróná áamá aríá nineairo weyí oneamépoyiniri áamá siŋwí anigíe dání sepiá nira warigíoyínérini. Ayináni soyíné xwiyíá áamá wí meárinipíríápa axípi meárinipíríámani. Soyíné ríá tíŋjé meárinipíríá eŋagi nání diŋjé sipí oseaini.] ¹⁵Ŋwí ikaxí mewegíoyíné tñni Parisioyíné tñni aweyi! Síá wiyi soyíné majíá seaóriníáriní. Naŋjé ero sipí ero yarigíoyíné, ‘Áamá ná jíami ŋweagíáyí negíniŋjé imónírixiní.’ niyaiwiro rawirawáyo xero xwíáyo anjé uro neróná segí yarigíápi ayo uréwapiyariŋigíoyínérini. Ayí soyínéniŋjé nimónirínáyí soyíné ríá aninjé wearinjío ikeaarínipaxí aiwi soyíné ayo wíwapiyariŋagi nání ayí soyíné niseamúrooro anjipaxí ríá aninjé wearinjío ikeaarínipaxí imóniŋjoi. Ayináni Gorixo xeaniŋjé sealkáriníá eŋagi nání diŋjé sipí oseaini. ¹⁶Soyíné siŋwíniŋjé supárigíoyíné aweyi! Síá wiyi soyíné majíá seaóriníáriní. Siŋwíniŋjé supárigíoyíné aiwi áamá wíyo óí siwániŋjé wiarigíoyíné, áamá wo ‘E emíni. Anjé Gorixo nání ridiyowá

yariŋwá riwámi dáni rirariŋini.’ rariŋagi niwiniríná re rariŋioyínérini,
 ‘Ananirini. Xío rípa mepa nerínáyí, xwiýíá meárinipaxí wí mirarinini.’
 rariŋioyínérini. E neri aí áamá wo ‘E emíini. Síŋá gorí aŋí ridiyowá
 yariŋwáiwámi ínimi weŋípimi dáni rirariŋini.’ rariŋagi niwiniríná re
 rariŋioyínérini, ‘Xío rípa mepa nerínáyí, xwiýíá meárinipaxí rarini.’
 rariŋioyínérini. ¹⁷Majimajíá ikáriniro siŋwíniní supáriro egíoyiné,
 gímíni gípi seáyi e imónini? Síŋá gorí aŋí ridiyowá yariŋíwámi weŋípi
 seáyi e rimónini? Aŋí ridiyowá yariŋíwá seáyi e rimónini? Aŋí ridiyowá
 yariŋíá ŋwíá iwámi gorí síŋápi sa e weŋagi náni eni ŋwíá imóniŋagi
 náni aŋí iwá seáyi e imónini. Ayináni áamá wo ridiyowá yariŋíwámi dáni
 ráná pí náni ‘Xwiýíá meárinipaxí bi mirarinini.’ rariŋíáriní? ¹⁸Soyíné
 ripi eni rariŋioyínérini. Áamá gíyí gíyí aiwá peaxí taniro náni írái noa
 peyiniŋe dáni rariŋagi niwiniríná ‘Ayí ananirini. Xwiýíá meárinipaxí
 bi mirarinini.’ riro áamá aiwá peaxí seáyi e ikwiárininíŋípimi dáni
 rariŋagi niwiniríná ‘Ayí apimi dáni ríŋípi xixeni mepa nerínáyí, xwiýíá
 meárinipaxí rarini.’ riro yariŋioyínérini. ¹⁹Siŋwíniní supárigíoyiné arige
 neri yapí e uréwapiyariŋíáriní? Gímíni gípi seáyi e imónini? Aiwá peaxí
 ikwikwiárimí yariŋíápi seáyi e rimónini? Írái noa peyiniŋípi seáyi e
 rimónini? Írái oniŋípi aiwá ŋwíá imixariŋagi náni íráipi seáyi e imónini.
²⁰Ayináni áamá írái oniŋíŋípimi dáni nírironá aiwá seáyi e ikwiárininíŋípimi
 dáni eni rariŋoi. ²¹Áamá ridiyowá yariŋíwámi dáni nírironá Gorixo
 aŋiwámi ínimi ŋweaŋomi dáni eni rariŋoi. ²²Áamá ‘Aŋínami dáni
 rirariŋini.’ nírironá Gorixo íkwianŋwí éí ŋweaŋe dáni riro xewaníŋo éí
 ŋweaŋomi dáni riro eni rariŋoi. Ayináni xwiýíá soyíné ‘E dáni níríríná
 ananirini.’ rariŋíáyi níŋikwini níŋikwini mirariŋioyínérini.

²³Ŋwí ikaxí mewegíoyiné tíni Parisioyiné tíni aweyi! Síá wíyi soyíné
 majíá seaóriníáriní. Sipí ero naŋí ero yariŋioyiné diŋí sipí oseaini. Soyíné
 aiwá nimiróná aniŋí miní yíyí tíni aí tíni siyó amípi pírániŋí íá niroro rixa
 wé wúkaú imóniŋáná wo Gorixomi miní niwiro aí ŋwí ikaxí xwé riniŋí
 tíyo ‘Dixí áamá imóniŋíyo xixeni wiariŋípa áamá xeŋwíyo eni axípi wiiríni.
 Áamá xeŋwíyo eni ayá urimixiríni. Gorixomi diŋí wikwíroríni.’ riniŋí ayo
 soyíné ogámí nero onimiápiáni xidarigíáriní. Segí aniŋí miní yariŋíá jíapi
 píni miwiáripa ero áamáyo naŋí mimixípa yariŋíápi eni ero nero siŋwiriýí,
 naŋí imónimíniri eŋírini. ²⁴Soyíné siŋwíniní supárigíoyiné aiwi áamá
 wíyo óí siwániŋí wiarigíoyiné, inaiwá níniro sidíríá onimiápia weŋagi
 niwiniróná anani emi nimamoro aí kamerí xwéríxa weŋáná siŋwí miwini
 o tíni gwínárearigíoyínérini.” nuriri awa re oyaiwípoyníri “None ŋwí
 ikaxí xwé eániŋíyo ogámí neranéná ayí kameríniŋí gwínárearíŋwárianí?
 Ŋwí ikaxí onimiápia eániŋíyo pírániŋí níxídiranéná ayí sidíríá emíniŋí
 mamoiŋwárianí?” oyaiwípoyníri e uriŋinígini.

²⁵Ámi re uriŋinígini, “Ŋwí ikaxí mewegíoyiné tíni Parisioyiné tíni
 aweyi! Síá wíyi soyíné majíá seaóriníáriní. Naŋí ero sipí ero yariŋioyiné,

Gorixo xeaniŋí seaikáriníá eŋagi náni diŋí sipí oseaini. Soyíné kapixíyo t́ni xwáriá sixíyo t́ni bíariwámi dáni wayí niroro aí xwioxíyómíni segí íwí meearigiáyí t́ni uyínií yarigiáyí t́ni magwí eni. ²⁶Parisi siŋwíniŋí supárigíoyíné, kapixíwámi t́ni xwáriá sixíwámi t́ni xámi xwioxíyómíni wayí róáná bíariwámini eni naŋí imóniniŋoi. ²⁷Ŋwí ikaxí mewegíoyíné t́ni Parisioyíné t́ni aweyi! Sía wiyi soyíné majíá seaóriníáriní. Naŋí ero sipí ero yarigióyíné, Gorixo xeaniŋí seaikáriníá eŋagi náni diŋí sipí oseaini. Soyíné áamá xwáripáyo seáyi e míá imixáná simajiyí naŋí rariŋipániŋí imóniŋoi. Íniminiyí áamá eŋí nórówapiri piyaŋí eariŋipániŋí eŋáná. ²⁸Áamá wí soyíné siŋwí niseaniróná ‘Wé rónigiáwarini.’ seaiaiwiariŋagía wí segí xwioxíyómíni naŋí ero sipí ero yarigiápi t́ni rikikírío yarigiápi t́ni magwí eŋagi siŋwí miseanarigiáriní. ²⁹Ŋwí ikaxí mewegíoyíné t́ni Parisioyíné t́ni aweyi! Sía wiyi soyíné majíá seaóriníáriní. Naŋí ero sipí ero yarigióyíné, Gorixo xeaniŋí seaikáriníá eŋagi náni diŋí sipí oseaini. Soyíné Gorixoyá wíá rókiamoagiáyíyá xwárfpáyo maŋí e waripániŋí síŋáyo xegí yoí nearo uráráiro áamá wé rónigiá eŋíná pegíáwa xwíá weyáriníŋe eni míá imixiro neróná ³⁰re rariŋíáriní, ‘None eŋíná aríowa ŋweaagíná niŋwearane siŋwiriyí, awa wíá rókiamoagiáwami pikiaríná none eni nawíni wí pikianiri eŋwámani.’ rariŋíáriní. ³¹Sewaniŋoyíné e niriŋóná xwiýá nimeáriníro réniŋí rinariŋoi, ‘Negí aríowa wíá rókiamoagiáwami pikiaŋíowami xiáwonerini.’ áwaŋí éniŋí rinariŋoi. ³²Soyíné segí aríowa wíá rókiamoagiáwami nipikíro yagiápi nimúroro xwiýá wíni meárinipíri náni anani éfrixini. ³³Sidiroyíne, weaxíá miáoyíné Gorixo xwiýá niseameariri ríá aniŋí wearíŋíyo sealkeaáráná arige neri urakínipíríáriní? Oweoi, wí nurakínipíríámani. ³⁴Pírániŋí aríá époyi. Nioni wíá rókiamoarigiáwami t́ni áamá nijíáwami t́ni ŋwí ikaxí eániŋípi mewegíáwami t́ni soyíné t́ŋí e náni uowárimíá eŋagi aiwi soyíné awa wami pikiro wami íkáyo yekwiroáiro wami segí rotú aŋíyo dáni sikwíá ragí pírí uyikíro wa nuro aŋí bí bimi ŋweáŋe mixí nixída uro epíríáriní. ³⁵Ayí ripi náni awami soyíné t́ŋí e náni uowárimíáriní. Soyíné xwíá tíyo xwiýá áamá wé rónigiá niyoni go go pikigíá náni ríá meárinipíri awami soyíné tíámíni uowárimíáriní. Iwamíó wé róniŋí Aiboríomi pikíŋe dáni yoparí wíá rókiamoagi Sekaraiáomi —O íráí ridiyowá yaníro ikwikwíárimí yarigíe midáni eŋáná Gorixoyá aŋí awawá ‘Ŋwíáxini.’ riníŋe midáni eŋáná áwinimi e pikigíorini. Omi pikigíe náni xwiýá meárinipíri áamá ayo segí tíámíni uowárimíáriní. ³⁶Nepa searariŋini, ‘Oxí apixí agwi ríná ŋweagiáyíne amipí nioni searariŋá ripi niseaímeaníáriní.’ searariŋini.

Jerusaremi ŋweáyí náni riŋípi nánirini.

³⁷Jerusaremi ŋweáyíne wíá rókiamoarigiáwami pikiro áamá Gorixo seyíné t́ŋí e náni uowárenapiŋowami síŋá nearo pikíro yarigiáyíne,

nioni karíkarí xinái miá iwíyo ínimi mimeámí yariñpa nioni eni axípi seaiminiri yaríná seyíne miseaimónarini. ³⁸ Aríá époyi. Gorixo yeáyí niseayimixemearíná aņí seyíne ħweaaniri egíe rixa anipá imónigoí. ³⁹ Ayí ripi nání searariñini. ‘Seyíne nioni siñwí minaní néfasáná re ripíríná nánini nanipíríarini, “Ámináo urowárenapáná weapiníomi yayí seáyí e oumeaneyi.” ripíríná nánini siñwí nanipíríarini.’ searariñini.” uriniginini.

“Aņí ridiyowá yarigíiwá ikwierómioaníarini.” uriní nánirini.

24 ¹ Jisaso aņí ridiyowá yarigíiwámi dání nipeyeari waríná xegí wiepisariñowa aņí Gorixo nání e miriniñyí awiaxí enagi “Jisaso píraniní siñwí owinini.” niyaiwiro árixá wianiro báná ² o re uriniginini, “Soyíne sñá aņí tiyí níni siñwí riwinariñoi? Nepa searariñini. Ríwíyo sñá kikíróniní ripiyí wo wíomi seáyí e ikwíaríniníamani. Sñá ikwikweyárininí ripi níni ikwierómioaníarini.” uriniginini.

Xeaniní iwamíó wímeaníapi nání uriní nánirini.

³ E nurimi nuri díwí miñí Oripiyo niyiri e éi ħweañáná wiepisariñowa Jisaso xegípi ħweañagi niwiniro aņwi e nibiro yumí yariñí re wigáwixini, “Joxi áwaņí nearei. Sñápi gíná ikwierómioaníarini? Siñwí ayo niwinirane ‘O rixa niweapini aņwi ayorfani?’ yaiwirane ‘Sfá yoparfíy rixa riyrifani?’ yaiwirane yaníwá nání pí ekiyiñyíyo winaníwáriní? Joxi nearei.” uríagía ⁴ o áwaņí nuriríná re uriniginini, “Ámá wí yapí searéwapiyipírixiniri diñí íá nixiriro érixini. ⁵ Ayí ripi nání searariñini. Ámá obaxí wo wo nibayiro yoí nioniyá niriniro yapí re searéwapiyaniro epíríarini, ‘Ámá yeáyí seayimixemeanía nání aríowayá xwía piaxíyo dání iwiaronfoyi rarigío imóniñáonirini.’ searéwapiyaniro éáná ámá oxí apixí obaxí ‘Nepaxini.’ niyaiwiro xerwíyo xídipíríarini. ⁶ Soyíne ‘Aņí nowamini mixí ikwínaroarini.’ rinánáyí xwiyá iminí ‘Aņí wími mixí inariñoi.’ riniméánáyí wáyí mepa érixini. Mixí ayí xámi niga nuri aiwi síá yoparí Jisasoni weapimíáyí sinirini. ⁷ Ámá gwí wirí niwiápínimearo wíniyí tñi mixí iniro ero mixí ináyí wí niwiápínimearo wíniyí tñi mixí iniro ero aņí wíyí wíyo poboní eri aņí wami agwí nání ikeamóniro epíríarini. ⁸ Api nipini e imónariñagi niwiniríná re yaiwírixinini, ‘Ríwéná xwé enía nání iwamíó ríyí riyarini? Oyini.’ yaiwírixinini. Apixí niaíwí xiriminiri neríná diñí re yaiwiarigíapa, ‘Ríwéná ríniñí xwé nimirí nání iwamíó rinirini? Oyini.’ yaiwiarigíapa soyíne eni nioni rariñápi imónariñagi niwiniríná re yaiwírixinini, ‘Ríwéná xeaniní xwé neámeaníaríani?’ yaiwírixinini. ⁹ Íná soyíne ámá wí íá niseaxero xeaniní seaikáriro seapikiro epíría nání ámá wíyo mini wipíríarini. Ámá gwí rixí wirí wirími dání níni soyíne nioni nixídaríagía nání símí tñi seapíríarini. ¹⁰ E seaiaríná ámá obaxí nioni nixídarigíáyí ríwí ninimoro wigí wíniyí Jisasoni nixídarigíáyí

náni ámáyo miyí uriro ayí t́ni śmí t́ni iniro epírírini. ¹¹ Ámá wí niwiápínimearo mimóní wíá rókiamoarigiáwa nimóniro ámá oxí apixí obaxíyo yapí wíwapiyipírírini. ¹² Ámá rikikiríó niga upíría enjagi náni ámá obaxí wíyo wá niwianiri arirá wiarigiápi ṕni wiáripírírini. ¹³ E neri aí giyí giyí enj neániro nioni dińj nínikwírooro nixídarigiáyo síá yopariyimi nioni anani yeáyí uyimixemeámfárini. ¹⁴ Xwiyíá yayí seainarińj ‘Gorixo xegí xwioxíyo mimeámí neri seameŋweanía náni segi f́wí yarigiápi ríwímimi nimamoro nisaniro ŋweárixini.’ rinińjpi ámá nioni nixídarigiáyí nuro ámá gwí wirí wirí niyoni xwíá rírí nírímimi ami gimi ŋweagiáyo wáí nurimemáná enjáná síá yopariyi imóniníárini.

Xeanińj ríá t́ńj wímeaniápi náni urinj nánirini.

¹⁵ “Soyíné wíá rókiamoagi Daniero niriri eanjpi ámá sipí seaikáriño anj awawá Gorixoyá ŋwíá ikwírónińjwámi xórórí neri xwiríá ikixéagi niwiniríná —Ámá giyíné xwiyíá ripi íá róíáyíné, dińj píráníńj morfíni. ¹⁶ E niwiniríná Judia piropeniśíyo ŋweagiáyí d́wíyo náni éí ýfrixini. ¹⁷ Ámá giyí giyí anj waíwíyo nipeyiro seáyímini ikwírónińjwámi niŋwearóná ‘Sipí neaikáriño rixa ŋwíá imóniŋe xwiríá ikixearini.’ rinarińgáa aríá niwiríná sini mepa érixini. Niwiápínimeámáná amipí ínimi ikwírónińjwámi weńjpi mieaniro náni niwepíniro mipáwipa sa niwepíniro d́wíyo náni anjini éí ýfrixini. ¹⁸ Ámá aiwá omińjyo yarigiáyí eni aríá e niwiríná ámi iyíá meaniro náni anj e náni mupa sa d́wíyo náni éí ýfrixini. ¹⁹ Íná apixí niaíwí agwí egíwa t́ni sini niaíwí amińj narigííwa t́ni anjini éí upaxí mimónińgagi náni awei! Arige nero d́wíyo náni anjini éí yipírírani? Oweoi. ²⁰ Anjini éí mupaxí neaimóniniginiri Gorixomi rixińj re urífrixini, ‘Íná imińj miripa éwinigini. Sabaríá eni mimónipa éwinigini.’ urífrixini. ²¹ Ayí ripi náni seararińjini. Gorixo xwíá imixiri anjina imixiri ene dáni ámá xeanińj nimóga bagía aiwi sipí seaikáriño ŋwíá imóniŋe xwiríá ikixéáná xeanińj ríá t́ńj seaímeaníárini. Xeanińj íná imóniníá ripi t́ni ámi wí xixeni imóniníá menini. ²² Gorixo xeanińj imóniníá api náni ‘Anjini ṕni owiárini.’ miyaiwiáripa neri sińwiriyyí, ámá wíyo yeáyí uyimixemeapaxímani. Ámá xío eyíróarińj enjagi náni xeanińj api náni ‘Anjini anipá oimónini.’ riniárini. ²³ Íná ámá wí ‘Sińwí winípoyi. Yeáyí neayimixemeanía náni aríowayá xwíá piaxíyo dáni iwiaronífoyi rarińwáo riworini.’ re searánáranani, wí ‘Jíiworini.’ searánáranani, aríá miwipa érixini. ²⁴ Ayí ripi náni seararińjini. Ámá wa niwiápínimearo ‘Oxí apixí Gorixo eyíróarińjyo yapí wíwapiyipaxí ríá imónini?’ niyaiwiro yapí wíwapiyaniro náni wí ‘Kiraiso, aríowayá xwíá piaxíyo dáni iwiaronífoyi rarińgíó, ayí nionirini.’ riro wí ‘Wíá rókiamoarińáonirini.’ riro nero emimí xwé ámá sińwí miwinarigiápi ero ayá riwamónipaxí bi ero epírírini. ²⁵ Píráníńj aríá mónípoyi. Amipí ríwéná imóniníápi náni rixa áwanj seararińgagi yapí seaíwapiyipírixiniri

náni diŋí nimoro érixini. ²⁶Nioni rixa pírániŋí áwaŋí searíá enjagi náni áamá wí ‘Aríá époyi. O áamá náni diŋí meaje jíami ŋweani.’ searána soyíné aríá niwiro mupa érixini. Wí ‘Aríá époyi. O aŋíyo ná ínimi yumíí ŋweani.’ searána aríá miwipa érixini. ²⁷Ámá imóniŋáoni niweapiríná ápiaŋwí neríná aŋí ikwíróniŋí nimini wíá ókiariŋípa nioni eni wíá nókía weapimíá enjagi náni áamá wí ‘O yumíí e ŋweani.’ searánaýí, aríá miwipa érixini.” nuriri ²⁸awa re oyaiwípoyiniri, “Nioni weapimíáé náni áamá áwaŋí wí ripaxí menini. Ámá níní siŋwí nanipíríáriní.” oyaiwípoyiniri ewayí ikaxí ripi uriŋinigini, “Naŋwí piyí weŋe apurí obaxí pénaríŋirini.” uriŋinigini.

Ámá imóniŋo weapiniápi nánirini.

²⁹Ámi re uriŋinigini, “E neri aí xeaniŋí api níní rixa niseaímeámáná eŋáná apaxí mé sogwí síá yiniri emá wíá mónipa eri siŋí aŋínami dáni exweánowiri eri amipí eŋí eániŋí aŋínami eŋíýí úpiyiniri eri rixa nemáná eŋáná ³⁰nioni ekiyiŋiŋiŋí niga niweapiri áamá niyoni siŋáni wimónáná áamá gwí arí arí níní áamá imóniŋáoni níkními gí eŋí eániŋí tñi aŋí piríyo dáni agwí tñi weapariŋagi siŋwí ninaniróná ŋwí eapíríáriní. ³¹E yaríná pékákí aga eŋí tñi riníagi nioni gí aŋínajowa áamá oxí apixí Gorixo eyíróariŋíýí xwíá rirí nírimini ami gimí ŋweagiáyo wirimeapíri urowárimíáriní.

Ewayí ikaxí íkíá pikína nánirini.

³²“Soyíné ewayí ikaxí íkíá pikína náni riniŋípi náni diŋí nimoro nijíá imónípoyi. Íkíá pikína mimijwí neánowimáná ámi iniigí sixí níniŋí rixa miŋí ináná, ‘Rixa xwiogwíríani?’ yaiwiarigíáriní. ³³Siŋwí e niwíniro yaiwiarigíápa nioni searariŋáýí níní imónariŋagi niwiniríná re yaiwíríxini, ‘O niweapini náni rixa íwí éniŋí rirónapini? Oyini.’ yaiwíríxini. ³⁴Nepa searariŋini. Ámá ríná ŋweagiáýíné wiyíné sini mipé ŋweaŋáná amipí nioni searariŋápi nimóniníáriní. ³⁵Aŋína tñi xwíá rí tñi anipá imóniníá enjagi aiwi xwiýíá nioniyá wí surímá imóniníámani.

“Nioni weapimíáýi náni áamá wo nijíámani.” uriŋí nánirini.

³⁶“Nioni ámi gíni gíná niweapimíá nániyí áamá níní aiwi wo nijíá mimónini. Aŋínají aiwi nioni aiwi nijíá mimóniŋwini. Sa gí áponi nijíáriní. ³⁷Ámá imóniŋáoni ámi weapáná áamá Nowao tñíná yagiápa axípi yariŋagiá winimíáriní. ³⁸Iniiŋí waxí sini níróga miwiápínimeapa eŋáná ayí síá Nowao sipixíyo páwiné nánini re néra ugíawixini. ‘Gorixo iniigí waxí tñi xwiríá wí neaikixeníámani.’ niyaiwiro aiwá níro iniigí níro néra nuro apixí niŋwirára uro nimeáa uro néra núisáná ³⁹‘Pí pí neaímeaniáriní?’ miyaiwí néra waríná iniigí waxí nimárómi uriŋinigini. Ámá imóniŋáoni ámi niweapiríná áamá maiwí axípi e néra wariŋagiá

wímeámíárini. ⁴⁰Síá nioni weapimíáyimi áamá waú, aiwá omiñyo yarigíwau gí aníñajowa wíomi niwirimearo aí wíomi e wáripíríárini. ⁴¹Apixí wípaú eni pirawá yuní ikixémí yariná wími niwirimearo wími e wáripíríárini. ⁴²Ayináni soyíné awíníñí ñwearíni. Dixí Ámináoni bimíá nání soyíné majíá imóniñagía nání diñí tñi ñweáírixini. ⁴³Ewayí ikaxí ripi nání eni diñí mópoyi. Áamá wo, aní xiáwo ‘fwi meariño síá riyimi ríná binirfeniñoi?’ niyaiwiri siñwiriýí, awí niñwearíná xe níkwiri opáwiniri siñwí winiminiri enímani. ⁴⁴Áamá imóniñáoni weapimíáyí nání eni soyíné sini majíá enagía nání awíníñí ñweáírixini.” uriniginini.

Ewayí ikaxí bosiuo nánirini.

⁴⁵Jisaso ewayí ikaxí ámi bi uriminiri nání yariñí re wiñiniginini, “Omiñí wiariníyí wo xegí bosoyá mañí aríá niwiri diñí neñwiperi nerínáyí arige imónini? O re imónini. O omiñí ripi nání bosiuo oimóniri xegí boso rípeañorini. O xegí bosoyá omiñí wiarigíáyo umeiri aiwá yañí umeiri yariñorini. ⁴⁶Boso ami dání nibiri xegí bosiuo rípeaño xámi yagípa axípi píráníñí yariñagi niwinirínáyí, bosiuo yayí owinini. ⁴⁷Nepa searariñini. O píráníñí yariñagi niwinirínáyí, xegí omiñí nání eni menía nání rípeaníárini. ⁴⁸E neri aiwí bosiwí axo ‘Gí boso yapapíni binimeniñoi.’ niyaiwiri ⁴⁹xegí omiñí ani wiarigíáwami iwaní niméperi áamá papikí yarigíá wa tñi inligí niro aiwá niro néra nuríná ⁵⁰‘Boso síá riyimi nibinimeniñoi.’ niyaiwiri yariñíyí wiyimi, síá xío biniyimi majíá nimóniri yariñíyimi boso rixa nírémónapiri re winíárini. ⁵¹Omi miñí niwákwiri áamá nañí ero sipí ero yarigíáyí tñí e wáriníárini. E ríniñí xwé winaríná ñwí earo magí íróniro epírérini.” Jisaso ewayí xwiýíá e uriniginini.

Ewayí ikaxí apixí apiyá wé wúkaú nánirini.

25 ¹Jisaso ewayí xwiýíá re uriniginini, “Áamá ‘Gorixo xío xegí xwioxíyo mímeámí neri oneameñweani.’ yaiwíáyí apixí apiyá wé wúkaú riwáníñí imóniñoi. Íwa ‘Negí áamá o xegí apixí siñí meaními niwirimiaumi biniñoi.’ riníagi aríá niwiro óí e oneairimeároniri wigí ramixí xixegíni nimixárómi nuro óí e weníñí nero ñweagíwarini. ²Apixí wé ná wúni íwa majimajíá ikárinigíwarini. Wé wíumi dání wíwa diñí píráníñí mogíwarini. ³Majimajíá ikárinííwa ramixí nimaxiríná piurí sixí mimaxirigíwarini. ⁴Diñí píráníñí móííwa ramixí nimaxiríná piurí sixí eni xixegíni maxirigíwarini. ⁵Íwa weníñí neri ñweañáná apixí siñí meano sini síá óripíni yariná íwa sá niówárí nero rixa sá weñáná ⁶rixá áriwegí imónáná ríaiwá re rininiginini, ‘Weníñí époyi. Apixí siñí meáo rixa iwo barini. Seyíné óí e wiriménapípoyi.’ riníagi aríá niwiro ⁷apixí apiyá níwani niwiápíni mearo ramixí ápiáwí xwé oweniri íá nikinimiximáná ⁸majíá ikárinííwa wigí piurí yeáyí neri ramixí supáraníñagi niwiniro diñí píráníñí móííwami re urigíawixini, ‘Negí

ramixí supáriminiri yariŋagi náni sewayíne piurí bí neaiapípoi.’ uríagía aiwi 9íwa re urigíawixini, ‘Oweoi, piurí newanéya ramixí sewayíneya tñi newanéya tñi xixeni mimónini. Newanéya eni supárinigini. Sewayíne nuro segí eni sitiwá aŋíyo áma piurí bí yariŋíayo bí époi.’ uríagía 10majimajíá ikárinííwa piurí bí yaniro náni úána áma apixí siŋí meáo nibiri apiyá wíwa píraníŋí nimixiniri weníŋí nero ŋweagííwa o tñi nerimeánimi aŋí aiwá apixí meani náni imixárie náni nuro aŋíyo páwíáná ówaŋí yáriníŋinigini. 11Ówaŋí rixa niyárinimáná eŋáná apiyá piurí bí yaniro úííwa nibiro bíariwámi dáni re urigíawixini, ‘Ámináoxini, Ámináoxini, newané ówaŋí neafkwíomeai.’ uríagía aí 12o re uriŋinigini, ‘Nioni nepa searariŋini. Nioni sewayíne náni majíonirini.’ uriŋinigini.” Jisaso ewayí xwiýá e nuriri 13re uriŋinigini, “Sía nioni weapimíayi soyíne majíá eŋagi náni píraníŋí weníŋí nero awíníŋí ŋweáírixini.

Ewayí ikaxí omiŋí wiirigíá waú wo nánirini.

14“Ayí ripi náni ‘Awíníŋí ŋweáírixini.’ searariŋini. Nioni ámi niweapiríná áma nioni nixídarigíayo wigí niirigíápi xixeni wiimíá eŋagi náni nioni áma amipí mimúroníŋí róníŋí imóníŋini. O xegí aŋí wíyo urínauminiri neríná áma xináfwaníŋí nimóniro omiŋí wiirigíáwami ‘Eini.’ nuriri xegí iyíá íá nigwí amipí píraníŋí umeipíri náni yaŋí niwiríná 15omiŋí xixeni epaxowa eŋagi niwiniri womi nigwí K5,000 mini wiri womi K2,000 mini wiri womi K1,000 mini wiri nemo aŋí wíyo urínauminiri uŋinigini. 16Nigwí K5,000 wío apaxí mé nuri nigwí api tñi omiŋí neríná sayá nimixiri ámi K5,000 bí sayá imixiŋinigini. 17Nigwí K2,000 wío eni nigwí api tñi omiŋí neríná ámi K2,000 bí sayá imixiŋinigini. 18E neri aí nigwí K1,000 wío nigwí api nimeámi nuri míníŋwí niripimáná miraxwoyá nigwí píní e tiŋinigini. 19Miraxwo aŋí wíyo urínauminiri wago neméísáná ámi nibiri ‘Gí nigwí rixa sayá nimixa ugíáriani? Siŋwí owinimini.’ niyaiwiri ‘Gí omiŋí niirigíá nigwí wiŋáwa obípoi.’ ráná 20ámá nigwí K5,000 wiŋo nigwí xío wiŋípi tñi nigwí K5,000 xío sayá imixiŋípi tñi nimeámi nibiri siwá niwiri re uriŋinigini, ‘Miraxwe, joxi xámi K5,000 niapiŋípi ámi nioni sayá nimixiríná K5,000 ámi bí imixiŋá ripi siŋwí winei.’ uríagi 21miraxwo re uriŋinigini, ‘Gí omiŋí niirariŋoxini, joxi omiŋí niiríná aniŋí miní naŋí niirariŋoxini, joxi awiaxí éirini. Omiŋí onímiá nioni siapiŋápi joxi aniŋí miní píraníŋí niŋí eŋagi náni gí amipí obaxíyo mería náni “Bosiwoxini” niririri orirípeámini. Joxi níwapiiri nioni tñi nawíni niŋwearíná yayí nioni ninariŋípa axípi yayí osinini.’ uriŋinigini. 22Ámá nigwí K2,000 wiŋo nibiri re uriŋinigini, ‘Miraxwe, joxi K2,000 niapiŋípi nioni sayá nimixiríná K2,000 ámi bí ripi xiriŋá ripi siŋwí winei.’ uríagi 23miraxwo re uriŋinigini, ‘Gí omiŋí niirariŋoxini, joxi omiŋí niiríná aniŋí miní naŋí niirariŋoxini, joxi awiaxí éirini. Omiŋí onímiá nioni siapiŋápi joxi aniŋí

miní pírániŋí niinŋí eŋagi náni gí amipí obaxíyo mería náni “Bosiwoxini” níriri orirípeámini. Joxi níwapi ri nioni tñi nawíni niŋwearíná yayí nioni ninariŋípa axípi yayí osinini.’ uriniginini. ²⁴Ámá niŋwí K1,000 wiŋo nibiri re uriniginini, ‘Miraxwe, joxi aría ríá wé rariŋoxirini. Aiwá joxi jiwaniŋoxi iwíá muriŋe miri iwí mimó eŋe miri yariŋoxi eŋagi náni ²⁵nioni wáyí neri niŋwí K1,000 joxi niapiŋípi nimeámi nuri xwíá weyáriŋárinini. Siŋwí winei. Dixí niŋwípi ripirini.’ uríagi aí ²⁶miraxwo re uriniginini, ‘Gí omiŋí niariŋí ríwí siwíá yinŋí roxini, joxi sipíni eŋírini. Joxi “Xewaniŋo iwíá muriŋe miri iwí mimó eŋe miri yariŋorini.” niniaiwiri náni ²⁷niŋwí nioni siapiŋápi pí náni niŋwí aŋíyo mitipa eŋírini. E nitiri siŋwiriŋí, niŋwí api tñi ámi bi seáyi e ikwáriŋiníŋá meáminiri éárinini.’ nuriri ²⁸wami re uriniginini, ‘Niŋwí K1,000 xiriŋomi nurápiro K10,000 xiriŋomi mini wípoyi. ²⁹Ayí ripi náni searariŋini. Ámá giyí giyí nioni wiŋápi pírániŋí mimepa neri kikiŋá nerínáyí api aí nurápiŋíŋárinini. ³⁰Omiŋí niariŋí sipíomi íá nixero síá yiniŋí bíariwámini moáipoyi. Síá yiniŋeyí ríniŋí ayikwí miwinipa ená eŋagi náni ámá ŋwí earo magí íroniro epíriferini.”’ Jisaso ewayí xwiŋíá e uriniginini.

Ámá niyoni mí ómómiximí winíápi náni uriŋí nánirini.

³¹Ámi re uriniginini, “Ámá imóniŋáoni mixí ináyí nimóniri níkinimáná gí aŋínajowa tñi nawíni xixíeániŋí niga niweapirane íkwianŋwí ámáyo mí ómómiximí emiánami éí ŋweááná ³²ámá gwí wirí wirí náni gí símimanŋímini awí eaáripíríŋárinini. Awí eaáráná nioni ámá sipisipí meariŋíáwa sipisipí tñi memé tñi neyíroro sipisipí midáni memé midáni wárarigiápa ámáyo axípi e neyírori midimidáni niwáriríná ³³sipisipí wé náúmini wáririni memé onamiŋúmini wáririni emiárinini. ³⁴E nemáná mixí ináyoni wé náúmini niŋweagiáyo re urimiárinini, ‘Ámá gí ápo pírániŋí seaimixíŋíŋé níwapiro oyá xwioxíyo ŋweápoyi. Aŋí o xwíárí imixiri aŋína imixiri eŋe dáni seyíné náni wé roáriŋe níwapiro ŋweápoyi. ³⁵Ayí ripi náni searariŋini. Nioni agwí niaríná seyíné aiwá bi niapagiárinini. Iniigi náni nináná iniigi bi niapagiárinini. Nioni aŋí midáŋoni eŋáná seyíné ninipemeámi wagiárinini. ³⁶Iyíá mayoni eŋáná bi nipáragiárinini. Simixí yariná seyíné nibiro nimeŋweagiárinini. Gwí aŋíyo ŋweaŋáná seyíné xwiŋíá niŋwénapagiárinini.’ urimiárinini. ³⁷E uráná ámá wé rónigiŋíŋí re níripíríŋárinini, ‘Ámináoxini, gíná agwí náni yariná siŋwí niranirane aiwá siapagwárinini? Gíná iniigi náni sináná iniigi siapagwárinini? ³⁸Gíná joxi aŋí midáŋoxiniŋí imóniŋáná nisipemeámi wagwárinini? Gíná iyíá mayoxi emeariŋagi niranirane iyíá ripáragwárinini? ³⁹Gíná joxi simixí yariŋagi rimeŋweaagwárinini? Gíná gwí aŋíyo ŋweaŋáná xwiŋíá riŋwénapagwárinini?’ níráná ⁴⁰mixí ináyoni re urimiárinini, ‘Nepa searariŋini, “Seyíné ámá nioni gí imónigiá tŋyo sipí apiami aiwí arirá niwiri e niwirínáyí ayí nioníniŋí niagiawixini.” searariŋini.’

urimíárini. ⁴¹E nurimáná wé onamiñúmini niñweagiáyo re urimíárini, ‘Gorixo náni ramixinigiáýíne píni niniwiárimi nuro ríá aniñí wearíñí xío obo tíni añínají xíomi íwí wikárigiáwa tíni náni imixáriñírími náni úpoyí. ⁴²Ayí ripi náni searariñini. Nioni agwí náni yaríná seyíne aiwá bi miniapagiáárini. Iniigi náni nináná bi miniapagiáárini. ⁴³Añí midáñoni eñáná ninipemeámi wagiámani. Iyíá mayoni emearíná iyíá bi minipáragiáárini. Simixí weñáná minimeñweagiáárini. Gwí añíyo ñweañáná xwiýíá miniñwénapagiáárini.’ uráná ⁴⁴wiwaniñíyí re niripíríárini, ‘Ámináoxi gíná joxi agwí náni eri iniigi náni siniri añí midáñoxi imóniri iyíá mayoxi eri simixí weri gwí añíyo ñweari yariñagi nene siñwí niranirane arirá misipa yagwáriní?’ niráná ⁴⁵ayo re urimíárini, ‘Nepa searariñini. Seyíne áamá nioni gí imónigiá tío sipí apiami aiwi arirá miwipa nerínáyí ayí nioni eníñiñí niagiawixini.’ uráná ⁴⁶ayí ríniñí aniñí winine náni upíríárini. E neri aí wé rónigiáýí diñí niyimiñípi tígiáýí ñweapíríe náni upíríárini.” uríñinigini.

Jisaso náni mekaxí megiá nánirini.

26 ¹Jisaso xwiýíá api nipini nuríísáná xegí wiepisariñowami re uríñinigini, ²“Soyíne níjíárini. Rixa síá wiyáú óráná síá Gorixoyá añínajo negí aríowami mipikí múroñíyí —Eñíná síá ayi Judayo Isipíyí mixí ináyo íá xewwiráñíná Gorixo niaíwí xámiñí niyoni opikíminiri añínají oyáo uowáñíñí aiwi Judayí o ñwí ikaxí uríñípi tíni xixeni nero bisíkeriá yisí mayí úrapí nimixiro niniro sipisipí miá nipikiro ówaníyo ragí xópé yáriá eñagi náni añínajo ayo múroñinigini. Ayináni xwiogwí o o pwéáná sipisipí miá nipikiro bisíkeriá yisí mayí úrapí nimixiro narigiáárini. “Síá ayi imónáná wa áamá imóniñáoni íá ninixero émayí íkíáyo oyekwiroáripoyiniri mini niwipíráoí.” uríñinigini. ³Iná apaxípániñí imónigiá xwéowa tíni Judayí wigí ámináowa tíni awa nerimeániro añí apaxípániñí imónigiáwami seáyi e imóniño, xegí yoí Kaiapasoyí riniñoyáyo awí neániro ⁴mekaxí re megiawixini, “Jisasomi pikianiýí yumí arige nerane íá xiraniréwini?” mekaxí e nimeróná ⁵re nira ugíawixini, “None ámayo mixí émixamoanigini. Aiwá síá Gorixo negí aríowami mipikí múroñíyí náni imixaríná íá mixirípa oyaneyí.” riniñíawixini.

Jisasomi werixí nañí bi iwayimoñí nánirini.

⁶Jisaso añí Betani ñweañáná añí áamá peyíyí yago Saimonoyáyo ñweañáná ⁷apixí wí werixí diñí nañí eaariñí sixí wá —Sixí awá ñigwí aga xwé roñíwáriní. Awá nimeámi níbiri o aiwá niminiri ñweañáná í omi miñíyo iwayimoñinigini. ⁸Iwayimóagi wiepisariñowa siñwí e niwiniro ími wikí diñí niwíaiwiro re riniñíawixini, “Werixí diñí nañí eaariñí api ñigwí xwé roñípi pí náni xwiríá ikixearini?” ⁹Werixí api ñigwí náni bí nerane siñwiríyí, ñigwí

xwé nimearíná áamá uyípeayíyo arirá niwirane mini wipaxírini.” rinariñagía ¹⁰Jisaso siñwí e niwiniri re uriñinigini, “Í ayí naní niariñagi nání pí nání ayá wí rariñoi? ¹¹Ayí ripi nání searariñini, ‘Áamá uyípeayí soyíné tñi íníná ñweapíríá enjagi nání ríwéná aí arirá wipaxírini. E neri aí nioni íníná soyíné tñi ñweámíámani.’ searariñini. ¹²Í werixí api nioni niniwayimoríná ayí xwíá niweyipíri nání iwamíó nimixarini. ¹³Nepa searariñini. Xwíá rírí nirímíni amigimí xwíyíá nioni nání yayí seainariñipi wái nemero nurimeríná apixí rí nioni werixí dñjí naní eaariñí ripi niwayimóipi nání eni repiyí wíáná ‘Jisasomi apixí wí e iyí reñinigini?’ yaiwipíríáriní.” uriñinigini.

Judasó nigwí meáminiri miyí uriñí nánirini.

¹⁴E uráná Isikarioti dñjí Judaso apaxípániñí imónigía xwéowa tñjí e nání nuri ¹⁵re uriñinigini, “Nioni Jisaso nání miyí searánáyí soyíné ‘Omi pí wianíwini.’ seaimónarini?” uríagi nigwí siripá 30 íáyo niroaro re urigíawixini, “Ripi siapaníwini.” uráná ¹⁶o e dání “Xegípi ñweañáná pasá umemí nání siñwí owinaxídimemini.” niyaiwiri e enjiginí.

Wiepisariñowa tñi aiwá Aníñajo Múronjyí nání nigíá nánirini.

¹⁷Síá iwamíó Judayí bisíkeríá yisí mayí úrapí nimixiro narigíáyí iwamíóyi imónáná wiepisariñowa Jisasomi nibiro re urigíawixini, “Ge nurane aiwá Aníñajo Neamúronjyími nání yeaanariñwápi joxi tñi nani imixaniréwini?” uríagía ¹⁸o wiepisariñyí waúmi re uriñinigini, “Awagwí Jerusalemí nání nuri áamá nioni earariñáomi niwímearíná re urípiyi, ‘Yegí yearéwapiyariño re riñoi, “Nioni xeaniñí nipíri añwi ayorini. Gí wiepisariñowa tñi joxiyá añfyo aiwá Aníñajo negí aríowami mipikí wiárí Múronjyí nání naníwini.” riñoi.’ urípiyi.” urowáriagi ¹⁹wiepisariñowaú nuri Jisaso urípa axípi neri síá Aníñajo Múronjyí nání sipisipí miá wo nipíkiri riyamí egíisixini. ²⁰Síápi tñi Jisaso xegí wiepisariñí wé wúkaú sikwí waú tñi nibiro íkwianjwíyo éf niñwearo ²¹aiwá awaú nimixiri típi niniróná o re uriñinigini, “Nepa searariñini. Soyíné woxi nioni nání miyí nuriríni.” uríagi ²²awa dñjí ríá uxéagi wo wo re nura ugíawixini, “Ámináoxini, nioni nání mirariñini. Nioni nání mirariñini.” nura úagía ²³o re uriñinigini, “Múyo nioni tñi axíná eagwiarigwílo miyí nurinorini. ²⁴Áamá imóniñáoni ríwamiñí neániri riniñípa xixeni nipíri aiwi áamá nioni nání miyí nuriri pasá nimeno Gorixo xeaniñí ríá tñjí winíá enjagi nání aweyi. Xinái omi mixirípa neri siñwiríyí, ríniñí Gorixo winíápi winimíniri enj menjagi nání naní imónimíniri enjírini.” uríagi ²⁵Judasó, miyí urino re uriñinigini, “Niréwapiyariñoxini, ‘Aga nionimani.’ nimónarini.” uríagi Jisaso re uriñinigini, “Jíwaniñoxi aí nirariñini.” uriñinigini.

“Ripi gí waráriní. Gí ragírini.” uriñí nánirini.

²⁶Jisaso awa sini aiwá niniróná bisíkeríá bí nimeari api nání Gorixomi yayí niwiri kwikwirimí neri wiepisariñowami miní niwiri re uriñinigini,

“Ripi ayí gí waráriní. Ninirápiro nípoyi.” nuriri 27-28 kapixí iniigí wainí íniñíwá nimeari Gorixomi yayí niwimáná awami miní niwiri re uriñinigini, “Noyínéni riwá nípoyi. Ayí ripi nání searariñini. Nioni ámá níní nání nipikíáná ragí nioniyá xwíáyo pwarinañagi niwiniríná re yaiwipíráoi, ‘Xwiyáa siñí réoáriñipi rixa yoxáíniñí yipámoñoi. Nene íwí yariñwápi yokwarimí nealini nání ría eñoi?’ yaiwipíráoi. 29E neri aí re searariñini, ‘Nioni re dání iniigí wainí ámi wí miní néra núisáná gí ápo xío xegí xwioxíyo mimeámí niseairí seameñweané dání ámi nioni tñni nawíni anani naníwáriní.’ searariñini.” nuriri 30sonjé Gorixomi yayí umeairo nirimowa nipeyearo díwí Oripipámi nání yigíawixini.

Pitao “Nisiepísamoárimí éí umiméini.” uriñí nánirini.

31 Jisaso wiepisariñowami re uriñinigini, “Sía riyimi soyíné noyínéni niniepísamoárimí upíráoi. Ríwamiñí neániri ewayí xwiyáa soyíné nání re riniñípi, ‘Gorixoní sipisipí xiáwomi pikioeawáraná sipisipí ami ami uminíáriní.’ riniñípi xixeni imónini nání nioni niniepísamoárimí éí upíráoi. 32Nioni ninipikiro aí nioni Gorixoyá diñíyo dání niwiápinimeámáná Gariri piropenisíyo nání xámi yimíáriní.” uríagi aí 33Pitao re uriñinigini, “Ámá wa nowani nisiepísamoárimí úagía aiwi nioni wí nisiepísamoárimí éí umiméini.” uríagi 34Jisaso re uriñinigini, “Nepa rirariñini. Sía riyimi áriwegími karíkarí sini ríaiwá miraríná joxi nioni nání ripiaú ripi re nuriríini, ‘Nioni o nání majíáriní.’ nuriríini.” uríagi 35Pitao re uriñinigini, “Nioni eni joxi tñni ninipikiro aiwi ‘O nání nioni majíáriní.’ wí rimiméini.” nuriri wiepisariñí wía eni axípiní e nura ugíawixini.

Gesemani dání Gorixomi xwiyáa uriñí nánirini.

36 Jisaso awa tñni omiñí ojikwíí Gesemaniyi riniñe nirémoro re uriñinigini, “Soyíné re ñweañáná nioni dae nuri Gorixomi xwiyáa ririmí wimíini.” nuriri 37Pitaomi tñni Sebediomi xewaxowaúmi tñni niwirimeámi nuri diñí ría uxearinañagi 38awami re uriñinigini, “Nioni diñí ría nixearinañagi nání rixa nipepaxí niarini. Soyíné re niñweámáná nioni tñni nawíni awí oñweaneyi.” nurimi 39niwárimí bi onimiápi nuri símimañimíni nipíkínimeari Gorixomi rixiñí nuriríná re uriñinigini, “Gí ápoxini, anani e epaxí eñánáyí, xeaniñí nioni nímeaníyí kapixí nioni nimíniñí imóniñíwá anani ninirápiri emi miwayimoriréini? Nioni e rirariñagi aiwi diñí nioniyáyo mixídí joxiyáyo xídei.” nurimi 40wiepisariñowa wárie nání nibiri awa sá weñagía niwiniri Pitaomi re uriñinigini, “Soyíné nioni tñni bi onimiápi awí niñwearane nawíni miñweapaxí riseaimónarini? 41Soyíné diñí re niseaimóniri aiwi, ‘Jisasomi pí pí wímeáagi aiwi anani númi xídaníwáriní.’ niseaimóniri aiwi segí wará éí seainiñoi. Éí miseainipa eni nání awí niñwearo Gorixomi

rixinjí re urípoyi, ‘Awami obo yapí owíwapiyiniri siŋwí mineanipa ei.’ urípoyi.” nurimi ⁴² ámi bi nuri rixinjí nuriríná re uriŋiniginí, “Gí ápoxini, nioni kapixí xeaninjí nímeani nání imóninjíwá minipaxí imóninjánáyí, minimúropaxí eŋánáyí, joxi simónariŋipi oimónini.” nurimi ⁴³ ámi nibiri weninjí éyí wiŋiniginini. Wiepisariŋowa siŋwí sipíxipíxi wiarinagi sá riwa weŋagia niwiniri ⁴⁴ ámi awami píni niwíarimi bi nuri xámi xanomi rixinjí nuriríná urípa axípi ámi nurimi ⁴⁵ nibiri wiepisariŋowami re uriŋiniginini, “Soyíné sini kikiáá nero sá riwoyíné riweŋoi? Aría reŋoi? Ámá imóninjáoni íwí yariŋíáyí pasá ninimero íá nixirípíri rixa iyíxini. ⁴⁶ Rixa wiápinimeápoi. Oweaneyi. Siŋwí winípoyi. Pasá nimeno rixa iwo yaparini.” uriŋiniginini.

Jisasomi íá xirigíá nánirini.

⁴⁷ Sini e uraríná re eŋiniginini. Judaso —O wiepisariŋí worini. O ámá obaxí apaxípáninjí imónigíá xwéowa tñi Judayí mebáowa tñi urowárfáwa, wigí kirá tñi iwanj tñi nimaximi Judasomi ríwíyo xídigíáwa o nipemaximi Jisaso tñj e rémónapiŋiniginini. ⁴⁸ E niremónapimáná óí e dání re urípa, “Nioni pasá numeri kíyí miaúnáná ayí símimajíóninjí seaiariŋini. Soyíné ‘O Jisasaríani?’ niyaiwiro íá xirírixini.” urípa ⁴⁹ Jisasomi niwímearíná aŋjini yayí “Gí nirewapiyariŋoxini” nuriri kíyí miaúninjiginini. ⁵⁰ Kíyí miaúnáná Jisaso re uriŋiniginini, “Nigí nikumixiniri emearigwífoxini, joxi nioni niminiri bariŋipi rixa riniariŋini?” uráná awa míri nibiro omi íá xirigíawixini. ⁵¹ Íá xiraríná Jisaso tñi rogíáwa wo xegí kirá reŋj nimixeari apaxípáninjí imóninjí seáyi e imóninjóyá ominjí wiarinomi miŋj oróminiri éyí píri nimoyíkiri aría miŋj niwirípeari mamówariniginini. ⁵² Aría miŋj niwirípeari mamówáráná Jisaso re uriŋiniginini, “Kirápá aŋíwámi ámi sixí ikwaseaárei. Xwiyíá re riniŋipi, ‘Ámá kirá íá nimaxiriro ámá pikianiro emearigíá giyí giyo wíniyí eni kirá tñi pikipíríárini.’ riniŋipi diŋj rimoariŋini? ⁵³ Joxi diŋj re riyaiwariŋini, ‘O xegí xanomi yariŋj niwirínáyí, xano éí umíni nání aŋínají siminjí wínarigíáwa íá miropaxí wí e bi wí e bi miaúrárí wé wúkaú sikwí waú ininjipi murowárenapipaxirini.’ riyaiwariŋini? ⁵⁴ Oweoi, ápo nurowárenapipaxí aiwi nioni api nání yariŋj niwirínáyí, ríwaminjí nioni nání ‘E niwiro pikipíríárini.’ niriniri eáninjipi arige xixeni imóninjoi?” E nurimáná ⁵⁵ xíomi íá xiraniro bíáyo re uriŋiniginini, “Soyíné ámá íwí xauráparinjí womi íá xiraniro nání yariŋíapa kirá tñi iwanj tñi íá nimaxirimi nioni íá nixiraniro ribariŋoi? Sía ayí ayo nioni aŋj ridiyowá nání mirininjíwámi niŋweámáná searéwapiyariŋagi aiwi soyíné wí íá nixiraniro egíámani. ⁵⁶ E neri aí wíá rókiamoagíáwa nioni nání niriro Bikwíyo eagíapi xixeni imónini nání soyíné e niariŋoi.” uráná wiepisariŋowa nowani omíni niwiepisamoárimi éí ugíawixini.

Jisasomi xwirixi umegia nánirini.

⁵⁷Jisasomi íá xiríáyí omi niméra nuro Kaiapasoyá ańyíyo ńwí ikaxí eáníńpí mewegíáwa tńni Judayí mebaowa tńni awí eánarigie nání nimeámi waríná ⁵⁸Pitao “Jisasomi pí wípíríreroi?” niyaiwiri ná jíami dání aninaxídí niwiéra númi nuri apaxípáníńi imónińi seáyí e imónińoyá ańi ákińáyo nipáwiri porisowa tńni nawíni ńweańáná ⁵⁹apaxípáníńi imónigíá xwéowa tńni Judayí mebaowa nowani tńni omi pikípírí nání “Sińwí íwí winarogíá xwiyíá omi pikípaxí imónińiyí bi ouxekwímópoyi.” niyaiwiro “Xwiyíá omi uxe kwímopaxí bi oimónini.” niyaiwiro rayaríná ⁶⁰ámá obaxí nibayiro omíni nuxekwímoro aiwi omi anani pikípaxí wí mimóni niyayíásáná waú nibiri ⁶¹omi nuxekwímori re rigísisixini, “Ámá ro re rińorini, ‘Nioni ańi ridiyowá yarigíwá nipineari síá wiyáú wiyimíni ámi miripaxonirini.’ rińorini.” rigísisixini. ⁶²E nirimáná eńáná apaxípáníńi imónińi seáyí e imónińo niwiápínimeari re urińinigini, “Joxini xwiyíá rixekwímooarigíáyí nání xwiyíá wí miripaxí risiarini? Sini xwiyíá niri xekwímoríná rarigípi, ayí pí nání rarińi?” uríagi aí ⁶³Jisaso xwiyíá bi murińinigini. Xwiyíá bi murarińagi apaxípáníńi imónińi xwéo sińwí e niwini re urińinigini, “Joxi nepa Kiraisoxi, ámá yeáyí neayimixemearía nání aríowayá xwíá piaxíyo dání iwiarońfoyi rarińwáoxi eńánáyí, nepa niaíwí Gorixoyáoxi eńánáyí, ńwíá ańińi sińi imónińo tńńi e dáníńińi nirińi áwanńi nearei.” uríagi ⁶⁴Jisaso re urińinigini, “Oyi, ayí rixa joxi rarińini. E neri aí re rirarińini, ‘Ríwéná seyíne ámá imónińáoni Gorixo eńi síxí eáníńoyá wé náúmíni ńweańagi sińwí naniro ańínami dání agwí tńni weparińagi naniro epírírini.’ rirarińini.” uráná ⁶⁵Apaxípáníńi imónińi xwéo wikí niwóniri xewaníno xegí rapirapí yínińú naxeri ámináowami re urińinigini, “Ámá ro Gorixomi xewaxoniginiri rixa omi riperirí umearini. Ámá wíni wíni omi xwiyíá uxe kwímopírí bipaxí mimónini. Ai, o Gorixomi riperirí umearíná sewanińoyíne rixa aríá wíoi. ⁶⁶Soyíne dińi pí yaiwarińoi?” uríagi awa re urigíawixini, “O rípi rixa nipikípaxírini.’ neaimónarini.” nurimáná ⁶⁷omi símimańyíyo reańwí úriro wé amimá nemáná earo neríná wa wé piárá nupikákwiayiróná ⁶⁸re urayigíawixini, “Kirisoxini, dixí imónigíáyo yeáyí uyimixemearía nání aríowayá xwíá piaxíyo dání iwiarońoxini, áwanńi nineariri wíá nearókiamoi. Agwí iwanńi go reaarini? Iwanńi go reaarini?” urayigíawixini.

Pitao “O nání nioni majíárini.” urińi nánirini.

⁶⁹Pitao, ańi ákińáyo íniriwámíni ńweańomi apaxí omińi wiarińi wí re urińinigini, “Joxi Gariri piropenisíyo dáni Jisaso tńni emearińi woxirini.” uríagi aiwi ⁷⁰Pitao “Oweoi.” nuriri “Jíxi rarińiyí nání nioni majíárini.” nurimi nuri ⁷¹íwí ákińá tńńi e rońáná ámi wí nibiri omi sińwí niwini ámá e ńwixapigíáyo re urińinigini, “Ámá royí Nasareti dáni Jisaso tńni

emearigiáyí worini.” uríagi aí ⁷²Pitao “Oweoi.” nuriríná “Xwíá tí tíjé e dání searariṅini. Ámá o nání nioni majjárini.” nurimáná eṅáná ⁷³ríwíyo onimiápi e rówapigiáyí aṅwi e nibiro Pitaomi re urigíawixini, “Xwiyíá joxiyá Gariri piropeniṣíyo dánjyí rarigiápi axípi rariṅagi nání joxi ayíyá woxirini.’ neaimónarini.” uráná ⁷⁴o sipí ikaxí niméperi re uriṅinigiṅi, “Xwíá tí tíjé e dání re searariṅini, ‘Nepa o nání nioni majjárini.’ searariṅini.” uráná re eṅinigiṅi. Karíkarí ráiawá riṅinigiṅi. ⁷⁵Karíkarí ráiawá ráná ámi píné Jisaso urípi “Karíkarí sini ráiawá miriṅáná joxi biaú bí ámá wíyo re uriríini, ‘O nání nioni majjárini.’ uriríini.” urípi dṅí niwiniri e dání nipeyeari ṅwí piyí wírinigiṅini.

Jisasomi Pairato tíjé e wárigiá nánirini.

27 ¹Wíápi tíni apaxípániṅi imónigiá xwéowa tíni Judayí mebáowa tíni Jisasomi nipikipiri nání xwiyíá numearimáná ²gwí niyiro nimeámi nuro émányí gapimaní Pairato tíjé e wárigíawixini.

Judasó gwí yaíminiṅi nánirini.

³Judasó, Jisasomi miyí uríó mebáowa “Jisaso xewaniṅo rípi nání pikipaxí imóniṅagi nání émányí opikípoyi.” rariṅagiá aríá niwiri dṅí sipí wíagi nigwí siripá 30 miní wíápi ámi nimeámi nuri apaxípániṅi imónigiá xwéowami tíni Judayí mebáowami tíni miní wiminiri neríná ⁴re uriṅinigiṅi, “Nioni ámá íwí bí méomi miyí nuriri nání sipí ikáriníanigiṅi.” uríagi aí awa re urigíawixini, “Jiwaniṅoxi épi nání none pí nání nearariṅini? Jiwaniṅoxi ikixéini.” uríagiá ⁵Judasó nigwípi ridiyowá yarigíiwámi e emi nimoánimo nuri xewaniṅo gwí yaíminiṅini.

⁶Judasó peyeááná apaxípániṅi imónigiá xwéowa nigwí api nimearo re rinigíawixini, “Nigwí ripi ámá opikípoyiniri wíwápi eṅagi nání nigwí Gorixo nání aṅí riwámi tarigiápi tíni nawíni níkwierorínáyí, ayí nipikwini menini.” niriniro ⁷nigwí api nání xwiyíá niriníáwa nigwí api nimeámi nuro ámá midánjé imónigiáyí xwíá weyipíría nání xwíá xegí yóí Xwáriá Sixí Imixarigiáyíyápiyi riniṅipi bí egíawixini. ⁸Nigwí ámá opikípoyiniri wigíápi tíni xwíá api bí éagiá nání yóí Ragípiyi wíragíáriní. Agwi eni sini e nira wariṅoi. ⁹Awa e éáná xwiyíá Gorixoyá wíá rókiamoagi Jeremaiao niwuriyiri ríwamiṅi eaṅí ripi, “Awa nigwí 30 Isireriyí ‘Ámá wo xegí wo nání miyí nearáná wianíwáriní.’ rinigiápi nimearo ¹⁰xwíá xegí yóí Xwáriá Sixí Imixarigiáyíyápiyi riniṅipi Gorixo sekaxí niriṅipi tíni xixeni bí nero miní wigíawixini.” Xwiyíá e niriniri eániṅipi íná xixeni e imóniṅirini.

Pairato Jisasomi yariṅi wiayiṅi nánirini.

¹¹Jisasomi nimeámi nuro gapimaní Pairato tíjé e mearémóáná gapimano yariṅi niwiayiríná re uriṅinigiṅi, “Joxi míxí ináyí

Judayíyáoxirani?” uríagi Jisaso “Joxi e rariñini.” uriñinigini.

¹² Apaxípániñí imónigíá xwéowa tñi Judayíyá mebáowa tñi xwiyíá obaxí ominí uxekwímoaríagía aiwi o xwiyíá xixe uripaxí nimóniri aí bi muriñinigini. ¹³ Xwiyíá bi murí yariñagi Pairato siñwí e niwiniri re uriñinigini, “Xwiyíá obaxí ‘Joxiní rixekwímoayarigíáyo aríá miwipa riyariñini?’ nuriri ¹⁴ Jisaso xíomi uxekwímoarigíá bi nání aí xío bi murí yariñagi niwiniri ududí wiñinigini.

Pairato Jisasomi níkweari wáriminiri enjipi nánirini.

¹⁵ Síá Gorixo Judayo mipikí wiáí múronjyí imóniñáná xwiogwí ayí ayo Judayí nuro wigí gwí ñweagíá wo nání émáyí gapimanomi yariñí wiáná o ayo yayí owimóminiri wigí go go nání wimónariñyí wáriagírini. ¹⁶ Íná wigí áamá gwí ñweañí wo Barabaso y riniño Judayí nñi yoí oyá nijíá imónigíárini. ¹⁷ Ayináni áamá sipíá ayí gapimaní Pairato tñí e awí eánáná o re uriñinigini, “Nioni go seawárimíini? Barabaso seawáriminiréini? Jisaso, áamá Kiraisoyi rarigíó seawáriminiréini?” uriñinigini. ¹⁸ Ayí ripi nání e uriñinigini. O nijíárini. Apaxípániñí imónigíá xwéowa Jisasomi sipí diñí niwíaiwiro nání xío tñí e wáíá nání o nijíárini. ¹⁹ Ripi nání eni “Jisaso seawáriminiréini?” uriñinigini. O íkwianjwí xwirixí meariñnami éí ñweañáná xiepí Jisaso nání xwiyíá re urowárenapiñinigini, “Áríwiyimi áamá o nání oriñá niwiniríná diñí ríá nixéinigini. Ayináni áamá wé róniñí omi sipí wí miwimixipani.” urowáíí enjagi o áamá e epíroyí egíáyo “Jisaso seawáriminiréini?” uriñinigini. ²⁰ E uríagi aiwi wíá móniñími apaxípániñí imónigíá xwéowa tñi Judayíyá mebáowa tñi áamá oxí apixí aiwá api nání epíroyí egíáyo re uriméíá enjagi nání, “Barabasomi neawáíí. uriro ‘Jisasomi opikípoi.’ uriro éfrixini.” uriméíá enjagi nání ²¹ gapimano áamá e epíroyí egíáyo “Áamá rowaú gímíni go seawárimíini?” uráná ayí re urigíawixini, “Barabaso neawáíí.” uríagía ²² Pairato re uriñinigini, “Nioni Jisaso, áamá Kiraisoyi rarigíómi pí wimíini?” uríagi nñi re urigíawixini, “Omi íkíáyo seáyi e oyekwiroárípoi.” uríagía ²³ o re uriñinigini, “Pí nání? Pí íwí éí nání yekwiroáríimíini?” uríagi aiwi ayí xwamiání nura nuro re urigíawixini, “Omi oyekwiroárípoi.” nira waríná ²⁴ Pairato “Gí xwiyíá aríá minipa epíri enjagi nání ámi bi nuriri aí nanj wí imóninimeniñoi. Ríxa mixíni épímixamopíráoi.” niyaiwiri áamá ayí re oyaiwípoiñiri, “O ‘Jisasomi xe oyekwiroárípoi.’ níriri aí ‘Reá miroánipa oemíni.’ niyaiwiri ríá yarini?” oyaiwípoiñiri wigí siñwí anigíe dání wé wayí níróniri re uriñinigini, “Áamá ro manj nioniyáyo dání pikipíriméoi. Sewaniñyíiné segí manjyo dání pikipíráoi.” uríagi ²⁵ áamá nñi re urigíawixini, “Oyá ragí pí eniñoi xe oneaxénini. Negí niaíwíyo eni xe oxénini.” uráná ²⁶ Pairato re enjinigini. Barabaso niwáiriri porisowami re uriñinigini, “Jisasomi síkwíá ragí píí nuyíkímáná íkíáyo seáyi e yekwiroárípoi.” nuriri miní wiñinigini.

Porisowa Jisasomi riperirí megíá nánirini.

²⁷Porisowami mini wíáná awa Jisasomi nimeámi gapimaníyíyá anjío —Anjío yóí Piretoriumiyi riniñiyorini. Anjío ayo nipáwiro porisí nowamini “Eini.” nuriro “Omi riperirí omépeaneyí.” niriniro re egíawixini. ²⁸Omi rapirapí xegí yíniñú niwiriro emi moro ámi ayiá riñjé wú, mixí ináyowa yinarigíáyo dánjyí wú nimearo uyíro ²⁹ópiyá enjínjé imóninjé wirí níkíkíyímáná mixí ináyí aminarwíniñjé imóninjé miñjío díkínarigíápa omi enjé tñi miñjío udíkiáriro xoyíwá wiyi mixí ináyowa maxirarigíápa íá umiriro nemáná agwíriwámíni xómíñjé niyikwiro riperirí numeríná re urayigíawixini, “Judayíyá mixí ináyoxini, yayí osianeyi.” nuriro ³⁰reanwí niwúrayiro xoyíwáyí nurápiro miñjío neayiro ³¹rixa riperirí numearíásáná rapirapí ayiá riñjé niwiriro ámi xegú nuyírimáná íkíáyo seáyimi yekwiroáraniro nání niméra ugíawixini.

Jisasomi íkíáyo yekwiroárigíá nánirini.

³²Yekwiroáraniro nání anjé apimi dání niméra nuróná Jisaso rixa enjé meánjé yariñagí niwiniro ámá wo, Sairini dánjé Saimonomi sekaxí re urigíawixini, “Yoxái ripá nimeámi wuii.” nuriro ³³rixa díwí mífeyoanjé apikwí xegí yóí Gorigotai riniñjípimi —Díwí api yóí míkí ámá miñjé gixweá nánirini. Díwí apikwinimi nírémoro ³⁴wa Jisaso ríniñjé miwinipaa oeniri marisíná yíkí yariñjé bí iniñjé wainíyo niwayimómáná nawíni oimóniri kiríkirí nimeari e nero mini wíáná iwamíó gígí éáná minipaxí wimóninjínigini. ³⁵Porisowa omi rixa yoxáíyo seáyí e niyekwiroárimáná “Oyá rapirapí none go go meanirfeniñoi?” niriniro áwini e nitimáná sárú nemáná ³⁶éí niñwearo Jisasomi awí nimeñwearo ³⁷ámá níni “O íwí api éí nání ripikiariñoi?” oyaiwípyiniri íkíá wárá nimearo “Ámá ro Jisaso Judayíyá mixí ináyorini.” niriro ríwamiñjé nearo miñjé tñjé e seáyí e píraugíawixini. ³⁸Jisasomi niyekwiroáriríná ámá íwí mearigíáwaúmi eni midimidáni yekwiroárigíawixini. ³⁹Ámá óyimi biri uri niyayiríná peayí siñwí niwiniro miñjé kiríkirí nimearo ikayíwí numeariróná ⁴⁰re urayigíawixini, “Re riñoxirani? ‘Niwaniñoni anjé ridiyowá yarigíáwá nipineari gí níwini síá wiyáú wiyimi ámi mirimíáriní.’ riñoxirani? Joxi nepa niaíwí Gorixoyáoxi enjánáyí, jiwaniñoxi enjé niyooárinimi wepínei.” rayigíawixini. ⁴¹Apaxípániñjé imónigíá xwéowa tñi ñwí ikaxí eániñjipi mewegíáwa tñi Judayíyá mebaowa tñi ámá biri uro yayarigíáyí riperirí umeararigíápa awa eni riperirí numero re rigíawixini, ⁴²“O ámáyo ‘Nioni tífamini báná yeáyí seayimixemeámíáriní.’ uragí aí xewaniño arirá minipaxírini. Íkíáyo dání enjé niyooárimí wepínánáyí, anani diñjé wikwíroaníwini. ⁴³O Gorixomi diñjé niñwiríriri re rinariñorini, ‘Nioni niaíwí Gorixoyáonirini.’ rinariñorini. Gorixo xewaxí ro nání yayí niwinirínáyí, rixa éí oumínini. Arirá winirfeniñoiniri siñwí winaníwini.”

rigíawixini. ⁴⁴Íwí mearigíwau midimidáni yekwiroárinigíwau eni Jisasomi ikayíwí numeariríná axípini rigíisixini.

Jisaso peñí nánirini.

⁴⁵E néra núfásaná eñáná rixa sogwí áwini e 12:00 imónáná re eñinigini. Aní nimini síá yináriniginini. Síá niyinárinisáná rixa 3:00 p.m. imónáná ámi wía óniñiginini. ⁴⁶Ámi wía ónáná Jisaso xegí Xibiruyí píné tñi ráiwa re riñiginini, “Eri, Eri, ramí sabakitani?” urinípiyí re niriríná uriniginini, “Gí Gorixoxini, gí Gorixoxini, joxi pí nání niepisamoarinini?” ráiwa e ráná ⁴⁷ámá e rówapigíáyí wí Jisaso e ríagi aría níwiro re rinigíawixini, “Wía rókiamoagí Irajao nání ráiwa ría rarini?” niriniro ⁴⁸ayí wigí wo aníni nuri írkwí bi nimeari wegwía wá tñi ayiñwí nikiroárimáná iniigí wainí níá eñí bi írkwípimi niwayimómáná Jisaso oniniri wimixániminiri yaríná ⁴⁹xegí wíniyí re urigíawixini, “E mepani. Irajao niwepíniri arirá winirfeniñoi? Arirá miwipa enirfeniñoi? Siñwí owinaneyi.” raríná ⁵⁰Jisaso ámi eñí tñi ráiwa bi niriríná xegí diñí niyámiga uñiginini. ⁵¹Xegí diñí niyámiga úaná re eñinigini. Rapirapí aní ridiyowá yarigíwámi awawá ñwía Gorixoyá nání niyimároniri epanjoárininú yoparí éde dání xegípi naxega niwepíniri wúkaú imóniri xwía poboní éaná síñá xwé áwinimi niñiga uri ⁵²ámá xwáripá noxoága úaná ámá Gorixomi diñí wikwíroagía piyíyí wegíe dání síñí ero egíawixini. ⁵³Piyí ayí Jisaso rixa niwiápínimeámáná eñáná nuro Jerusaremí rémóáná ámá obaxí ayo siñwí winigíawixini. ⁵⁴Porisowami seáyi e imóniño tñi porisí xío tñi Jisasomi awí mearogíawa tñi xwía poboní eri amipí e imóniri éagi niwiniro ói nikáriniro re rinigíawixini, “Ámá royí neparini. Gorixomi xewaxorini.” rinigíawixini.

⁵⁵Apixí obaxí “Jisasomi sañí nurápa númi ouxidaneyi.” niriro Gariri piropenisíyo dání bíwá ná jíami nirómáná siñwí winigííwa ríwarini. ⁵⁶Íwa wí Magidara dání Mariaírini. Ámi wí Jemisomi tñi Josepomi tñi xinái Mariaíyi riniñirini. Ámi wí Sebediomi xewaxowaúmi xináírini.

Jisasomi xwía weyárigíá nánirini.

⁵⁷Rixa sogwí nokepá tñi ámá amipí mimúróniñí wo —O Arimatia dání Josepoyi riniñorini. O eni Jisaso wiepisiñíyí worini. ⁵⁸O émáyí gapímaní Pairato tñí e nání nuri Jisaso piyomi xwía weyáriminiri nání yariñí wíáná Pairato porisowami “Xe omeaniri siñwí winípoyi.” uríagi ⁵⁹Josepo nuri piyomi nimeari rapirapí apía xaíwí wenípi tñi xopixopí nirómáná ⁶⁰síñá ói xewaniño nání rixiñíyimi —Ayi ámá sini miweníyirini. Ayimi nimeámi nipáwiri nitimáná síñá piará xwé wo mimegwinárí niméra nuro síñá óiyimi nipíroárimi uñiginini. ⁶¹Magidara dání Mariaí tñi Mariaí wí tñi ípaú síñá óíyi midániñe niñweámáná Jisaso piyomi e tariñagi winigíisixini.

Jisaso piyomi awí mearogíá nánirini.

⁶²Síá Sabariáyo nání Judayí amípí pírániñí imixárarigíáyi óráná wíápi tñi apaxípániñí imónigíá xwéowa tñi Parisiowa tñi awa gapímaní Pairato tñí e awí neániro ⁶³Jisaso piyo nání re urigíawixini, “Ámináoxini, yapí neaíwapiyio sini mipé niñwearíná re riñípi, ‘Sía wíyaú wíyi óráná ámi wiápínimeámíáriní.’ riñípi nání ðiñí neainariñagi nání bariñwini. ⁶⁴Oyá wiepisariñowa nibiro piyomi íwí nimearo píní nitimáná ámayo re uripírixiniri, ‘O rixa wiápínimeáinigini.’ uripírixiniri joxi porisí wami sekaxí re urowárei, ‘Omi xwíá weyárigíe nání nuro awí síá wíyaú wíyimi mearópoyi.’ urowárei.” uráná ⁶⁵Pairato re uriñinigini, “Sewanioyíné porisí wa awí mearopíri nání nimeámi nuro soyíné íwí mimeapa oépoyiniri yarigíápa wiepisariñowa piyomi íwí meapírixiniri e e nurára úpoyi.” uríagi ⁶⁶awa nuro Jisaso xwíá weyárinige porisowami e e nurára numáná síkí bi nimearo símimajió nání síñá píróniñomi seáyi e ikwiárarigíawixini. Apí miwenjáná “Ámá nipáwiro piyomi meáíáriní?” yaiwianíwániro nání e egíawixini.

Jisaso ámi wiápínimeañí nánirini.

28 ¹Magídara dájí Mariaí tñi Mariaí wí tñi Sabariá rixa wéaná Sadéyo isíáyo ípaú Jisasoyá xwáripáyo síñwí winaniri nání nuri ²sini mirémopa yaríná re eñinigini. Poboní xwé wí éaná añínají Gorixoyá wo añínami dání niweapíri síñá xwáripáyo óiyimi píroárigío mimegwinárí néra nuri óiyimi niwiemoárimáná síñáomi seáyi e éí ñweáagi ³⁻⁴porisí awí mearoarigíáwa añínajo ápiañwí yariñípa wíá éniñí nókiri ñweañagi niwiniro xegí rapirapí eni síñwí mimíñí iní yíniñagi niwiniro óí níkariníro piyíniñí nimóniro xwíámi píerinowigíawixini.

⁵Añínajo sini xwáripá tñí e ñweañáná ípaú rémónapiágí re uriñinigini, “Aípagwí wáyí mepani. Nioni níjíáriní. Aípagwí Jisaso, piyomi íkíáyo yekwiroárigíomi síñwí winaniri bariñii. ⁶O re miwenini. Xío seariñípa rixa niwiápínimeámi úninigini. Aípagwí xíomi tigé nibiri síñwí winípiyi.” nuriri ⁷ámi re uriñinigini “Rixa nuri xegí wiepisariñowami re urémeápiyi, ‘“O xwáripáyo dání rixa niwiápínimeámi úninigini. Aríá épiyi. O Gariri piropenisíyo nání xámi yími soyíné e niyoaro síñwí winipíriáriní.” urémeápiyi.’ earariñini.” uríagi ⁸ípaú añíni xwáripáyo píní niwiárimí nuríná wáyí ikáriniri yayí ikáriniri néra nuri wiepisariñowami áwaní urémeaniri añíni waríná re eñinigini. ⁹Jisaso ípaúmi niwímeari “Gí amá aípagwí!” nuriri yayí e wíaná ípaú añwi e nuri miñí xwíáyo níkwírori xegí síkwí íá níxiriríná omi seáyi e umegísixini. ¹⁰Seáyi e uméaná o re uriñinigini, “Aípagwí wáyí mikárinipani. Sa nuri gí amá imónigíawami áwaní re urípiyi, “Soyíné Gariri piropenisíyo nání yírixini.” riñoi.’ nuriri re urípiyi, ‘“Nioni e síñwí nanipíriáriní.” riñoi.’ urípiyi.” uriñinigini.

Porisowami xwapírá eaárigiá nánirini.

¹¹Ípaú sini wiepisariḡowa tíḡi e nání waríná re eḡiniginini. Porisí awi mearóíáwa Jerusaremíyo nirémoro apaxípániḡi imónigiá xwéowami wa winíápi níḡini nání repiyí wíáná ¹²awa Judayíyá mebáowami awi neaáriro xwiyíá nimiximáná porisowa áwanḡi murípa érixiniri nigwí xwé obaxí mini níwiro ¹³re uríḡawixini, “Ámá wí yariḡi seaáná re urírixini, ‘Áríwiyimi none sá weḡáná xegí wiepisiḡowa níḡiro piyomi íwí nimeámi ugíawixini.’ urírixini. ¹⁴Gapimaní Pairato xwiyíá api rinariḡagi aríá níwirínáyí, o iwanḡi seaeaniginiri samini imixaniwá eḡagi nání ayá síwí nisearori diḡi obibaxí mimopani.” uríagiá ¹⁵porisowa nigwí api nurápiro apaxípániḡi imónigiá xwéowa uríápa axípi e yaríná píné api Judayí aḡíyo rinimeḡipi agwi sini rinimearini.

Jisaso wiepisiḡowa tíni ámi erimeánigiá nánirini.

¹⁶Wiepisiḡi wé wúkaú síkwí wo awa Gariri piropenisíyo díwí Jisaso uráriḡipimi nání niyoaro ¹⁷omi níwiniróná seáyi e numero aiwi wa “Jisatorini.” yaiwiro wa “Ámá ro nepa Jisatoráni?” yaiwiro yaríná ¹⁸o aḡwi e níḡiri re uriḡiniginini, “Gorixo ‘Amípi aḡinami imóniri xwíárimí imóniri eḡipi nání joxi api níḡini nání néní tíḡoxi imóniríni.’ nírfí eḡagi nání ¹⁹re searariḡini, ‘Soyíné nuro ámá gwí rixí wirí wirími ḡi wiepisiḡiáyiḡi níwimíxa nuróná re eríni. Yoí ápo Gorixoyápimi dání tíni xewaxoniwápimi dání tíni kwíyíḡipimi dání tíni wayí umeairo ²⁰sekaxí nioni seariḡá níḡini xídipíríá nání uréwapiyiro eríni. Ripi eni aríá époi. Nioni aniḡi diḡi seakikayómíarini. Síá yopariyimi e nání aí niseakikayóa umíarini.’ searariḡini.” uriḡiniginini.